

WANTOK

NIUSPEPA BILONG YUMI OL PAPUA NIUGINI STRETI - 27 YIA NAU

28 pes

Namba 1,250

Wik i stat long Fonde Jun 11, 1998

50t

INSAIT

■ Gavman lukluk long pe bilong ol sios helt woka

pes 3

■ Ol stori long ol provins

pes 5-6

■ Winim K4000 long raitim stori resis

pes 14

Temu askim ol dokta long noken straik

WENCESLAUS MAGUN i raitim

HELT Seketeri Dokta Puka Temu i askim olgeta nesenel dokta bilong Papua Niugini long noken stapim wok. Na ol i ken yusim olgeta rot i stap long stretim hevi bilong ol.

Em i mekim dispela askim bihain long ol nesenel dokta i askim Dipatmen bilong Pesenel Menesmen (DPM) long glasim ol hevi bilong ol na stretim kwik o nogat bai ol i stap wok.

Insait long wanpela pas Nesenel Doktas Asosiesen (NDA) i salim i go long DPM long mun Mas 2, ol i bin askim DPM long glasim sampela ol hevi bilong ol na stretim kwik.

Presiden bilong NDA, Bob Danaya, i tok i gat tripela bikpela hevi ol nesenel dokta i askim gavman long glasim na stretim:

• Bilong wanem na ol speselis dokta bilong Papua Niugini i risain. Rekot i soim olsem long 1997 samting olsem faivpela speselis dokta i lusim gavman na go mekim praivet prektis;

• Olsem wanem tru bai gavman i bringim ol dispela dokta i kam bek long pablik sevis; na

• Olsem wanem bai gavman

i ken bringim gutpela helt sevis i go long ol ples ausait long taun we i nogat gutpela helt sevis.

Long bekim ol dispela askim, Dokta Danaya i tok NDA i askim DPM long givim kontrak long ol dokta bai ol i ken mekim wok insait long pablik sevis. Kamapim sampela kondisen we i ken grisim ol dokta i lusim pinis pablik sevis na i go mekim praivet prektis long go bek long pablik sevis. Na kamapim ol gutpela kondisen long ol ples ausait long taun we i wankain olsem ol dokta i wok long taun bai ol dokta i ken go long ol ples na bringim gutpela helt sevis i go.

Dokta Danaya i tok NDA i givim DPM inap Jun 25 long bekim ol askim bilong ol. Em i tok las wik ol i kisim wanpela bekim i kam long DPM tasol dispela bekim i no bihainim laik bilong ol NDA.

"Ol i givim mipela ol samting ol i laikim mipela i mas mekim. Dispela em i no stret. Ol i mas bekim bek ol askim mipela i laikim," Dokta Danaya i tok.

Em i tok sapos NDA i no kisim ol bekim bihainim laik bilong ol, samting olsem 225 nesenel dokta bai stap wok.

Dokta Danaya i tok moa long 80 pesen bilong ol dokta long olgeta haus sik bilong gavman

em ol nesenel dokta na olgeta i sainim pinis pepa long stap wok long Jun 26, 1998. Sapos ol dokta i stap wok, klostu olgeta haus sik long kantri bai pas na planti manmeri bai dai.

Stat long dispela de i kam inap las wik, ol bos bilong NDA, DPM na Dipatmen bilong Helt i bin holim miting long foapela wik olgeta long painim stretpela rot long stretim hevi bilong ol nesenel dokta.

Long tingting bilong Dokta Temu, i gat planti rot i stap yet bilong lukluk i go insait long stretim dispela hevi na painim gutpela rot. Olsem na em i askim ol nesenel dokta long noken stap wok o kamapim straik. Em i tok ol nesenel dokta i mas tingim ol sikmanmeri na pipel bilong Papua Niugini antap moa long interes bilong ol yet long taim bilong kain ol hevi olsem.

Moa yet Dokta Temu i tok, i gat wanpela lo i stap insait long mama lo bilong NDA. Insait long dispela NDA mama lo, ol dokta i promis long putim interes bilong ol sik manmeri na pipel bilong Papua Niugini i go pas long interest bilong ol yet.

I luk olsem toktok i no stret yet tasol pasin bilong stretim dispela hevi i go het gut.

Ovasis helpim long gras rut bai hat nau

EDDIE SAUNDERS i raitim

HELPIM Mani (Aid) bilong ol gras rut i save kisim long ol arapela bikpela kantri bai hat liklik nau long kisim. Bikos sampela lain i save giaman na kisim mani nating long nem bilong ol gras rut grup. Ol i save kisim dabol mani o fanding long tupela o moa ejensi. Dispela i mekim na olgeta ovasis Aids ejensi insait long kantri bai sindaun na glasim gut olgeta aplikesen i go long wanwan ejensi.

Olgeta embesi, hai komisin na developmen Aid ejensis i kamapim pinis wanpela komiti ol i kolim Grasrut Aid Donas Netwok long wok bung wantaim na mekim dispela wok sekap na

lukluk insait.

AusAID progrem bilong Australia, Japan, UNDP na kantri Nu Silan i go pas long kirapim dispela komiti long las yia 1997. Ol dispela lain i save givim bikpela mani long ol gras rut developmen projek insait long kantri.


Ripot Wantok i kisim dispela wik i tok ol i holim sampela miting pinis stat long las yia i kam na glasim olsem i gat planti giaman na dabol fanding i bin kamap pinis long ol yia i go pinis.

Komiti i glasim tu olsem planti ol savemanmeri i go pas long ol dispela gras rut projek i save yusim ol lain nogat skul long mekim wok bilong ol. Dispela giaman pasin i no gutpela tru long ol dispela lain dona o helpim kantri.



Ol ami i sekim dispela bikpela hul long Lae ol i kolim Lunaman Sil arere long Voko Poin nambis. Dispela hul i bin kamap long taim bilong Wol Woa 2 na nau ol ami na Turism opis i sekim sapos i gat sampela gutpela samting inap kamap long em bihain.

• Foto: TOURISM PROMOTION AUTHORITY.



MAJOR SPONSA BILONG RAGBY LEAGUE INSAIT LONG PAPUA NIUGINI

GOVERNMENT WARNING: SMOKING IS DANGEROUS TO HEALTH

PLIS RIPOT

Hailans:

I kam inap nau long Hailans rijon, 10-pela pipel i bin dai insait long tupela wik, plis ripot i tok.

Long wanpela, ol bin kilim dai man taim ol i spak na lukim Stet ov Origin ragbi pilai long Australia. Long narapela, wanpela sumatin na wanpela pis meka i bin dai bihainim wanpela pait na tok kros long Enga provins.

Plis ripot i tok long ples Samiriyufa klostu long Kefamo insait long Isten Hailans, liklik brata i bin kilim dai bikpela brata bilong em taim ol i lukim ragbi pilai namel long Blus na Maruns.

Bos bilong ol plis long Isten Hailans Bacly larume i tok liklik brata i bin yusim pilai olsem ekskius long kirapim pait wantaim bikpela brata bilong em. Tok i bin sut long em olsem em i wokim prenpasin wantaim meri bilong brata.

Plis i bin holim pasim liklik brata na narapela man long ol i rong long kilim dai narapela man.

Isten Hailans:

Long Isten Hailans, pait namel long wanpisin i kamapim dai bilong sevenpela man. Na narapela tupela i dai long ol arapela birua.

Plis i ripotim olsem pait i kamap namel long Afogobo na Ifogoba wanpisin long Bena eria. Pait i bin stat long ol toktok long skul basa long Jun 3.

Ol bin sutim dai wanpela man na long bikmoming neks de, ol lain bilong em long Ifogoba wanpisin i banisim ples Afogoba na kirapim pait. Ol i yusim ol gan, naip bunara na spia na pait wantaim. Ol i kilim dai foapela pipel wantaim tamiok na gan na ol i kukim dai narapela tupela. Bos bilong oo plis long Isten Hailans, John Wakon i tok ol plisman i kem long arere bilong ples tasol nogat man i stap bikos olgeta ples lain i ronawe.

Enga:

Plis long Enga provins i putim strongpela was long Laiagam distrik taim sindaun long hap i go nogut bihainim kiling bilong wanpela skul sumatin bilong Laiagam hai skul.

Sief Inspekta Allan Kundi i tok manki ya i wokim Gret 9. Em wok long go bek long skul bihain long wiken long ples taim sampela lain i banisim em na kilim em. Plis i tokaut long nem bilong sumatin olsem Loban Timothy wantaim 22 krismas.

Long Enga tu, ol i kilim wanpela man taim em i laik stapim kros pait namel long tupela marit. Man bilong meri i sutim man ya wantaim bunara na em i dai kwiktait.

Plis i tokaut long daiman olsem Dick Marasa. Em i gat 28 krismas na em i bilong ples Papaiuk long Enga provins.

Simbu:

Wanpela yangpela meri Simbu i bin dai long las wiken taim wanpela ka i krugutim em. Birua ya i bin kamap long Hailans Haiwe. Ka i bin krugutim meri na em i rno stop, em i ron i go tasol.

Long Kimininga insait long Westen Hailans, ka i bin krugutim wanpela man taim em i laik go long narapela sait bilong rot.

Manam pipel long Bogia kem ino amamas

BEN TAUMAI i raitim

Ol pipel bilong Budua long Manam ailan husait bin kisim bikpela bagarap long maunten paia long 1996 nau istap yet long Bogia gavman stesin ino save wanem hap bai ol i go stap long en na wok long bungim sampela hevi.

Kaunsela bilong ol Collin Bade na vilis rekota bilong em Nathaniel Kurum itokim Wantok long las wik oslem ol pipel bilong tupela itait tru nau long stap long liklik hap kona bilong Bogasi stesin. Ol laikim olsem gavman mas painim wanpela hap gran kwik na salim ol go stap long wanem dispela liklik hap ol stap long em ya i mekim na ol wok long kisim ol kainkain sik norrbaut.

Long taim ol kam stap ikam inap nau tupela itok olsem igat 4-pela pipel idai pinis.

Bade na Kurum itok olsem ol pipel bilong ol tu save fesim hat tru long kaikai long wanem ol papa graun we Bogai stesin istap long en ino save larim ol go wokim gaden. Nogat, ol save tambuim ol tru, em wankain tu long kisim paiawut.

"Hau bai gavman i mekim mipela safa nating long hia na ino mekim wanpela samting long stretim sindaun bilong mipela."

"Mipela save kisim rais nating tasol na nogat mit, suga o kopi long Madang disastaplis. Tasol dispela kain kaikai ya ino gutpela long strongim bodi bilong mipela, yu save", tupela itok.

"Taim mipela laik kisi ol sampela kaikai bilong gaden, mipela save go senisim wantaim ol man na meri long ples. Em wankain tu long saksak".

Tuepal itok ol pipela bilong tupla ipilim tait tru nau na jaskim Nesenel na provinsel gavman long lukluk long dispela hevi ol bungim.

Bade tok long las wik, wanpela opisa bilong Lens opis long Madang bin go lukluk ruan na makim wanpela hap graun long Fostem plentaesin. Sapos gavan igat tingting long mubim mipela igo long hap, plis mekim hariap bikos mipela pilim tait pinis long stap nating long dispela liklik kona bilong taun ya.

Em askim tu sapos gavman inap givim ol wanpela trak bilong helpim ol long karim ol

kaikai bilong ol long Madang ikam long Bogia long wanem ol save painim hat tru.

Bade na Kurum bin kisim mi go lukim ken bilong ol long Bogia na lukim ol tu ol binatang wok long kaikaim ol pos bilong haus nau na ino long taim bai ibruk.

Tupela itok, "lukim dispela liklik haus ya planti ol famili save gurakum insait na ino gat bikpeal spes", tupela tok osle na pointim igo long wanpela haus istap klostu long we mipela sanap moa.

Ol pipel bilong Budua bin muv igo long Bogia long Desemba namba 3 de long yia 1996 long taim Manam Volkeno bin pairap na kilim 13 pipel.

Narapela 3-pela bilong Bieng ples.

Long dispela taim tu igat 9-pela pipel husat bin kisim bikpela bagarap na go stap long haus sik na bihain orait.

Dispela mekim na nesenel disasta opis i muvim ol go stap long Bogia inap nau. Nau yet igat 332 pipel olgeta na istap long kem.

Wantok ino nap kisim tingting bilong distrik administreta bilong Bogia Martin Hannibal long wanem em ino stap long opis.



• Sampela manmeri hust i bin sindaun insait long skul kempen egensim ol spak brus na arapela drag nogut. Foto: JOE IVAHARIA.

Raskel pasin pasim skul long Mosbi

VERONICA HATUTASI i raitim

WANPELA skul long Nesenel Kapitel Distrik i stap pas yet taim narapela i kisim bek ol sumatin tude bihain long tupela de bilong nogat skul.

Ororo long Jun Veli na St Peter Chanel Praimeri skul long Erima i bin pas bihain ol raskol i bin go insait long skul, bagarapim na stilim ol samting bilong skul.

Long Ororo komyuniti skul, ol i wokim nabaut long ol tisa, paitim na pulim bek bilong wanpela meri tisa na kisim ol samting bilong em. Skul i wari long sefti bilong ol tisa na ol pikinini na em bai stap pas yet inap komyuniti long hap i wokim samting long daunim hevi long sekyuriti sait. Ol atoriti i askim komyuniti long wokim samting bilong daunim dispela hevi bikos sapos

nogat, skul bai i stap pas yet.

Ol raskol i bin brukim opis bilong St Peter Chanel praimeri skul long Erima long las Fraide nait na stilim sampela samting bilong skul. Ol stilim sevenpela redio we ol skul sumatin i save harim ol skul brotkas progrem long en. Ol i stilim tu televisen na dek, laut spika we skul i save yusim long wokim ol tok-save, maikropon, ol kaset we i gat ol skul progrem long en na ol i tromoi olgeta rekot pepa bilong ol tisa long floa.

Hetmistres bilong skul Mary Biti i tok em i namba tri taim long dispela yia long ol raskol i brukim skul na em i askim ol papamama na komyuniti husat i stap klostu long skul bilong lukluk gut na ripotim long ol atoriti sapos ol i lukim sampela lain husat i laik salim ol samting olsem dispela we ol i stilim long skul.

Tupela wik i go pinis, ol raskol i bin brukim laibreri tasol em i hat long go insait na ol i no kisim wanpela samting. Long sampela taim i go pinis, ol bin brukim opis na stilim mani bilong peti kes we mak bilong em inap long K1,060.

Long las yia tu, ol raskol i bin wokim hensap pasin na stilim ol bek, mani, hanwas na ol arapela samting bilong ol tisa na skul.

Misis Biti i tok skul bod i bin bung long dispelaTunde na ol i wokim disisen long pasim skul long givim taim bilong sekim ol samting na wokim ripot i go long plis, insurens kampani na sekyuriti.

Skul i bin op bek gen tude.

Kain pasin we ol raskel i wokim long skul i no gutpela na em i bagarapim skul bilong ol pikinini, Misis Biti i tok. Em i askim komyuniti long lukautim na was gut long skul bikos dispela em ples we ol pikinini bilong ol i kisim na skruim save long en.

Plis na pipel wok bung long Manus

PLIS long Manus i wok bung nau wantaim ol komyuniti lida long strongim na kamapim gutpela sindaun long provins.

Provinsol Plis Komanda Joseph Morehari i tok plis i wok nau wantaim ol viles kot na pis opisa, ol wod memba, ol yut, sios, meri na komyuniti lida long bringim na strongim gutpela sindaun long Manus.

Em i tok ol holim pinis bung wantaim ol komyuniti lida long Pak na Lou Ailan na long neks wik, ol bai sindaun wantaim ol lida bilong Rasun.

Ol bai bungim ol tingting wantaim long traim strongim ol komyuniti long Manus i lukautim gut ples na gutpela sindaun bilong ol pipel.

Inspekta Morehari i tok long nau, provins i stap kwait na nogat trabel o meknais i kamap. Em i tok Manus em i wanpela kwaitpela provins na nogat ol bikpela trabel i save kamap.

Inspekta Morehari i tok plis long Manus i wok long redi long dispela bikpela Intenesenel pilai resis ol i kolim Si kayak-ing we bai i kamap long Lorengau long mun Oktoba long dispela yia.

Em i tok plis long Manus bai karimaut wanpela spesel operesen bipo bikpela pilai i kamap na taim em i stap on.

Dispela em long lukautim lo na oda. Bikos planti pilaia bilong ol arapela kantri bai i stap insait long pilai.

Em i tok ol bai kisim moa plisman long Niugini Ailans rijon, moa yet long Is Nu Briten provins. Em i tok ol bai kisim helpim tu long Lombrum Nevel Beis we bai salim sampela defens opisa long helpim plis insait long spesel operesen bilong ol.

WANTOK

All departments. Phone: 325 2500 - Fax: 325 2579 P. O. Box 1982, Boroko, NCD, Papua New Guinea

Publishing Weekly, Thursday, for Word Publishing Company Pty. Ltd.

Printed and published by Anna Solomon of Bittern Place, Gordons, at Allotment 2, Section 209, Spring Garden Road, Hohola, for Word Publishing Co. Pty. Ltd.

Acting General Manager and Group Editor in Chief: Anna Solomon. Advertising Manager: Mike Kanin. Editor of Wantok: Leo Wafiwa.

Papers distributed by air throughout PNG. Available by air mail subscription within Papua New Guinea and overseas

Advertising deadlines, Display bookings: Tuesday midday. Camera ready copy: Wednesday midday. Classified Advertising: Wednesday 5pm.

Word Publishing Company, Pty. Ltd. is owned by the four major churches of Papua New Guinea: Catholic 55%, Lutheran 25%, Anglican 10%, and United 10%. The company reserves the right to accept or reject any advertisement or other material submitted for publication which it deems contrary to the public interest at its absolute discretion. The publisher's general terms acceptance are available at Word Publishing Company Pty. Ltd. and are set out in full on the reverse side of its official display Advertising Bookings form.

WANTOK

NIUSPEPA BILONG OL PAPUA NIUGINI

NEC bai makim nupela Madang haus sik bod

Ol dokta noken straik

LONG mun mas, ol nesanel dokta bilong Papua Niugini i askim Dipatmen bilong Pesenel Menesmen (DPM) long stretim sampela kondisen bilong ol bai ol i amamas long mekim wok bilong ol olsem publik sevens na i no lusim na go mekim praivet prektis.

Ol nesanel dokta i askim tu gavman long kamapim sampela gutpela kondisen bai i grisim ol nesanel dokta husat i mekim praivet praktis long go bek long publik sevis. Ol i laikim gavman i stretim tu kondisen bilong ol dokta long ples bai ol dokta i ken go long ples na mekim wok.

Singaut bilong ol nesanel dokta long gavman i luksave long kondisen bilong ol na stretim em i wanpela bilong ol bikpela bel hevi planti ol arapela publik sevens long kantri i bungim.

Planti taim gavman i singaut long ol publik sevens i mas givim gutpela sevis long ol pipel. Tasol long wankain taim gavman i no glasim hevi bilong ol wokman bilong em na stretim.

Sapos gavman i tingting tasol long hapim takis, na na i no hapim pe o stretim ol arapela kondisen bilong ol wok manmeri, gavman i noken wetim ol dispela wok manmeri long mekim gutpela wok. Em i hat tru long ol publik sevens i bringim gutpela gavman sevis i go long ol pipel taim sindaun bilong ol i bagarap.

Sapos ol dokta i straik, i luk olsem olgeta haus sik long kantri bai pas tu. Bikos planti ol nesanel dokta i wok long ol Publik Haus Sik. Olsem na bipo long dispela hevi i kamap, DPM i mas glasim gut hevi bilong ol dokta na stretim kwik.

Pasin ol dokta i mekim bilong askim gavman long stretim hevi bilong ol em i gutpela. Ol i mas go het na suvim gavman long luksave long hevi bilong ol na stretim kwik.

Tasol ol nesanel dokta i mas sori tu long laip bilong ol sik manmeri bilong kantri. Ol i noken stap wok bikos laip bilong 4 milion manmeri bilong Papua Niugini i stap long han bilong ol. Ol nesanel dokta i mas bihainim tok promis bilong ol long lukautim laip bilong man antap moa long interes bilong ol.

Dispela singaut bilong ol nesanel dokta i go long DPM i mas opim ai bilong gavman long glasim ol hevi bilong ol arapela publik sevens tu na painim gutpela rot bilong helpim ol. Nogut ol arapela publik seven i stap wok tu na gavman bai mekim wanem.

WENCESLAUS MAGUN i raitim

Aninit long oganik lo bilong Publik Haus Sik, olgeta wok bilong Publik Haus Sik i kam aninit long Nesanel Gavman. Long dispela as, Nesanel Eksekutiv Kaunsel (NEC) tasol i gat las pawa bilong makim ol bod memba bilong ol Jenerel Haus Sik long Papua Niugini.

Olsem na Sekreteri bilong Helt Dipatmen, Dokta Puka Temu i tok NEC bai makim gen ol nupela nainpela bod memba bilong Madang Jenerel Haus Sik bihain long ol olpela bod memba i risain.

Olpela siaman bilong Madang Jenerel Haus Sik Bod, Paul Ropra i tok ol olpela bod memba i les pinis long planti toktok ol lida bilong Madang long Palamen i mekim egensim ol. Mista Ropra i tok planti tok egensim

ol olpela bod memba i kam long Memba bilong Bogia Bernard Mollok na Memba bilong Madang na Minista bilong Jastis, Jacob Wama.

Em i bilip Mista Mollok na Mista Wama i no kisim klia toktok long wanem kain ol hevi i wok long kamap insait long Madang Jenerel Haus Sik na i mekim planti toktok tumas. Ol bod memba husat i risain em long, Don Kudan, Greg Mitchell, Dick Bart na Maureen Hill.

Memba bilong Bogia, Bernard Mollok i amamas long ol olpela bod memba bilong haus sik i risain na em i singaut i go long Nesanel Gavman long givim pawa bilong makim ol nupela bod memba i go long Madang Provinsel Eksekutiv Kaunsel.

Bihainim ol dispela toktok, Dokta Temu i tok em i no laik autim tingting bilong em long pasin we i mekim ol olpela

bod memba bilong Madang Jenerel Haus Sik i risain tasol em i bilip dispela i bihainim pasin politik.

Long tokaut klia long ol pipel bilong Madang long ol nupela bod memba, Dokta Temu i tok nau yet em i go pas long painim ol nupela bod memba bilong Madang Jenerel Haus Sik. Dispela wok bilong makim ol nupela bod memba bai pinis bipo long pinis bilong dispela mun.

Em i tok bai i gat nainpela nupela bod memba. Insait long dispela nainpela bod memba tripela bilong ol bai Madang Chamber ov Komes i makim long makim ol bisnis komyniti bilong Madang. Madang Provinsel Kaunsel ov Wimen bai makim wanpela meri long makim maus bilong ol meri. Madang Provinsel Gavman na Lokol Level Gavman bai makim tupela mausman. Madang Provinsel Sios Kaunsel bai

makim wanpela mausman tu long sait bilong ol sios helt sevis na Provinsel Helt Edvaisa yet bai makim Dipatmen bilong Helt insait long dispela bod.

Dokta Temu i tok pasin bilong larim ol wanwan oge-naisesen o grup insait long Madang yet long makim mausman o mausmeri bilong ol yet insait long Madang Jenerel Haus Sik bod em wanpela rot bai i abrusim pasin bilong pilai politik.

Tasol em i tok taim ol dispela lain i givim nem bilong ol mausman o mausmeri bilong ol long gavman, Nesanel Eksekutiv Kaunsel bai mekim las disisen long givim tok orait long ol dispela lain.

Minista bilong Helt, Ludga Mond i stap long Simbu provins na Wantok i no inap long kisim tingting bilong em long olgeta ol hevi bilong helt sevis long kantri.

Gavman redim yet pe bilong ol sios helt woka

WENCESLAUS MAGUN i raitim

TUPELA bikpela hevi i stapim gavman long redim kwik pe bilong ol sios helt woka. Namba wan hevi em Minista bilong Treseri i no givim tok orait long ol Provinsel Gavman baset na namba tu hevi em sapos i gat sampela senis i kamap insait long ol dispela baset.

Sekreteri bilong Helt Dokta Puka Temu i tokaut long dispela bihain long planti sios helt woka i no kisim pe bilong ol insait long faipela fot-nait. Ol provins i bungim dispela hevi em long Gulf, Simbu, Madang, Sandaun na Sauten Hailens.

Mista Temu i tok wok bilong stretim ol pepa wok bilong dispela hevi klostu i pinis na Nesanel Gavman bai givim mani i go long ol Provinsel Gavman long baim ol sios helt woka sampela taim long pinis bilong dispela mun.

Em i tok, hevi i bin kamap bikos i gat planti pepa wok bilong wokim insait long kompyuta na ol wokman bilong dipatmen i wok hat tru long

stretim ol dispela pepa wok.

Mista Temu i tok tu olsem dispela em i namba wan taim bilong Nesanel Gavman long kamapim wanpela vot bilong lukautim stret pe bilong ol Sios Helt Woka aninit long nupela rifom lo. Dispela vot namba em 112 bilong provinsel baset. Bipo i nogat vot bilong pe bilong ol sios helt woka. Olgeta samting i kam aninit long wanpela Helt Sevises grant.

Olsem na em i tok planti wok i stap yet bilong stretim gut ol dispela pepa wok. Tasol em i bilip long yia 2000 ol sios helt woka bai i no inap bungim planti hevi olsem ol i bungim long dispela yia.

Mista Temu i tok tu olsem bikpela hevi nau i kamap bikos sampela ol provinsel gavman i no skelim mani insait long baset bilong ol long baim ol sios helt woka. Long wankain taim sampela provinsel gavman i skelim mani na i wetim Nesanel Gavman tasol ol i no katim mani kwik i go long ol provinsel gavman long baim ol sios helt woka.

Ol pipel wari taim ami lusim Arawa

VERONICA HATUTASI i raitim

PLANTI pipel long Bogenvil i pilim olsem ol BRA i no lukautim ol gut na ol i wari long gutpela sindaun bilong ol taim gavman i wok long kisim bek ol ami long Arawa.

Long wanpela ripot i kam long Bogenvil, planti pipel bai go stap gen long Loloho we ol sekyuriti fos lain bai stap long en bikos ol i lukim ol i wari long sefti bilong ol.

Ripot long dispela wik i tok olsem i bin gat sutaut na ol arapela meknais i kamap long Arawa taun. Ol no klia husat tru i kamapim ol dispela trabel.

Opis bilong ami fowod beis long Buka i tok bihainim disisen bilong nesanel gavman las wik long ol amilain i lusim Arawa, dispela i no kamap yet. Ol ami i stap yet wetim bung bilong ol gavman na provinsol lida tude long Arawa.

Tasol opis i tok ol sekyuriti fos memba i redi long muv i go long Loloho. Ol i stat pinis long muvim ol hevi masin na ol woklain bilong Arawa difens klinik i go long Loloho.

Opis i tok taim ol ami i wok long lusim Arawa, planti pipel i wok long pret gen long wanem pasin bilong dring spak i wok long kamap long ol yangpela man na dispela i ken kamapim hevi long sait bilong sefti long ol manmeri na tu long wok bilong painim gutpela sindaun we planti pipel long ailan i wok hat long kamapim.

WANTOK

NIUSPEPA BILONG OL PNG STRET

P. O. Box 1982, Boroko
Telepon namba: 325 2500
Feks namba: 325 2579

PE BILONG WANPELA YIA 52 NIUSPEPA

PLES	AIR
Mosbi	K 40.00
Arapela PNG eria	K 75.00
Ostrelia na Nu Silan	K115.00
Esia Pasifik na Japan	K150.00
Amerika na Yurop	K215.00



Bogenvil nius wantaim VERONICA HATUTASI

Rio Tinto tok em inap givim moa helpim long stapim hevi long ailan

MAJNING kampani bilong Australia, Rio Tinto i tokaut olsem em bin inap long wokim samting long stopim hevi long Bogenvil bipo em i go nogut tenpela krismas i go pinis.

Rio Tinto em i papa kampani bilong Bogenvil Kopa na Panguna kopa main long Sentrel Bogenvil.

Sief Elsekyutiv bilong Rio Tinto, Leon Davis i bin tokim wanpela bung long Melbon Australia olsem


kampani bilong em i bin inap long toktok wantaim PNG gavman long rot bilong abrusim hevi we i stat long bagarap we Panguna main i kamapim long graun na ol papagraun i askim long moa kompensesen peimen.

Mista Davis i tok long taim hevi long Bogenvil i stat, em bin wok bilong gavman long stretim ol kain hevi na i moabeta long ol bikpela

kampani long stap aut na i no sapotim gavman long ol dispela samting.

Em i tok nau ol i askim ol long stap insait long ol toktok na disisen bilong ol papagraun na ol arapela humen raits samting.

Tasol maski, ol i sainim sispai agrimen long Bogenvil long pinis bilong mun Epril, nogat toktok i kamap olsem ol bai opim bek kopa main o nogat.



• Wanpela kopra haus long Loloho we ol paitman i bin bagarapim long taim bilong hevi long ailan. Annit: Pinolasa Bamboo Ben i amamasim de bilong opim nupela kopra haus long Bogenvil. Ol foto: Raymond Palangat.



Bung bilong bungim Bogenvil gavman wantaim

STAT long taim sispai i kam ap long Bogenvil, sindaun long Bogenvil i wok long go gut. Tasol sampela meknais i kamap long sampela hap bilong provins na ol dispela em hevi long lo na oda na i no ol paitman i kamapim.

Primia Gerard Sinato i tok nau ol i karimaut kombain operesen we ol komyuniti i wok wantaim ol sief, BRA/BIG, resistens, sekyuriti fos lain, plis na ol pis monita long kontrolim ol meknais na hevi.

Mista Sinato i tok bikpela samting nau we ol pipel bilong Bogenvil i lukluk long en em long bung bilong ol Bogenvil na nesanel gavman lida long dispela mun. Long redim ol yet long dispela bung, toktok na bung i save kamap bihain long olgeta tripela wik namel long ol nesanel gavman, BTG na BRA/BIG lida long Arawa.

Em i tok tu olsem bikpela samting we ol bai lukluk long en long dispela bung em wanpela gavman bilong Bogenvil.

Kain gavman bai i kisim i go insait BTG, BRA/BIG. Nau ol lida bilong tupela sait i wok long lukluk wanem kain gavman ol bai kirapim na insait long lidas bung, ol bai putim wantaim long

glasim, lukluk na toktok long en.

Long Sentrel Bogenvil, ol samting i go gut tasol na ol pipel i wari tasol long ol sevis olsem helt na edukesen i go insait long ol komyuniti na eria bilong ol.

Ol pipel i wok nau long sanapim ol bodi long lukautim lo, oda na gutpela sindaun insait long ples na komyuniti. Dispela em ol grup olsem kaunsil ov eldas.

I gat wari tu long ol grup i go insait long Bogenvil na helpim long wok developmen bilong provins.

Ripot we Wantok i kisim long Arawa i tokaut olsem i moabeta sapos gavman we ol i laik kirapim long ailan bai mekim polisi o lo we bai glasim, skelim na tok oraitim ol kain developmen i kamap long Bogenvil.

Ripot i tok planti pipel long ailan i no lukim developmen olsem ol bikpela samting we i sut long indastri na ol arapela bikpela wok kamap tasol ol i lukim (developmen) olsem ol kain wok na projek long apim gutpela sindaun bilong ol. Dispela i min olsem stretim rot, ol bris na trenspot sistem insait long provins.

Sir John singautim ol lida long wokbung gut

SPESEL Stet mausman na memba bilong Rabaul Sir John Kaputin i singaut strong long ol lida bilong Bogenvil i go hetim ol toktok na wok bung wantaim long kamapim gutpela sindaun long provins.

Sir John i laikim gutpela wok bung we i bin stap namel long ol lida insait long lidas bung long Lincoln, Nu Silan na ol arapela toktok long kamapim sispai long ailan i mas stap na go het.

Taim i wok long kamap klostu long narapela Bogenvil na nesanel gavman lidas bung long dispela mun. Bung ya bai i kamap long Arawa klostu long pinis bilong dispela mun Jun.

Sir John i laikim ol lida long bung wantaim na stretim ol toktok long lukim olsem ol samting we i stap aninit long ol agrimen em ol i bihainim na i mas karim kaikai.

Em i tok ol wok bung bai i kamapim ol gutpela wok long sait

bilong stretim ples, sindaun bilong ol pipel na ol wok developmen long ailan. Ol dispela samting, em i tok, em ol pipel bai benefit long en long mekim sindaun na laip bilong ol i kamap gut.

Em i tok bikpela samting em ol meri na pikinini, ol man na ol yangpela i mas kisim gutpela samting long ol wok we i kamap nau long ailan bilong kamapim gutpela sindaun.

I gat tingting i stap nau long long kirapim wanpela hai level Bogenvil lidas forum na wok bilong grup ya i bilong lukautim ol toktok na long apim wok bung namel long ol grup long ailan taim ol i wetim wanpela gavman long kamap.

Dispela forum we ol i tingting long kirapim bai i gat foapela nesanel memba bilong Bogenvil, Primia, komanda bilong resistens grup, vais presiden bilong BRA/BIG na BRA bosman long pait.

Ol soldia lusim Arawa i salens

LONG las wik, kabinet i bin tok orait long rausim ol sekyuriti fos memba long Arawa bihainim agrimen aninit long sispai we i laikim Arawa i mas kamap olsem niutrel eria.

Gavman i kisim bek 75 difens fos soldia long Arawa na putim ol long Loloho i stap.

Dispela i bilong givim sans long ol BRA/BIG lida na ol arapela lida na komyuniti insait long distrik long i go i kam long Arawa na strongim wok long daunim hevi long ailan.

Primia bilong Bogenvil Gerard Sinato i tok dispela samting bai traim bel bilong ol pipel bilong Bogenvil sapos lewa na tingting bilong ol i stap long wok bilong painim trupela gutpela sindaun.

Mista Sinato i tok em i wanbel wantaim disisen bilong nesanel gavman bikos dispela i bihainim sispai na Lincoln agrimens na long taim bilong sispai, ol bin tok dispela em wanpela long ol samting we ol bai lukluk kwiktai long mekim i karim kaikai.

"Nau i taim bilong ol Bogenvil pipel long soim nesanel gavman na kantri olsem ol i ken stap gut na bihbainim samting ol i askim long en, " Mista

Sinato i tok.

Praim Minista Bill Skate long las wik i bin tokaut long disisen bilong kabinet long kisim bek 75 soldia long Arawa na sindaunim ol long Loloho. Dispela i bihainim edvais long bos bilong PNG Difens fos Komanda Kenel Leo Nuia, Plis Komisina Peter Aigilo na ol arapela bikman husat i save wari long ol samting i kamap long Bogenvil.

Nau i gat samting olsem 344 ami lain i stap long Arawa wantaim sampela mobail skwat na jenerel duti plisman. Bihain long ol ami lain i lusim Bogenvil, ol plis bai i tekova long lukautim lo na oda insait long ol ples, komyuniti na provins.

Rausim ol ami long Arawa em i namba wan hap na ol bai i go hetim dispela wok isi isi long olgeta hap bilong ailan.

Praim Minista Bill Skate i tok i gutpela nau taim ol lain i lusim ol samting bilong pait na larim lo i lukautim Bogenvil. bikos long pastaim taim ol gan i bin bosim ples pasin bilong pret, hevi na sindaun nogut i bagarapim ol pipel. Nau em sivil lo bai lukautim ol pipel, em i tok.



Kimave laikim sapot bilong pipel long stapim lo na oda hevi

"Yumi mas wok bung wantaim long adresim lo na oda hevi bipo long em i kamap bikpela hevi na i go aut ov kontrol," Gavana bilong Gulf provins Ridler Kimave i tok.

Em i tok insait long las eitpela yia i nogat wanpela gutpela infrastraksa sevis i go insait long ol pipel bilong Kikori distrik na dispela i kirapim bikpela bel kros tru long bel bilong ol pipel long ples.

Long dispela tupela yia em i stap long gavman em i gat bilip long kamapim na bringim sampela gutpela developmen i go insait long Kikori, na ol arapela ilektret bilong Gulf provins tasol em i tok sapos hevi bilong lo na oda i no stret planti wok kamap bai i bagarap.

Wantaim plen bilong wel paip lain i kam daun long Kikori, na rot long Sauten Hailens i go insait long Gulf na joinim Niugini wantaim Papua rijen, Mista Kimave i bilip bikpela developmen bai kamap.

Insait long ol dispela developmen, pasin bilong lo na oda tu bai kamap bikpela. Em i tok sapos gavman i no glasim ol hevi inap long kamap bihain na painim rot nau long stapim, bikpela bagarap inap kamap bihain na bai hat tru long stopim.

Kain ol pasin bilong stil, bagarapim ol meri long pamuk pasin, kilim man, salim ol drag long gan na ol arapela samting namel long PNG na Austrelia em sampela bilong ol dispela kain hevi we i kamap pinis na i ken gro i go bikpela.

Long dispela as, Mista Kimave i go het

pinis na putim K200,000 mani bilong stretim ol haus bilong ol plis manmeri long Kikori. Em i tok long 1998 baset bilong Gulf provins gavman bilong em i putim namba wan praioriti long stretim lo na oda.

Em i tok tu olsem gavman bilong em i luksave long bikpela wok ol risev plisman i save mekim na olsem gavman bilong em bai glasim hevi bilong ol na painim rot bilong helpim ol.

Sauten Rijen Komanda, Josep Kupo i givim bikpela tok tenkyu long Mista Ridler long luksave long ol hevi bilong plis manmeri na i amamas long wok bung wantaim gavman bilong em.

Mista Kimave i putim namba tu praioriti bilong em long infrastraksa, long wokim ol bris, rot, haus sik, skul na ples balus. Em i go het pinis long putim mani bilong mekim ol nupela gavman haus long olgeta sab distrik bikos em i nogat bilip long lusim mani long mentenim ol olpela haus.

Long strongim ol toktok bilong Mista Kimave, lida bilong Pangu Pati, Chris Haiveta i tok Kikori bai stap olsem senta long Gulf provins na Papua rijen we ekonomi bilong provins, rijen na kantri bai go bikpela.

Em i tok taim Gobe na Moro gas paip lain i kam daun long Kikori planti ol sosel hevi bai kamap tu. Olsem na em i sapatim Mista Kimave long plen i go pas na skelim mani long stretim hevi na wok bilong ol plisman insait long Kikori bilong bungim dispela hevi sapos i kamap bihain.

Ol papamama, tisa na lida mas skulim ol pikinini long abrusim drag

WENCESLAUS MAGUN I raitim

Nogat wanpela sosaiti i ken kamap gut sapos ol pipel long dispela sosaiti i gat sik. Long stap gut na mekim gutpela wok, yumi wan wan i gat bikpela wok bilong lukautim yumi yet, famili, sosaiti na kantri bilong yumi.

Insait long greduesen bilong 44 manmeri husat i kisim namba tu drag awenes skul las wik long Nesenel Nakotiks Buriu (NB) insait long Mosbi, Oposisen lida Bernard Narokobi, na Deputi Dairekta bilong NB Mathew Nelson i toktok strong long stapim pasin bilong kisim ol kainkain drag olsem spak brus, o jangel jus.

Mista Nelson i tok manmeri em i wanpela bikpela na namba wan risos bilong kantri. Olsem na man na meri i mas lukautim gut helt bilong ol. Em i tok nau long dispela taim namba bilong ol pipel husat i save kisim drag i wok long go bikpela tru. Planti ol yut i wok long kisim drag na tu planti taim ol mani manmeri i save yusim ol grasrut lain long salim drag bilong mekim ol yet i

kamap moa ris.

Mista Nelson i tok ripot i kam long Lokol kot long 1997 i soim olsem moa long 950,000 manmeri i wokim trabel na i go sanap long ai bilong kot i brukim lo bilong kisim, salim o yusim drag. Planti ol lain i stap long kalabus long PNG i brukim lo bilong kisim, salim o yusim drag.

Em i tok dispela hevi nau i bikpela long ol skul, disiplin fos olsem plis, ami, woda, na nevi. Ol bikpela lain tru husat i save kisim drag em ol yut. Na ol lain husat i save salim drag em ol mani manmeri.

Wanpela ripot i soim olsem 95 pe sen bilong ol yut husat i nogat wok insait long Mosbi i save kisim drag. Olsem na Mista Nelson i askim olgeta manmeri long wok bung wantaim long daunim dispela hevi.

"Dispela hevi bai stap. Yumi noken giaman na tok i nogat hevi bilong drag. Dispela hevi em i hevi bilong yumi olgeta long mekim sampela samting long daunim," Mista Nelson i tok.

Em i givim tu bikpela tok tenkyu i go long 31 kos patisipen i wokabout long Goroka i kam olgeta long

Mosbi long kisim dispela skul.

Moa yet, Oposisen lida Bernard Narokobi i tenkim Pater Bill Liebert wantaim gutpela tingting bilong em long statim NB sampela 20 yia i go pinis. Em i tenkim tu ol wokmanmeri bilong NB na tokim ol long lukautim gut ol yet taim ol i mekim dispela wok.

Mista Narokobi i tok tu olsem em bai givim strongpela sapot insait long palimen long pasim wanpela lo NB i laikim kamap. Em i tok long helpim NB wantaim progrem bilong ol, olgeta wan wan manmeri i mas kisim klia skul long kain sik longlong na ol arapela sik i save kamap na bagarapim het o bodi bilong ol taim ol i kisim drag.

"Em i wok bilong yumi wan wan long helpim narapela bai em i noken kisim drag," Mista Narokobi i tok.

Em i tok taim wanpela man i kisim drag em i bagarapim em yet. Taim mama i gat bel kisim drag em i bagarapim em yet na tu pikinini insait long bel. Taim ol lain insait long famili i kisim drag ol i bagarapim famili. Taim famili i bagarapim em i bagarapim komyuniti na taim komyuniti i bagarap kantri bai bagarap.


Japan NGO bai helpim ol lain bilong Goroka i kisim taim long biksan

WANPELA non-gavman ogenaiesen (NGO) bilong Japan, Japan Junior Chamber Inc bai yusim samting olsem K20,000 bilong helpim ol pipel bilong Henganofi na Marawaka insait long Isten Hailens provinshusat i kisim taim long biksan.

Siaman bilong wanpela spesel komiti insait long dispela NGO, ol i kolim long 'Borderless Relief Asosiesen,' Masahiko Adachi i tokaut long dispela bihain long faiv memba tim bilong em i kam mekim wok painim ong Goroka long las mun. Ol i kam long Me 29 na i go lukluk raun long ol ples long Angonofi na Kabiufa bihainim singaut i kam long Papua Niugini Kausnel of Sios (PNGCC).

Mista Adachi i tok long Japan i nogat hevi bilong biksan olsem na taim ol i harim dispela nius, bel bilong ol i kirap nogut na ol i tingting long kam na lukim long ai bilong ol yet.

Em i tok bihain long dispela lukluk raun bilong ol ol i painim olsem



• Paia i kukim 115 haus long Ababa ples na tude ol pipel i slip long haus sel na wet yet long kisim helpim bilong gavman.

planti lain i kisim taim long dispela bikpela san na ais i kam inap tude. Na ol i sot yet long kaikai.

Olsem na taim tim bilong em i go bek long Japan las wik ol bai traim long putim wanpela ripot i go long NGO grup bilong ol na kisim mani we ol i ken yusim long helpim ol

lain long Goroka.

Mista Adachi i tok, taim ol i bringim ol dispela samting i kam bek long PNG ol yet bai go pas long skelim ol dispela samting bikos ol i no laik lukim sampela lain i paulim ol dispela sevis ol i givim.

Em i tok ol bai mekim olsem

bikos insait long wok painim bilong ol, ol i painim olsem planti pipel long ples i no kisim ol helpim gavman i givim i go long helpim ol. Long san:pela ples, ol pipel i tokim ol olsem ol i no kisim wanpela sevis na olsem ol i nogat bilip long gavman.

Mista Adachi i tok ol pipel i nidim gutpela wara. Wanpela bilong ol dispela ples em Asaroka Hai Skul. Insait long wok painim bilong ol, ol i painim olsem nau i gat sik taipod na pekpek wara long Asaroka Hai Skul bikos i nogat gutpela wara.

Em i tok ol pipel long maunten sait olsem long Henganofi na Marawaka i bungim wankain hevi. Ol i sot tu long kaikai bikos kaukau ol i planim long taim ren i stat long pundaun i no redi yet.

Tim bilong Mista Adachi i go long Ababa ples tu insait long Angonofi na i lukim olsem insait long hevi bilong dispela bikpela san, paia i kukim samting olsem 115 haus olgeta.

Ol i painim tu olsem Praim Minista Bill Skate na Gavana bilong Isten Hailens, Peti Lafanama i bin go lukim ol pipel bilong Ababa na promis long helpim ol, tasol planti pipel i tokim ol olsem ol i no kisim bikpela helpim long gavman.




BLENDED VEGETABLE OIL

YUK!
Does your oil look creamy like this?



SWITCH TO THIS SUPERIOR QUALITY



AVAILABLE AT:
CB CHEE LAE, PHONE: 472 1334 - FAX: 472 6009. MT. HAGEN, PHONE: 542 1679 - FAX: 542 2398

• Ol Yus lokol gavman memba long Kabwum i sindaun long wanpela woksop bilong kisim skul long rifom lo.



Saonu askim ol kaunsel long hariapim ol projek

OL Lokol Gavman Kaunsel, ol presiden na ol kaunsel menesa i mas wok bung wantaim long hariapim ol projek insait long lokol gavman kaunsel eria bilong ol long mekim kamap wok na senis insait long ol asple bilong ol. Vais Minista bilong Turism, Tred na Indastri na memba bilong Kabwum, Ginson Saonu i tokim ol kaunsel lida taim em i pasim tupela de trening woksop bilong ol kaunsel long Yus Lokol Gavman Kaunsel long Me 27 na 28 long Teptep Kalsa Senta. Yus LGC em wanpela bilong tripela LGC long Kabwum eria.

Yupela olgeta menesa, presiden na kaunsel i mas wok klostu wantaim long kamapim inap taim bilong mekim plen long baset na hariapim ol pelapa projek i go het na mekim ol nupela projek i kamap, Mista Saonu i tokaut. Bai i nogat wanpela samting i kamap long ol manmeri bilong ples bihainim senis bilong rifom lo sapos yupela i no wok gut long bringim ol helpim na sevis bihainim ol projek we i stap pinis long baset, Mista Saonu i tok.

Em i askim ol long mekim planti raun o patrol insait long kaunsel eria bilong ol bai ol pipel i ken lukim na save long wok bilong atoriti na gavman.

Vais Minista i tok larim ol pipel i luksave long pes bilong yu na yu tu i mas save long ol pipel na wanem hap ol i stap na wanem kain hevi ol i gat. Long mekim dispela yu mas raun lukim ol. Sapos yu no inap mekim dispela na save long ol pipel na hevi bilong ol, noken sindaun nating long sia bilong ol pipel na nogat wok long en. Larim mipela i save bai mipela i ken senisim yu na kisim narapela man, em i tok.

Dispela trening woksop em Dipatmen bilong Morobe i go pas long en na kamapim na progrem ya bai i go het yet long mekim olgeta kaunsel na presiden bilong 28 Lokol Gavman Kaunsel insait long provins long save gut long wok bilong ol aninit long rifom lo bilong Provinsel na Lokol Gavman Kaunsel.

Dispela woksop em Luke Morries na Mista Kibisep bilong Dipatmen ov Morobe i go pas long en na nesenel memba Ginson Saonu wantaim Seko Lokol Gavman Kaunsel presiden Giukta Nakalip i sindaun wantaim ol kaunsel lain.

Ol kaunsel i tok amamas long Mista Saonu long votim kamap dispela rifom na tu ol i amamas long sapot em i save givim long sanapim na kamapim tripela lokol gavman kaunsel insait long Kabwum Distrik. Ol i tok bai ol i sapotim Mista Saonu i go yet long dispela taim em i stap long palamen.

Rabaul maket bai op bek

RAPHAEL SEMEL i raitim

Ol BAI sanapim bek Rabaul Taun maket long olpela hap bilong em.

Rabaul maket we i bin gat nem long kantri long salim ol gutpela gaden kaikai na kumu i bin bagarap long taim maunten paia long 1994.

Siaman bilong Rabaul Join Distrik Plening na baset Praioritis Komiti na memba bilong Rabaul Sir John Kaputini i tok disisen long sanapim bek maket long olpela ples bilong em i bin kamap bihain long ol komiti memba i wanbel long en.

Wok bai i stat kwiktai na ol i katim oinis K30,000 long go hetim dispela wok.

Ol bai tromoi K150,000 long stej wan bilong projek.

Sir John i tok taim nupela maket i pinis, ol bai stapim maket we ol i wok long holim long Page park long larim gras i gro bek gen.

Em i tok ol pipel long provins i laikim gutpela maket na ol arapela sevis i kirap bek kwiktai.

Sir John i tok ol meri na ol arapela lain i save go long maket long salim na baim ol samting i mas gat gutpela hap bilong maket long en. Olsem na wok bai i stat kwiktai long sanapim nupela maket long olpela hap bilong em long Rabaul taun.


4 TRIPS TO BE WON

WIN

With

Nestlé MILO

to the



1998 COMMONWEALTH GAMES

OL BIKPELA PRAIS BILONG WINIM EM:

- * Tupela tiket bilong lusim MOSBI na LAE Ples balus na go long, Kuala Lumpur na kam bek.
- * Slip 8-pela nait long hotel rum we yu ken serim wantaim pren bilong yu, em sponsa yet bai baim.
- * Wantaim K1,000 mani bilong spenim.
- * Na tu bai yu kisim Tupela Fri Komonwel Gems hanwas.

OL ARAPELA PRAIS

- * 2,000 Milo Hanwas

OL RULS BILONG BIHAINIM

1. Olgeta manmeri na pikinini bilong PNG ken stap insait long dispela resis. Na ol wokman/meri bilong Nestle na famili bilong ol bai nogat, wantaim ol wokman/meri bilong ol ejensi bilong Nestle.
2. Bai gat tupela wina tasol bilong bikpela prais. Na tu bai gat wanpela wina tasol long wanpela dro. Dro bai kamap long EMTV long ol dispela taim: Jun 12 na Julai 31 long 8 klok nit.
3. Wina bilong bikpela prais bai kisim toksave long leta. Nem bilong bikpela prais wina bai kamap tu long Post Courier na The National Niuspepa
4. Ol arapela wina bai kisim toksave long leta.
5. Ol wina bilong bikpela prais mas soim aidi kat na paspot long kisim prais.
6. Ol wina i no inap les long prais, na askim long kes mani.
7. Nestle ina inap kisim sapos leta i kamap leit, o i no go stret long ol wina.
8. Yu no inap senisim prais bilong yu.
9. Sapos i gat hevi, ol lain i promotim dispela resis bai mekim faino disisen. Olsem na olgeta entri bai kamap propeti bilong promoti bilong resis.
10. Sapos wanpela pikinini i kamap wina bilong bikpela prais, pikinini mas kam wantaim papa o mamao wanpela bikpela famili memba.

*Ol prais bilong winim bai yu kisim olsem mipela i edvetaisim.

EM I ISI LONG JOINIM RESIS.

Raitim tasol nem na adres bilong yu long beksait bilong wanpela Milo lebel na postim i kam long:
Milo Commonwealth Games Promotion
Locked Bag, Boroko, NCD
o filim tasol wanpela entri fom na salim wantaim Milo lebel o Sofpek na putim igo insait long Red Nestle Entri boks long stua i sapotim dispela resis.



NEM: _____ KRISMAS: _____

ADRES: _____

TELEPON: _____

Bogenvil Kausel Ov Sios bai givim rekonsiliesen kos

WENCESLAUS MAGUN i raitim

PAIT i pinis long Bogenvil na wok bilong bringim gutpela sindaun i wok long go het. Ol sios i stat pinis long ranim ol rekonsiliesen kos long Februari. Long dispela mun Jun 21-27 Bogenvil Kausel Ov Sios bai ranim gen wanpela kos long Arawa. Astingting bilong ol dispela kos em bilong helpim ol pipel long Bogenvil long pogivim ol

yet, ol birua bilong ol na askim God long pogivim ol.

Siaman bilong Sosel Konsens long Papua Niugini Kausel Ov Sios, Pasto Timothy Luke i tokaut long dispela. Em i tok bipo long ol i ken askim God long pogivim ol, wan wan bilong ol i mas pogivim ol yet na askim ol arapela long pogivim ol olsem ol i pogivim ol arapela.

Em i tok pait long Bogenvil i bagarapim sindaun na laip bilong planti ol famili long Bogenvil.

Olsem na ol sios i traim long mekim wanem samting ol i ken mekim insait long ol rihabilitesen progrem bilong ol.

Em i tok long mun Mas, Katolik Sios i ranim wanpela woksap long Tinputz, ol i kolim "Healing of Memory". Long dispela kos planti ol memba bilong Yunaited Sios na Katolik Sios i bin kisim dispela skul. Ol sios i gat laik long helpim ol pipel long Bogenvil long kisim bek gutpela tingting bai ol i ken stap hepi olsem ol arapela pipel

husat i no stap insait long bikipela pait.

Pasto Luke i tok insait long dispela woksap long mun Jun, ol bai givim kos long ekumenism o wok bung namel long ol sios, bel isi, pogivnes, na rekonsiliesen o sekan na wanbel.

Em i tok dispela kos i bihainim tingting bilong gavman long stapim pait long Bogenvil na bringim bel isi gen long ailan. Samting olsem 350 manmeri na sampela bilong ol gavman opisa tu bai stap insait

long dispela kos.

Ol lain i go pas long dispela kos i askim Primia bilong Bogenvil, foapela memba bilong ol long Nesenel Palimen ba ik sios lida bilong Katolik, Seven De Adventis na Yunaited Sios long stap insait na kisim dispela kos.

Man husat bai go pas long givim dispela kos em het bisop bilong Evanjelikel Luteran Sios bilong Papua Niugini, Dokta Wesley Kigasung.



• Pater Alex Garuai i kisim odinesen long Tunuru misin klostu long Arawa.

SVD nau i gat namba wan Bogenvil pater

PATER GIBBS i raitim

LONG dispela taim pasin bilong bringim bel isi long Bogenvil i wok long stat isi. Planti ol pipel long ailan ol i memba bilong Katolik Sios. Olsem na Sios i wok hat long bringim bel isi na gutpela sindaun gen long ailan.

Long Me 31, ol pipel bilong Bogenvil i selebretim narapela rot bilong bel isi wantaim odinesen bilong wanpela Bogenvil pater, Pater Alex Garuai.

Pater Garuai em i namba wan Bogenvil memba bilong Sosaiti bilong Divain Wod misinari long kamap pater.

Klostu 2500 pipel bilong Bogenvil i bung wantaim Bisop Francesco Sarego long Tunuru misin klostu long Arawa. Haus lotu tasol i stap. Ol arapela samting

bilong misin i bagarap pinis insait long klostu 10-pela yia bilong pait long Bogenvil.

Alex i wokabaut i kam wantaim sel mani long solda bilong em na wanpela polopolo hat long het. Dispela hat i soim olsem em i gat pawa. Ating prosesio i kisim samting oslem 15 minit tasol nogat wanpela man o meri i komplem. Ol pipel bilong Alex long Rorovana ples i gat nem long singsing na danis. Ol meri i dres long pink dres na karim biroko. Ol man i danis long baksait na mekim musik wantaim mambu paip.

Bihain long odinesen ol pipel i skelim kaikai na yu ken luksave olsem ol birua bilong bipo i skelim kaikai wantaim na kaikai. Dispela em i gutpela sain bilong soim olsem ol pipel i laikim bel isi. Samting olsem foapela yia i go pinis, nogat man i stap long ples

bilong Pater Alex bikos pait i mekim na olgeta pipel i ranawe i go hait long ol maunten. Planti bilong ol i dai insait long pait.

Dispela selebresen i senisim piksa nogut bilong ples i bagarap insait na raunim Arawa. Bus i karamapim olpela gavman stesen, klostu olgeta samting bilong plis stesen i bagarap, na olpela haus sik i bagarap. Sampela lain i stap long sampela ol haus tasol. Long sampela haus nogat man inap stap insait na sampela lain i brukim ol i go insait long stilim ol samting i stap yet olsem kopa waia.

Long taim bilong autim gutnius, insait long namba wan misa bilong Pater Alex, Pater Michael Bora i toktok long sekyuriti na nogat pawa. Ol pipel bilong Bogenvil i pilim olsem ol i no bin gat pawa long taim bilong pait.

Em i tok odinesen bilong Pater Alex i givim nupela hop, nupela spirit na nupela Bogenvil long ol pipel. Ol gutpela singsing na danis i go inap long nait i soim sain bilong nupela laip na hop insait long ol pipel. I gat wanpela pater tasol bilong lukautim sevenpela peris bilong Sentrel Bogenvil. Olsem na Pater Alex bai stap long dispela peris long helpim peris pater inap long tupela mun bipo long kisim wok bilong em long Simbu.

ELCPNG tok sori long sapotim Sandlain

LEROY BATIA i raitim

HET BISOP bilong Evanjelikel Lutaren Sios bilong Papua Niugini (ELCPNG), Dokta Wesley Kigasung i salim bikipela tok sori i go long ol memba bilong Lutaren Sios long kantri na long ol Kristen bilong arapela sios wantaim ol pipel bilong Bogenvil long toktok olpela het bisop Sir Getake Gam i mekim long sapotim ol praiwet ami bilong Sandlain las yia.

Em i tok sori olsem ELCPNG i no mekim kwik dispela tok sori long kain tok Sir Gam i mekim we i bagarapim gutpela wok bung namel long ol memba bilong Lutaren Sios na ol arapela sios wantaim ol pipel bilong Bogenvil.

Insait long namba 21 ELCPNG sinod long Kimbe, Wes Niu Briten provins, ol memba bilong Lutaren Sios i pasim tok olsem Sios i mas tokaut stret long tingting bilong Sios long dispela tok Sir Gam i mekim.

Insait long las kibung bilong ol Sios kausel long Mas 25-27, ol i pasim tok gen olsem Sios i mas go het na tok sori long ol memba bilong Lutaren Sios, ol arapela sios na ol pipel bilong Bogenvil.

Wanpela namba wan astingting ol Sios Kausel i sanap long tok sori em i bikos Sir Gam i no bin kisim tok orait long Bisop Kausel na Sios Kausel bipo em i autim tingting bilong em long pasin gavman bilong Sir Julius Chan na Chris Haiveta i mekim bilong kisim ol praiwet ami bilong Sandlain i kam bilong go pait long Bogenvil.

Bisop Kigasung i tok ELCPNG bai go het long mekim gutpela wok bung wantaim gavman, ol arapela sios na ol pipel bilong Bogenvil long bringim gutpela sevis na developmen i go long ol pipel.

Ol soldia na plisman long gutnius

TU MINIT TINGTING

LONG Nupela Testamen i gat 21 stori long ol soldia. I no gat sampela tok long ol plisman, long wanem, long dispela taim soldia na plisman, tupela i wan samting. Long dispela taim ol soldia i mekim wok bilong ol plisman. Olsem na olgeta tok mipela i raitim nau long ol soldia, em i karamapim ol plisman wantaim.

Klostu olgeta taim long Gutnius we i gat tok long ol soldia, ol i mekim wanpela gutpela wok. Wanpela taim tasol nogat. Em long Gut Fraide moningtaim tasol, we ol soldia i lap nogut long Jisas, na paitim pes bilong em, na tok bilas long em, na putim rop i gat nil nabaut long het bilong em olsem wanpela giaman hat bilong king.

Tasol long dispela sem de yet, ofisa Lonjainus i sanap aninit long diwai kros na i tokaut long Jisas em i mas pikinini bilong God. Na bihain long tupela de ol soldia ol i namba wan witnes long Jisas i lusim matmat na i kirap long dai. Ol soldia yet i bin go pas long autim dispela nius long Gavana Ponsius Pailot.

Konelias, wanpela ofisa bilong ol soldia, em i kamap namba wan Kristen long taun Sesaria. Long haus bilong em yet Santu Pita i bin kisim dispela driman long olkain kaikai i no tambu. (Ap 10.1)

Tupela soldia i lusim laip bilong tupela long taim ol i lukautim Pita long kalabus na em ranawe long nait. Lukim Ap. 12.6.

Na ol soldia i sambai helpim Sen Pol long taim ol Juda i laik kilim em i dai. Lukim Ap. 21:30. Na bihair: liklik, yumi rit olsem wanem long taim Pol i lusim Jerusalem na i go longwe rot long Rom, oltaim wanpela soldia i sambai helpim em - inap long taim Pol i dai long Rom.

Naispela stori tru bilong wanpela soldia em i dispela bilong Mat. 8:5-13 we Jisas i stretim sik bilong wokboi bilong wanpela ofisa bilong ami. Ofisa ya i gat bikipela bilip tru long pawa bilong Jisas olsem na em i tokim em, "Bikman, mi no laik givim yu trabel. Nogut yu hatwok long kamap long haus bilong mi haidenman. Maski. Yu stap longwe na yu tok tasol, na wokboi bilong mi bai orait." Jisas i lukim



FRANK MIHALIC i raitim

dispela strongpela bilip, na wantu em i stretim sik bilong wokboi.

Inap long tude olgeta taim ol Katolik i wokim misa, long taim bilong kisim komunio o yukaris, ol i save bihainim tok bilong dispela soldia: "Lod, mi no inap bai yu kam insait long haus bilong mi..." Olsem tasol na inap long tude mipela i save bihainim dispela gutpela tok bilong wanpela soldia bilong Nupela Nestamen.

Bipo yet, na i kam inap long tude, ol soldia na plisman i gat wok long helpim lo na oda long kantri bilong ol. Ol i mas sambai helpim ol gutpela sitisen bilong kantri, na mekim save long ol sitisen nogut. Bikos wok bilong ol i olsem, ol soldia na plisman yet i mas i stap gutpela man. Ol i no ken bel nogut na les long ol raskol i givim nem nogut long ol. Maski. Na tu ol i no ken les sapos ol sitisen i no save givim liklik tenkyu long ol hatwok bilong ol.

Long planti kantri ol soldia na plisman i save wokim olkain progrem we ol i pilai spot wantaim ol yangpela pipel. Ol yangpela i mas laikim ol plisman na soldia; ol i no ken pret tasol long ol. Ol soldia na plisman i mas stirim ol.

Santu bilong was long ol soldia na ol plisman em Santu Maikel, em wasangelo bilong Papua Niugini tu. Na i gat sampela moa santu bilong ol soldia na ol plisman. Em hia: Santu George, Ignas, Sebastian, na Martin. Na was santu bilong ol plismeri em Santu Joan.

Marimari Lutaren kongrigesen wok hat long bekim dinau

KEVIN BANA i raitim

MOSBI Marimari Lutaren kongrigesen i stat pinis long painim rot bilong kisim mani long bekim sampela dinau bilong Sios senta bilong Evanjelikel Lutaren Sios (ELC) Papua distrik.

Namba wan bung bilong painim mani i kamap long Me 23, long sios senta yet long Gordons. Liklik lain tasol i bin kamap tasol wok i bin kamap gutpela na ol i salim planti

kaikai na ol kol dring. Wanpela hetman bilong ELC Papua distrik, Mista Steven i tok ol bai yusim mani ol i kisim long bekim dinau bilong wara, pawa na rent we sios i gat long en.

"Bungim olgeta dinau bilong las yia i kam inap long dispela yia, dinau i stap olsem K10,000. Ol i bekim pinis K3,000 na narapela K7000 i stap yet," Mista Steven i tok. Wanpela hetmeri i go pas long dispela projek bilong painim mani, Susan Singawur i tok ol i traim tingting

bilong painim mani bilong bekim dinau na ol i painim olsem dispela wok i kamap gut tru.

"Mipela i tingting long mekim gen long narapela taim bihain na mi bilip olsem em bai bikipela moa long dispela mani mipela i bin kisim," em i tok.

Long dispela namba wan wok bilong kisim mani ol i mekim agir kaikai na salim wantaim ol dring long stoa. Ol i salim tu ol refol tiket long winim tupela lek bilong pik.

SDA helpim CIS - Buimo

BUSTIN ANZU i raitim

SEVEN De Misin insait long Lae Distrik bin go long Buimo Haus Kalabus long las wik Sande na givim moa long 10-pela bokis kolos bilong ol kalabus menmeri na ol pikinini.

Dispela presentasin i bin pulim olgeta mama bilong ol SDA sios insait long Lae Distrik we ol i bin kukim kaikai na karim i go long haus kalabus na givim i go long ol kalabus. Ol i givim 16 bokis kolos o yunifom i go long ol.

Presiden bilong dispela grup bilong ol mama Misis Nawen Ngnan i tok ol i bin stretim dispela lukluk

raun bilong ol las yia we ol i bin bajim ol samting olsem sop, gras, colgate na tawel samting na bin givim ol. Tasol dispela hevi bin stap yet olsem na ol i bungim mani gen dispela yia wantaim helpim bilong misin.

Presiden i tok olsem ol kalabus i gat bikipela wari olsem na em yet wantaim memba tu bilong em Mista Norma Kero i bin go pas long kamapim dispela bung we olgeta meri insait long sios i bin givim bikipela han tru. Insait long ol dispela 16 bokis i gat 1,638 kolos bilong ol kalabus.

Ol sios i bin kam em stat long 40 mail i kam daun na insait long Lae siti yet.

Hevi long Midel Ramu kisim helpim bilong Britis

BEN TAUMAI i raitim

BRITIS Hai Komisn i helpim ol pipel bilong Midel Ramu long Madang provins na givim ol 5-pela katen marasin na ol arapela samting bilong helpim ol sikmanmeri. Kos bilong ol dispela samting em K5,000 olgeta.

Hai Komisina Charles Drace Francis i bin ron i go long Wewak taim em i bin givim dispela presen long Ekting Edministreta bilong Madang provins Galung Kasas na Provinsel Disasta Dairekta Norman Philemon long ples balus. Bihain long Hai Komisina i givim dispela presen, em i kisim balus i go gen long Wewak.

Taim tupela bikman ya i kisim ol dispela presen, Mista Kasas na Mista Philemon i mekim bikipela tok amamas i go long ol pipel bilong Britis long harim singaut bilong Madang Gavana Jim Kas na givim dispela helpim.

Dispela em bihain long provinsel disasta opis i kisim ripot olsem ol manmeri arere long wara Ramu i wok long kisim sik bikos long bikipela ren i wok long pundaun na wara i tait long sampela wik olgeta. Bikos long dispela ol manmeri i no inap painim klinpela wara long dring na ol i wok long dring tasol dispela doti wara

bilong Wara Ramu na nau ol i bungim sik nabaut.

Mipela i amamas tru long dispela helpim na bai mipela i givim ol dispela marasin na helpim i go long provinsel helt opis long skelim i go long ol helt senta na sabhelt senta long Midel Ramu ilektoret, Mista Kasas na Mista Philemon i tok.

Mista Philemon i tok Britis Hai Komisn i bin namba wan lain long bekim askim bilong Gavana Jim Kas taim em askim long telefon long helpim ol wantaim ol kain marasin na helpim. I no longpela taim tumas na Britis Hai Komisn i bekim olsem ol bai helpim mipela. Na ol bai givim dispela helpim taim Hai Komisina i ron i go olsem long Wewak. Em bai stop long Madang na givim dispela helpim long ples balus.

Em i tok opis bilong em i no kisim wanpela helpim i kam yet long opis bilong Nesanel Disasta na Emejensi Sevis (NDES) klostu tripela mun olgeta nau. Em i bin salim ol askim i go long NDES tripela mun i go pinis.

Long nau yet em ino klia long wanem eksen opis bilong NDES i mekim bikos em ino kisim wanpela bekim i kam yet.

"Mi salim askim i go long opis bilong NDES na Britis Hai Komisn long wanpela taim tasol.

Na Britis Hai Komisn i bekim bek pas bilong mi na NDES i nogat",

Ol pipel long Midel Ramu i bungim hevi long dispela bikipela tait wara na ol kaikai long gaden tu i bagarap. Ol gaden i bagarap na dispela bai kisim sampela taim pastaim long ol kaikai i redi gen long gaden.

Em i tok opis bilong em i bin helpim ol pipel bilong Lwa Ramu pinis long givim ol 3,300 bek rais, flaua na wel bilong kukim kaikai. Em i tingting long raun long Aiome sampela taim neks wik long lukim ol hevi long Wara Ramu na harim wanem kain bagarap na hevi tru em ol pipel i bungim na i sot long en we opis bilong em i ken helpim. Sampela olgeta samting i go orait, opis bilong em bai traime long helpim ol manmeri long arere long Wara Ramu long Midel Ramu ilektoret i ong neks wik. Dispela em sapos NDES i salim mani ol i askim long en i kam.

Long nau yet, provinsel disasta opis i wok long yusim mani bilong hevi long bipo long Lwa Ramu na sampela olsem K25,000 bilong NDES long karim na skelim rais bilong Japan. Ripot i kamap long provinsel disasta opis i tok mak olsem 30 mameri i dai pinis. Tasol ol i no inap tokaut long as bilong dai.

COFFEE INDUSTRY CORPORATION LTD INDUSTRY AFFAIRS DIVISION

PRAIS LONG WANWAN WIK



Average prices (t/kg) as at:		09/06/98	Range	01/06/98 May -98	
ARABICA:					
Green Bean	Y1	363	360 to 370	394	392
(DIS LAE)	Y2	NQ	NQ	NQ	NQ
	X	395	380 to 410	427	422
	A	420	400 to 440	456	444
Parchment	Class 1	259	230 to 280	268	275
(Factory Door)	Class 2	247	220 to 270	248	256
	Class 3	239	230 to 240	253	243
Cherry (Factory Door)		56	50 to 58	62	61
ROBUSTA:					
Green Bean		NQ	NQ	285	289
Parchment		165	130 to 180	163	146
Cherry (Indicative)		40		42	42
NEW YORK "C" CLOSING		08/06/98			
Other Mild Arabicas					
US cents/lb		119.85		132.5	129.09
1 Kina = US\$		478		479	489
Toea/kg-					
Without discount/premium		552.77		609.84	582.05
With discount of 4c/lb		534.32		591.43	566.27
Y-grade	Gross f.o.b. Lae *(1)	534.32		591.43	566.27
Levy on (1)	(2)	91.00		91.00	91.00
Y-grade (Net f.o.b. Lae)	(1-2)	443.32		500.43	475.27
* Indicative					

MAKET TOKTOK

Long pinis bilong las wik, Niu Yok Kopi 'fiusa' prais i go daun long 9.5% long wanem sampela nius nabaut i no gutpela tumas. Kain nius olsem i no gat ais (frost) i kamap yet long Brazil, na Mexico i no kisim bikipela bagarap tumas long taim i no gat ren. Na tu nius nogut olsem kopi bilong Honduras i stap pinis long ol bakstua long Niu Olins (New Orleans) ol i glasim pinis, na olgeta stok i wankain gret.

Long PNG, prais bilong kopi i go daun liklik tasol i no go daun olsem ol prais bilong ovasis prais. Long ol faktori dua prais i bin go daun 3.4% insait long las wik, na K2.80 i stap namba wan prais long wan wan kilo.

Ol prais bilong f.o.b. em i as tru bilong prais bilong 'fiusa' prais wantaim kina ekseins reit i bung na kamapim f.o.b. prais, na prais bilong wan wan ekspota i no wankain.

AREA	PRAIS LONG OL FAKTORI DOA (t/kg) Wik i girap 01/06/98			CHERRY RANGE
	ARABICA		ROBUSTA	
CLASS	1	2	3	
NATIONAL	230 to 280	220 to 270	230 to 240	50 to 58
KAINANTU	250 to 270	-to 250	NQ	56 to 58
GOROKA	260 to 270	240 to 270	-to 240	NQ
KUNDIAWA	NQ	NQ	NQ	NQ
MINJ/BANZ	240 to 280	235 to 270	230 to 244	50 to 60
MT. HAGEN	-to 260	-to 260	NQ	NQ
WAPENAMANDA	NQ	NQ	NQ	NQ
LAKE	-to 260	-to 240	NQ	NQ
ASEKI	-to 230	-to 220	NQ	NQ
MUMENG	NQ	NQ	NQ	NQ
WAU/BULOLO	-to 240	-to 220	NQ	NQ
WASU	NQ	NQ	NQ	NQ
MADANG	-to 270	-to 240	NQ	130 to 160
EAST SEPIK				170 to 180
Robuster cherry				40

- Notes:**
- Dispela stal CIC Ltd. Industri Afes Divisan i wokim long soim ol Prais long wanwan wik.
 - Ekseins Reit. Long prais bilong US\$ wantaim kina PNGBC iet kolim pei long kina wantaim US\$ long Mande long wanwan wik.
 - 1kg = 2.20462 lb
 - Prais bilong kofi long dispela wik ikam long prais bilong ol espota na prosesa long Monde wantaim prais bilong ol 'future' prais long las Fraide.
 - Long kisim save moa long dispela telefonim CIC Industry Affairs Division long telefon numba 732 1266.

SBDC helpim yu wantaim ol liklik wok bisnis

Bisnis i save kamap olsem wanem?

I nogat isi ansa long dispela kwesten.

Ol bisnis i save gat wanpela samting i wankain long narapela. Wanwan bisnis i save wok long kamapim prodak olsem guds na save na salim long liklik skel o mak tasol.

Ol riteila, olsem piksa, bai wok tasol long salim wanpela kain samting olsem; kaikai o kolos o bilding saplai, o ol arapela samting. Bai yu no inap lukim tumas wanpela stua i salim taia bilong ol ka na kolos bilong ol meri. Ol dispela kain samting i no wankain long narapela. Yumi ken tingim tasol stua we i ken salim kolos bilong ol man na meri.

Long faktori, yumi painim wankain samting. Faktori i save wokim wanpela kain samting we i wankain tasol. Yu no inap lukim faktori i wokim sof dring na sem taim prinim ol skul buk.

Long ol ekstretiv industri, bai yu no inap lukim tumas ol lain i save wokim bot bilong pulim pis na somil wantaim. Dispela tupela wok i no wankain tru long narapela.

Long ol toktok mipela i tokaut pinis; em i mas klia olsem wol yumi stap long en em ples bilong ol manmeri husat i save long mekim wanpela wok bilong ol stret. (speselist). Dispela em ol manmeri husat i save mekim wanpela kain wok na samting tasol. Ol i save wokim na salim wanpela kain samting tasol. Dispela em ol i kolim spesialisasi o speselis lain. Yu ken lukim dispela long ol bisnis we man i speselais long wanpela kain wok bilong em stret.

Kain olsem, ka woksap i kisim foapela wokman. Ol bai brukim wok i go olsem:

- wanpela man bai salim



yumi sampela samting olsem:

- makim mak bilong kamapim siot,
- katim raunim dispela mak,
- samapim siot wantaim,
- samapim ol baton i go antap,
- bungim ol siot redi long salim.

Wanwan wokman i ken kisim wanwan wok bilong mekim. Taim yumi brukim ol wok olsem, bikipela lain wokman i ken mekim ol liklik hap wok bilong ol long kamapim samting.

Dispela em ol i kolim divisen ov leba (division of labour). Rot bilong divisen ov leba i save mekim long kamapim planti samting olsem guds na sevis i gutpela long lukluk moa i go insait.

I gat tripela isi tok klia long dispela.

1. Bikos woka i mekim wanpela wok tasol planti taim, em i save na klia long mekim samting na em i ken mekim kamap planti samting.

2. Bikos woka i no inap senis long wok i go long narapela, dispela i sevim taim we woka i ken stap na mekim planti samting moa.

3. Taim woka i save gut moa long wok bilong em, em i ken kamapim sampela moa isi na gutpela rot bilong mekim wok na sampela taim em i ken kamapim sampela kain mesin bilong mekim wok wantaim. Dispela i helpim em tu long mekim moa.

Bikipela hevi long divisen ov leba em olsem woka i no save kamapim les long wok. Bikos em i save mekim wanpela kain wok tasol olgeta taim na wok bilong em i no kamapim amamas long em. Woka husat i save mekim wanpela kain wok tasol i no save amamas olsem em i mekim gutpela wok. Bikos long dispela woka, i no save wari tumas long wok bilong em na i save lusim wok maski em ino sik tru.

petrol,

- wanpela man bai stretim na fiksik ol ka,

- wanpela man long senisim ol wel na putim gris long ol ka,

- wanpela man long lukautim rekot bilong bisnis.

Taim wanpela bisnis i mekim dispela, ol i kolim bisnis ya i speselais long yusim ol leba bilong en.

Aidia bilong wanpela man i mekim wanpela wok bilong em stret i kamap olsem bikipela samting long bisnis, kain olsem ka manufeksaring plents we i save mekim planti kain kain wok o prodaks.

Bilong wanem na spesialisasi em bikipela samting long bisnis?

Dispela inap kamap klia sapos yumi lukim piksa long bisnis bilong mekim prodak stret. Tingim faktori i kisim 5-pela wokman stret. Dispela bisnis i save wokim stretim ol siot. Em i no save mekim narapela samting. Em i isi long brukim dispela faktori long tupela rot.

- Wanwan woka i mas wokim na pinisim wanpela siot olgeta.

- Wanwan woka i ken mekim wanwan hap bilong kamapim wanpela siot.

Lukluk gut long wanem kain rot ol woka inap skelim ol wok bilong wokim siot, inap givim

Wansolwara Nius

Samoa:

Samoa i bin namba wan kantri long Pasifik rijon long kism indipendens na long las wik, em i makim 36 krismas long dispela samting.

Bihain long namba wan Wol Wo, Nu Silan i bin lukautim Samoa na long yia 1962, ailan kantri ya i bin kism indipendens.

Planti tausén pipel i bin bung long Apia, biktaun bilong Samoa long amamasim indipendens bilong ol. Gavman i bin makim tripela de long ol pipel i amamasim 36 krismas long bikde bilong ol. Samting olsem 5,000 pipel i bin stap insait long wanpela mas, ol danis na singsing tumbuna. Long dispela taim tu, ol i opim namba wan preia tempel long kantri we i kism \$US 370,000 long sanapim.

Praim Minista Tofilau Eti Alesana nau wantaim 73 krismas em i stap longpela taim tru long gavman. Em i statim wok olsem wanpela palamen memba taim kantri i bin kism indipendens long 1962. Gavman long Samoa i go gut tasol na insait long ol yia em i kism indipendens, em i no bungim wanpela bikpela hevi yet.

Long las yia, Samoa i opiseli kism bek olpela nem bilong em bihain long ol i save kolim long Westen Samoa long wanem ol no laik miksim wantaim Ameriken Samoa, narapela hap long ol ailan long Samoa, tasol Yunaitet Stes i lukautim.

Port Villa, Vanuatu:

Minista bilong Lens long Vanuatu Silas Hakwa i singautim ol pipel long lukautim envaironmen nau na ol pikinini na tumbuna i kam bihain i ken yusim ol dispela samting tu.

Mista Hakwa i mekim dispela toktok long Pot Vila taim em i opim envaironmen de wik. Em i tok bikos graun na ol risosis i sot long ol liklik ailan, planti pipel i wok long mov i go nau long taun.

Em i tok sapos i gat inap risosis na ol samting long ol ruel eria, ol pipel bai stap na ol i no inap tingting long go long taun. Em i tok kandim bilong ol pipel long taun i wok long go antap long olgeta krismas long 7 pesen mak.

Melbon:

Presiden bilong Frans Polinesia Gaston Flosse i tok Frans i wanbel long sindaun na toktok wantaim ol ailan lida long givim moa pawa i go long ol ailan kantri long Pasifik we em i bosim.

Flosse i bin bungim Praim Minista bilong Frans, Lionel Jospin long Paris. Em i tokim ol niusman olsem i no long taim ol toktok long givim moa pawa bai stat.

Gavman bilong Frans i no wokim moa toktok long dispela.

Long planti yia nau, Flosse i strong long Frans i givim moa pawa i go long ol ailan kantri we em i lukautim. Em i skruim gen tingting bilong em long dispela samting bihain Frans i bin sainim wanpela agrimen las mun wantaim Nu Kaledonia bilong givim moa pawa long dispela ailan teritori.

Presiden bilong Frans, jacque Chirac las wik i tok em i sapotim pasin long givim moa pawa i go long ol ailan teritori, wankain olsem dispela we em i givim long Nu Kaledonia.

Pot Vila, Vanuatu:

Planti tok egens long ol kantri long wol i sut long Pakistan na India long karimaut nuklia tes o tes pairapim ol bosin bom.

Praim Minista bilong Vanuatu Donald Kalpokas i no amamas long pasin we tupela kantri husat i stap long Esia-Pasifik rijon i wokim long go egensim sanap bilong wol

komyuniti we ol i laik stapim pasin bilong karimaut nuklia tes.

Long wanpela stetmen, Mista Kalpokas i tok klostu yumi kalap long yia 2000 na ating yumi kism ol rong tingting olsem bai sindaun long wol i go gutpela, wantaim nogat ol birua tumas, pait namel long ol kantri. na planti moa kantri i sainim ol tok orait pepa long stopim nuklia tes long wol, Mista Kalpokas i tok.

Praim minista i tok pasin we Pakistan na Indai i wokim em i no luk gut long intenesenel komyuniti. Em i tok Vanuatu i egensim pasin bilong karimaut ol nuklia tes, wokim, salim, sipim na lukautim ol masin we i sut long nuklia tes.

Mista Kalpokas i singaut long

India na Pakistan long stopim ol nuklia tes kwiktaim.

Nu Silan:

Bihainim rivyu long las yia we sampela gavman opiseli i mekim, Nu Silan Foren ministri i katim baset mani we i save gviim long helpim operesen bilong Redio Nu Silan Intenesenel (RNZI) long 13 pe sen.

Olsem na stesen bai katim sampela progrem na tu rausim sampela wokman bilong em.

Gavman i givim tasol \$US600,000 long redio RNZI. Dispela mani mak em i go daun na long ol ripot, stesen bai i stopim ol sampela progrem we i save karimaut long ol tokples bilong sam-

pela ailan long Pasifik.

Taim ol opiseli i karimaut rivyu, wanpela rot we ol bin lukluk long em em pasim stesen olgeta.

Toksave long dispela samting i kamaut long wankain taim stesen i winim awod long gutpela wok manesmen bilong em.

Tonga:

Lida bilong Katolik Sios long Tonga, Bisop Soane Foliaki i tok strongpela na gutpela famili bai i kamapim gutpela sosaiti.

Bisop Foliaki i wokim dispela toktok long opiseli opening bilong famili wik long kalenda bilong Katolik Sios long Tonga we i bin stat long las Sande, em Pentekos

Sande na bai pinis long Trinit Sande, Jun 7.

Bisop Foliaki i tok tingting long holim famili wik em long sanapim gutpela famili we i stap wantaim na ol i bihainim gutpela kristen pasin.

Em i tok visin bilong sios long kalap i go long yia 2000 em long larim pawa bilong Holi Spirit i go insait long tingting bilong ol pipel na ol ken senis long kamap gutpela.

Bisop Foliaki i tok sapos nogat Holi Spirit i stap long stiaim man, sios bai no inap stap yunaitet na ol kain hevi long famili, komyuniti na sosaiti bai go nogut moa.

Fiji:

Gavman bilong Fiji na Australia i karimaut ol toktok long kamapim wanpela agrimen we tupela bai sainim long wok bung wantaim na daunim ol hevi long bagarapim ol pikinini na ol arapela bikpela rong moa olsem.

Hai Komisina bilong Australia long Fiji, Greg Unwin i bin tokaut olsem long taim em i opim wanpela bung long toktok long ol hevi we i sut long bagarapim na wokim ol pasin nogut long ol pikinini insait long Pasifik rijon. Ol i holim bung long toktok long dispela samting long Nadi, Fiji na ol bikman i makim ol kantri long Pasifik i bin stap insait long en.

Mista Unwin i tok dispela agrimen ol i laik kamapim bai wankain olsem dispela we Australia i gat wantaim Filipins. Dispela i bilong lukautim ol pikinini husat ol i kism ol long wok na tu bagarapim ol.

Mista Unwin i bin tokim ol lain long bung we i karamapim ol gavman opiseli, lain long turis indastri na ol pikinini weltea grup olsem em i moabeta long glasim gen ol lo we ol kantri i gat long lukautim raits bilong ol pikinini long ol kain bagarap na pasin nogut. AusAID i bin sponserim dispela tupela de konprens.

Niue:

Haus kalabus long Niue long palnti yia i bin stap nating bikos ailan i bin stap olsem wanpela gutpela ples we nogat bikpela trabel o birua i kamap long ples, komyuniti na kantri. Long nau, haus kalabus i klostu pulap. Liklik haus kalabus i gat sevenpela rum tasol nau i gat sevenpela kalabus lain long en.

Ol ripot i tok nau ol kain hevi we i kamap long ausait i wok long go insait tu long liklik ailan kantri, Niue. Moa yet ol i holim ol man i dring spak na draiv na kalabusim ol. Plis i wok long kism ol ripot long pait na ol kain hevi olsem we bipo Niue i nogat long ol.

Melbon, Australia:

Gavman bilong Australia i bin tokaut olsem em i ken stapim balus kampani bilong PNG, Air Niugini na tet level ealain, Milen Be Air bilong flai i go long Australia bikos ol i wari long sefti rekot bilong ol.

Trenspot Minista bilong Australia, Mark Veil i tok bihainim sefti ripot we Sivil Aviesen Sefti Atoriti bilong Australia (CASA) i kism na galsim, em i painim sampela asua long dispela tupela balus kampani.

Minista i tok rekot bilong tupela balus kampani long no wokim samting kwiktaim long stretim ol aus along ol balus bilong ol i no gutpela tumas.

Ripot i tok PNG Sivil Aviesen opis i kism dedlain inap long Jun 10 long mekim samting long ol wari bilong CASA. Na sapos nogat gutpela samting i kamap, Mista Veil i tok em ken saspensim setifiket bilong operesen long tupela kampani bilong flai i go long Australia.

Atoriti i stapim Shields olsem drag saspek

Brooke Shields em i biknem muvi ekta bilong Amerika na long ol dispela husat i gat televisen, em i save kamap long EM TV progrem, "Suddenly Susan".

Tasol long las wik, ol kastoms opisa long Nice intenesenel ples balus long Frans i bin stapim em long sekim ol bek na kago bilong em bikos ol i saspek olsem em i gat sampela kain smok na marasin nogut. Ol pasindia bilong Air France i bin wet long tupela awa olgeta taim ol plis na kastoms opisa i sekim olgeta kago bilong Brooke.

Brooke i bin stap insait long wanpela bikpela festivol bilong ol singa na ekta long Frans ol i kolim long Cannes film festivol. Bihain long festivol i pinis, em wok long go long lukim man bilong em, biknem tebol tenis sempion Andre Agassi taim ol atoriti i holim em.

Tasol taim em i kamap long Nice ples balus, Brooke i luk olsem tasol biknem na naispela stail Holiwud muvi ekta. Em i putim wanpela stail blekpela dres, dak glas na em i givim gutpela smail long ol potografu husat i amamas long kism piksa long en. Tasol kirap nogut taim ol kastoms opisa na plis i sekim ol bek samting bilong Brooke. Ol lain long Holiwut i kirap nogut tru long dispela samting bikos Brooke em i wanpela strongpela kempeina egensim drags olsem ol steongpela smok na marasin nogut.

Brooke husat i gat 33 krismas em i save laik stap kliia long ol trabel na pasin nogut i gat nem olsem meri bilong wokim eksasais na sempion long ol kempein bilong daunim ol hevi bilong drags. Em bin laik kalap long Air Frans balus we i go long Paris taim ol atoriti i stapim em long ples balus.

Papa bilong em i tok em i hat long bilipim olsem ol i holim em long dispela rong bikos Brooke em i egensim ol drag na em i strong long karimaut ol kempein egensim drags.

Wanpela long ol muvi we Brooke i bin ekt na kism biknem long en em Blue Lagoon. Nau em i ekt long televisen piksa Suddenly Susan na em i kism \$US2.6 milien long wanpela yia.



• Piksa long biknem stailmeri ekta Brooke Shields long Cannes film festival, Frans, bipo ol atoriti i stapim em long saspek long drags long Nice ples balus.

Ol plis na kastoms i bin holim em taim em i wokabaut, i go abrusim sekyutiti sek long Nice ples balus.

Plis i no givim ripot bilong ol yet bihain ol i sekim ol bek samting bilong Brooke.

Piksa na stori i kam long Daily telegrap.



Ofis bilong Memba bilong Usino-Bundi Hon. GEORGE WAN, MP

NAMBA-3 APEC Ministerial Miting bilong Telekomunikesin na Infomesin Indastri (TELMIN 3) i bin kamap long Singapo long Jun 3 i go 5. Man husat i bin makim PNG long dispela miting em Hon. George Wan, Vais Minista bilong Komunikesin, Mista H Iduhu, ekting dairekta bilong Infomesin na Komunikesin, Mista P. Aeava-Aia, Dairekta Jeneral na narapela sinia wokman bilong PANGTEL husat i makim Nesenel Gavman. TELIKOM PNG LTD aninit long Bod Siaman, Ben Micah na Menesing Dairekta Mista Lalatute Avosa i bin makim indastri.

Ol disisen bilong TELMIN 3 i bin lukluk long wanem ol rot Asia-Pasifik Ekonomik Koperesin (APEC) memba ekonomi i ken bungim ol salens we i kam wantaim ol bikpela senis long said bilong telekomunikesin, kompiyuta na brodkasting na wok wantaim long na kamapim gutpela wok long go pas long developmen bilong Global Infomesin Infrastraksa (GII).

Ol Minista lukautim Komunikesin, ol indastri lida na ol lain wokman bilong olgeta APEC ekonomi i bin lukim long pes bilong ol stret ol gutpela samting we ol i bin soim long dispela gro bilong Asia-Pasifik Infomesin Straksa (APII) na toktok long ol kain rot we i halivim long bringim ap ol dispela samting insait long ol memba kantri. Ol dispela samting ol i soim ples klia i stap long eria bilong lainim samting we i stap longwe, telemedisin, telekompiyuting na namba wan taim ol i sainim wanpela Memorandum ov Andastending (MOU) namel long gavman bilong Singapo, Yunaited Sted ov Amerika (USA) na Kanada.

TELMIN 3 i bin lukim tu endosmen bilong namba multilateral Mutual Rekognisen Agrimen (MRA) long Konfomiti Asesmen bilong Telekomunikesins Teminol Ikiupmen we i soim

konfomiti asesmen wok, rausim ol samting we i pasim teknikal samting na karimaut wok namel long ol memba. I bin gat planti bikpela toktok long wanem rot ol memba kantri ken wok wantaim long developim na promotim bisnis bilong ilektronik insait long ol APEC memba kantri.

Insait long dispela miting ol lida insait long praivet sekta insait long indastri i bin kisim tok-orait long nambawan taim tru long stap insait long APEC Ministerial Miting na long toktok na bung wantaim ol Minista na save gut long ol bisnis we i go wantaim maket bilong telekomunikesin. Ol lida i bin gat sans long stap insait long ol toktok long ol bikpela developmen insait long komunikesin na infomesin indastri, ol bikpela salens we i bungim indastri na ol rot we i ken bringim ap wok-bung namel long gavman na indastri insait long eria bilong polisi na regulatori.

Hon. George Wan i bin kisim sampela taim long toktok long ol hevi we i bungim ol developim memba kantri long kisim dispela kain laiberaid environmen na tu em i givim sampela rot we i ken bungim dispela ol kain hevi. Hon WAN i givim tu ol samting na wok long redim 18th Telekomunikesin Working Grup Miting long Mosbi long Septemba na em i askim ol narapela wanwok minista, ol deleget na ol lain bilong indastri long kam long dispela miting.

Dispela Namba-3 Ministerial Miting i bin pas taim ol i kisim "Singapo Dekleresin" we i lukim long ol rot na plen bilong Telekomunikesin Working Grup insait long narapela tupela yia.

HON. GEORGE WAN, MP

Vais Minista bilong Komunikesin.

L A I P S T A I L

KANAGE



Paps Kanage i wok long skulim junia long pasin bilong maritim meri bilong narapela ples. Em i kirap na tok, "pikinini yu no ken maritim meri Papua bikos ol i dia tumas na yumi nogat mani bilong baim ol. Yu noken maritim meri Tolai bikos em bai i no inap stap longpela taim wantaim yu na em bai ronawe. yu noken maritim meri Nu Ailan bikos em meri Karanas na em bai pulim yu go long ples bilong em olgeta. Na yu no ken maritim meri Kombe bikos ol tambu bai pulap olgeta taim long haus bilong yu. Na las tru, yu no ken maritim meri Sepik bikos taim meri bilong yu i karim pikinini man, em bai i bikhet nogut tru". Junia harim na askim paps Kanage, "paps, yumi bilong we, Kimbe o Sepik?". Paps Kanage tok, yumi bilong Oil Pam Kantri. Taim junia harim olsem em tok, "paps, tasol mi save lukim yu raitim long sios o kona bilong palang nabaut yu save raitim, manki PS, Sepik anytime, how bai yu save?". Paps Kanage kirap na tok, "nogat, dispela em bilong giamanim ol Sepik tasol".

Ted Cruz
PO Box 845, Kimbe,
WNBP

**WINA BILONG DISPELA WEEK EM
TED CRUZ
KIMBE, WNBP**

SAPOS yu ting yu gat wanpela gutpela pani stori, orait katim hap pepa long fran pes i makim, "Mutrus Kanage bilong dispela wik" na salim wantaim stori bilong yu i kam long Wantok Nuispepa, PO Box 1982, Boroko, NCD. PNG.

Putim nem na adres bilong yu long pas na bai yu gat sans long kamap wina bilong "Mutrus Kanage bilong dispela wik" na winim wanpela praiz. SANS, YAH!



Stori na nem bilong yu bai kamaut long wanwan wik so noken lus tingting long baim Wantok nuispeps na painimaut! SEKIM NEM BILONG TUPELA ARAPELA WINA LONG PES 13 NA 18

Lapun Kanage i go raun long Madang long lukim yangpela brata bilong em. Em i go stap wantaim brata long Madang na wanpela wiken em raun long Madang taun. Baga nogut pulim long jin na takim siot na dak speks tu na spinim long Madang taun i stap. I no longtaim na em i lukim wanpela yangpela meri Madang i kam i go na em saitim na wisel long meri ya. Taim meri ya i tanim na lukim em bikmaus long Kanage na tok, "laoun na wip yet". Taim Kanage harim olsem em gounim sem i go daun long bel na bekim isi tasol long meri Madang, "sori tru yangpela, maski ai bilong yu i trikim yu long skin-tasol. Yu ting i lapun tasol bun bilong haus i no pundaun yet". Meri Madang harim na pinisim olgeta spit long dispela hap rot na go lus pinis long Nabassa strit.

Joel Wangs (NAMBA TU WINA)
Maprik

MOA KANAGE - PES 12

SAPE METTA i raitim

BISNIS em i wanem samting? Bisnis em i bisnis na planti man na meri long kantri bilong yumi Papua Niugini i save gut tru long wei bilong wokim na ronim bisnis.

Wanem kain ol bisnis? Yes, ol bisnis olsem ronim tred stua, supamakot, haus kaikai (kai ba), na planti ol arapela kain kain bisnis we i save pulim planti mani.

Ol arapela bisnis tu long sait bilong faming tu i wok long go het strong insait long kantri bilong yumi em growim kopi bisnis, kakao, kopra, kadamon, spais na ol arapela bisnis bilong lukautim kakaruk, pato, sipsip, pik na ol arapela samting bilong salim na kisim mani.

I tru olsem bisnis bilong laip bai i go het yet, tasol tingim sapos yumi dai, wanem samting bai ol i wokim bihain tasol long dai bilong yumi? Yes, namba wan samting ol lain bilong yumi bai stat long painim em kofin boks, long wanem bodi bilong husat i dai long en i mas i go insait long kofin boks na bihain bai ol i karim i go na planim i go insait long graun.

Bipo tru long taim bilong ol tumbuna, ol i no save long kofin boks, na ol i save yusim ol kainkain samting olsem skin na lip bilong ol diwai na ol arapela samting nabaut we ol i lukim olsem em i orait long karamapim ol dad bodi na planim ol long matmat. Na planti taim ol i no inap yusim wanpela samting na ol i save planim ol dad bodi and nating i go insait long graun.

Tasol dispela ol apsim i senis nau na kofin boks i teko-va, olsem na long nau yet ol lokol kapenta man i wok long wokim ol kofin boks na i wok long salim yet. Ol i mekim olsem na i kamapim dispela tred olsem bisnis bilong ol.

Nau yet wanpela man bilong ples Kuru maunten long Isten hailens em Asaga Anupa i wokim dispela bisnis bilong wokim na salim ol kofin boks insait long Goroka taun.

Dispela kofin boks kampani bilong Asaga em i kolim Kuru Kampani. Na Asaga wantaim ol wokman bilong en i gat kainkain wei bilong wokim ol stail kofin boks.

Ol i save wokim ol kofin bilong ol liklik bebi na i go antap long ol bikpela man na meri na ol lapun tu.

Ol i ken wokim ol kofin long stail bilong kanu na ol arapela stail tu we i gat glas na putim ol matres na pilo na mekim i kamap eva redi long putim ol dad bodi i go insait na planim long matmat.

Na sois bilong ol kofin boks em ol Kuru Kofin Kampani i save wokim em i stat long 2 fit na i go antap long 6 fit na prais bilong ol i stat long K35.00 na i go antap long K1,000 Asaga i tok insait long wanpela wik ol i save wokim 6 i go antap long 10-pela kofin boks we ol i ken salim tu dispela kain namba long wan wik.

Em i tok Kuru Kofin sop i stap long Mambu maket na ol i



• Kuru Kofin Kampani menesa Asaga (rathan) i sanap wantaim tupela stail kofin boks em i wokim.

Wokim kofin boks em bisnis

save op long Sande i go na pasim long Fraide apinun.

Asaga i tok planti taim bihain long ol i save pasim kofin sop, ol man na meri i save i go daun long haus bilong em long Genoka setelmen klostu tasol long Goroka taun na singautim em long baim ol kofin.

Sampela taim dispela pasin i save kamap long apinun na planti taim em long bikman.

Em i tok insait yet long Goroka taun i gat samting olsem 8-pela arapela kofin sop we i wokim dispela binsis bilong wokim ol kofin boks na salim.

Tasol em i tok, Kuru Kampani i wokim ol gutpela kofin boks wantaim kainkain stail na bilas, na tu prais bilong ol i go daun tru.

Asaga i tok sapos husat i laikim gutpela kofin, sekim Kuru Kofin sop dambib long Mambu maket.

KANAGE



Kanage kisim olgeta mani bilong misis Kanage na go pilai kas. Ol i pilai i go tulait na Kanage lusim olgeta mani na go long haus. Taim em kamap hapwe rot yet, misis Kanage i lukim na bikmaus, "em nau, karim i go salim na kas pamim em na em karim hangre bel i kam long haus na husat bai givim em kaikai?". Kanage sem nogut long dispela toktok bilong meri bilong em na i go sindaun isi tru long haus na slip stretim ai long rum.

Bobby Melchior (Namba 3. wina)
Wewak

Kanage i pul long Kanage i go long Wara Sepik long nait. Em pul na singim feveret song bilong em, "pukpuk yu kaikai em na pukpuk yu holim em na pukpuk bai yu larim em i go". Em singsing na pul i go na i no long taim em i lukim stret wanpela bikpela hap diwai i drip long wara i kam. Taim Kanage i lukim dispela, em i ting pukpuk tru i kam long brukim kanu bilong em. Kwiktaim tru Kanage i rives long kanu na singim, "Jisas yu namba wan, Jisas yu namba wan, . Kanage ting pukpuk i kam long kilim em nau na em i statim singsing bilong lotu.

Paul Aks
Wewak

Kanage wantaim ol manki bilong ples i wetim pmv long Sagalau maket long Madang. Ol i laik go long Bogia. Wanpela waitman i ronim ka i kam na Kanage i tromoi han na waitman ya i stapim ka. Waitman ya i nupela man tu long Bogia olsem na em i oraitim ol boi long kalap wantaim em. Kanage i kalap na sindaun sait wantaim waitman ya na olgeta boi i sindaun long beksait. Ol i ron long ka i go na waitman i askim Kanage, "how far is Bogia?". Kanage tromoi het i go ausait na tokim ol boi, "yupela holim strong ain, bos bai spit ya". Orait ol i ron i go gen na waitman i askim Kanage gen, "how far is Bogia?". Na Kanage subim het i go ausait na tokim ol boi long beksait, "bos tok, yupela holim tait nau bikos em bai spit nogut tru". Taim waitman ya i harim olsem em bikmaus na tokim Kanage, "you son of a beach". Na Kanage tok, "yes, taim yumi tanim long kona bai yu ken lukim ol manmeri i sanap long bris i stap". Waitman i kaikai tit olgeta na rausim Kanage na ol bois bilong em long hap rot na em yet tekov i go long Bogia.

Petrus Piangu
Madang

Kanage wantaim liklik boi bilong em i sindaun arere long Wara Simbu na stori i stap. Tupela sindaun stori i stap na junia Kanage askim, "paps, mi kam long we?". Kanage i harim na painim hat tru long bekim dispela askim. Tasol bihain em tokim junia olsem, "pisin i kam tromoi yu taim yu liklik bebi yet na mi wantaim mama bilong yu i go kisim yu. Pes bilong yu i wankain olsem mi, olsem na mitupela mama bilong yu i kisim yu na givim hot ti na yu save dring inap yu bikpela". Tasol junia i krai na tokim paps Kanage, "yu lukim manki i sindaun long hapsait stori ya,



em bilong Sinesine". Taim paps Kanage i harim olsem em sem nogut tru long mekim giaman stori long pikinini bilong em. Tasol em bekim na tok, "yu bilong Gembolg".

Peter Amindi
Goroka

Kanage i save wok long wanpela stua long Wewak. Wanpela taim em i spak nogut tru na bos bilong i askim Kanage long em i dring wanem na spak. Tasol Kanage i kirap na tokim bos olsem, bos mi dring SP, yu save long SP, em dring bilong yumi Sepik stret. SP em Sepik Pipel o Sepik provins 1 o Sepik Provins 2 na Saut Pasifik. Saut Pasifik em namba 3 provins bilong yumi ol Sepik Pipel we fektori bilong SP i save kam long en olsem na mipela Sepik i no save givim sans long holim em. Dispela toktok bilong Kanage mekim na bos bilong em i paul olgeta.

Pais Kelly
Aitape, Is Sepik provins

Wanpela taim Kanage i bin stap nogut tru na i go long nait lotu. Em i sindaun klostu wantaim meri bilong em na harim pasto i autim tok i stap. I no longtaim em kirap lusim ples bilong lotu na i go bek long haus bilong em. Haus i no longwe tumas long ples lotu. Taim Kanage i go bek long haus, em i kilim skin long krai i stap. Taim meri bilong em i harim olsem em i wok-abaut i isi i go long haus na askim Kanage, "yu olsem wanem na krai i stap. Yu krai na ol manmeri i no harim gut toktok bilong lotu?". Kanage krai wantaim na tok, "dispela pasto i wok long sutim tok long mi tasol. Olgeta toktok em i autim i wok long sut long mi tasol na i no olgeta manmeri. Olsem wanem, mi tasol mi sin man bilong dispela ples ah?". Ol manmeri i harim na kilim skin stret long lap indai.

Hox Amos
Para, Morobe provins.

Kanage em kela man tasol em i save werim hat olgeta taim. Wanpela taim em kisim ka long ples na i go long Wewak. Long rot, em bamim wanpela pik bilong ol lain namel long Passam. Long apinun Kanage ronim ka i kam bek na em tingim pinis trabel em i mekim olsem na em rausim hat long het bilong em na haitim aninit long sit bilong ka. Taim ka i kamap long dispela ples, ol manmeri i stapim ka. Wantu Kanage stapim ka na askim ol, "yupela tu laik go long Angoram a?". Tasol ol tok, dispela ka tasol i kilim pik bilong mipela long moning". Ol i no luksave moa long Kanage bikos ol i luksave olsem em i kela man. Nau Kanage tok, "em stret, olsem na draiva i go lusim ka long mi na askim mi long ronim ka i go bek long Angoram". Em tok olsem pinis na statim ka na tekov i go olgeta long ples.

Robin Tuma
Wewak

Kanage em wanpela bikman bilong haus lotu long ples. Tasol wanpela taim em i bin go lukim susa bilong em long Koroba long Sauten hailans. Long hap em bungim wanpela yangpela meri na tupela save pren hait. Tasol ol yangpela i lukim pinis. Kanage i bin go bek stap olsem tupela mun pinis long ples. Wanpela taim Kanage i go autim tok long Koroba, na ol manmeri i kam bung. Long dispela taim tu pren meri bilong Kanage i kam. Orait taim Kanage autim tok i go na tok, "noken stil, noken pait, noken giaman, noken pamuk". Na ol yangpela boi i harim na lap na tok, "i no mipela tasol, Agnes tu". Sem taim Agnes i sanap na poinim han long bel bilong em na tok, "na dispela em bilong husat na yu laik haitim?". Na Kanage tok, "samting bilong ausait em bilong ausait. Na samting we i stap insait em bilong insait" Em tok olsem pinis na wokabaut i go ausait na lotu i pinis.

Reuben Ika Sharu
Kokopo

Long bipo taim, wanpela pasto i save autim tok long ol manmeri long lotu. Na em i save taim long mekim ol manmeri i bilip wantaim sampela kain sain o mirakel. Dispela em long mekim ol manmeri i bilip long toktok em i autim. Em i save mekim plen wantaim wanpela wokman bilong em na em save redim paia karasin i stap. Taim em i autim tok i go na tok, yupela laik lukim samting tru ah, orait bai wokman bilong em i slekim masin long karasin na paia i save lait. Ol manmeri i save bilip na pulap tru long haus lotu. Wanpela taim em i laik autim tok long haus lotu. Em mekim i go na kirap tokim ol manmeri, "nau yupela laik lukim mirekol ah?". Em nau em mekim eksen tasol paia i no lait. Em harim ya wokman i tok isi long beksait olsem, "sori pasto, karasin i pinis. Mi traim pispis insait tasol paia i no kamap".

Lawrie
Brisben, Australia

Kanage i man bilong slip long haus meri. Meri bilong em na ol meri i save ronim em tasol em ino save harim tok. Tasol em i save mekim ol mauswara na ol meri i save givim sans long em na em slip olgeta taim. Wanpela taim ol meri askim em long katim paia wut i kam long haus. Tasol long apinun, misis Kanage lukim olsem nogat pawa wut olsem na ol meri i kukim kaukau na ol yet i kaikai. Taim Kanage hangre na kamap long apinun, em askim long kaikai na ol meri tokim em, paia wut we. Kanage sem wantaim na tekov i go long wanpela gaden na stilim kaukau i stap. Tasol narapela man husat tu i go long stil i lukim em na ronawe na Kanage ting papa bilong gaden i ronim em olsem na em tu bikmaus na ronawe i go long hausman na slip hangre i go tulait.

James Buakao
Minamb Enga

CIS sajen givim edvais long ol yangpela opisa

FELIX RAMRAM i raitim

YUMI MAN i save tok olsem papamama tupela i nambawan tisa bilong ol pikinini laga? Wok bilong 2-pela em long skulim pikinini. Long laip bilong ol wokman bilong gavman na olsem tu insait long ol praivet sekta kampani. Ol olpela wokman husait i pilim gutpela na nogut bilong wok em i bin mekim long taim ol i laik pinis long wok, ol tu i lukim ol yet olsem ol i papa na mama bilong ol yangpela husait bai i stap long wok.

Ekting Gavana Mista Patrick Muliale long 24 Epril i tokaut long ai na harim bilong moa long 100 manmeri na pikinini. Husait long ol i bung wantaim ol woda wanwok na meri pikinini bilong ol long lukim pinis bilong Sajen 2609 Andrew Mopi i ritaia i tok olsem: "Ol woda long wok ol i mas mekim - ol i save mekim dabol wok, we i narakain long ol narapela wokmanmeri. Bikos nambawan wok ol i mas mekim em long bihainim "Tok Promis" ol i mekim long sevim Stet bilong PNG. Na nambatu wok bilong gol em long lukautim, sem taim givim gutpela skul long ol kalabus lain. Long kamap ol gutpela manmeri insait long komyuniti bilong ol taim ol i pinisim taim bilong ol long banis kalabus. Antap moa em komitmen na disiplin em Sajen Mopi i soim ol bos bilong em. Na kaikai bilong dispela Mista Mopi i pinis wok wantaim renk bilong Sajen."

Yes, long dispela gutpela moning bilong Fraide 24 Epril long ai bilong Vanimo CIS Opis. 22 woda i putim wanpela pered long ona bilong Sajen 2609 Mista Mopi husait em yet i bin go pas long dispela las opisel wok bipo long em i ritaia. Planti lain husait i bung, ol gavman opisa, ol gutpela pren na ol wanwok woda wantaim ol meri na pikinini bilong ol. I sanap sarap wantaim ai wara i pundaun long lukim las pered Sajen Mopi yet i kisim.

Long olgeta eksperiens Mista Mopi i kisim na lainim long dispela 22 krismas olsem wanpela Koreksenel Opisa. Em i larim i stap ol dispela gutpela skul long ol yangpela opisa husait i stap long Vanimo CIS. Na tu olsem ol narapela hap, bikpela tru husait yangpela i gat tingting long joinim Koreksenel Sevises.

Sajen 2609 Mopi i tok olsem: "Disaplin i bikpela hap o pat bilong wok olgeta opisa i save kisim long taim bilong trening. Na long ol opisa husait i bin stap longpela taim long sevis - ol i save tru wanem samting em gutpela disaplin na gutpela bihevia i min long ol. Long kes bilong mi, insait long dispela 22 yia mi wok. I nogat wanpela rekot nogut i stap long nem bilong mi - mi gat klinpela rekot. Mi no

brukim wanpela lo bilong Koreksenel Institusneel Sevis, mi no kisim wanpela sas o ol bosman i rausim potnait pe bilong mi.

"Mi lusim sevis wantaim dispela edvais, bikpela tru i go long ol yangpela opisa husait i stap nau na husait bai i kam bihain. Kisim na bihainim wanem oda ol sinia opisa i tromoi long yu, bikpela tru i kam long Komanding Opisa bilong yu. Mi mekim dispela tok bikos long dispela ol taim, planti yangpela opisa i no save kisim na bihainim ol daireksen na oda i kam daun long antap. Long dispela as ol yangpela opisa i wok sotpela taim taosl na ol i pinis. Na wanpela opisa sapos i gat sampela gutpela i stap long em, bai em i bilim nogut tru bikos dispela strongpela Tok promis em i mekim long taim em i holim Buk Tambu. Na i mekim tok tok long maus bilong em yet long sevim Stet, Kantri na Pipel. We em i askim God tu long strongim em long mekim wok - em nau i wara nating", Sajen Mopi i tok.

Em i tok tu olsem planti gutpela taim na planti taim nogut i save kam na go. Sapos gavman i gat mani CIS tu i lukim sampela nupela senis i kamap. Na taim mani sot ol samting na wok tu i slo daun na sampela taim i stpa olgeta. Mista Mopi i tok tu olsem ol dispela "lapun" opisa husait taim bilong ol long pinis i wok long kam klosut, long ol i pinis wok. Planti krismas ol i mas kapsaitim tuhat na wok wantaim hangre. "Na mipela planti i gat liklik taim tasol long go pilai soka, ragbi, go danis na singsing o sindaun na dringim wanpela kol bia. Olgeta taim mipela i save pilim hevi bilong wok. Bikpela tru long hevi bilong mani na nambawan hevi bilong mipela olgeta em long sindaun na slip bilong opsia na famili bilong em".

"Long CIS, planti long mipela ol opisa i sindaun. Mipela i slip long ol haus mipela yet i wokim long ol diwai na lip bilong bus. Planti haus bilong ol woda i nogat bed, tebol na sia, tasol mipela ol lain husait i wok hat liklik moa i amamas wantaim laip. Na wok i go olsem ol narapela gavman opisa", Sajen Mopi i tok.

Sajen 2609 Andrew Mopi i laik ol olpela wanwok bilong em i mas save olsem em i lusim ol wantaim planti "gutpela tingting" long ol gutpela taim na taim nogut. We olgeta i bin sanap olsem ol trupela brata na mekim wok. Bikpela samting em bai i tingim long laip bilong em arasait. Em Vanimo banis kalabus i "setim gutpela rekot" insait long kantri olgeta. em i nogat wanpela rekot i soim olsem i gat brekaut bilong ol kalabus man. Mista Mopi i tenkim olgeta opisa long gutpela wok ol i mekim long ol yia i kam namel long ol yet wantaim wanwan kalabus husait long ol i stap na ol kalabus husait i pinis.

Em i askim ol nupela opisa i kam insait long bihainim lek bilong ol sinia opisa ai go pas pinis. Olsem dispela gutpela piksa em Vanimo CIS I gat long en i ken stap long planti krismas i kam bihain.

"Planti yangpela opisa i kisim longpela taim long kisim promosen bikos long tripela as. Ol dispela em dring spak olgeta taim, tingim tumas amamas wantaim meri na lusim tinging long wok i go wantaim sakim oda pasin. Husait opisa i gat dispela kain ol pasin i mas lusim sapos yu laik lukim gutpela kaikai long

wok bilong yu long bihain taim", Sajen Mopi i tokaut.

Sajen Andrew Mopi i bilong ples Onei insait long Vanimo Distrik, na mama i karim em long 13 Ogus 1955. Em i statim skul bilong em long Warapu Praimeri skul gret 1-5 long 1963, na pinisim gret 6 bilong em long Sissano Praimeri skul 1968. Em i skul kam long Vanimo Vocational Centre long 1969 na yia bihain em i kisim wok olsem wanpela stua kipa. Wantaim Wes Sepik bisnisman Mista Robert Parer husait i gat stua i stap long Vanimo long

dispela taim. Em lusim dispela wok ken na go insait namba tu taim ken long Vanimo Vocational Centre. Dispela taim em i kisim lainim aninit long Kapentri Supavaisa Mista Gabriel Waileil. Em i kisim skul tu long ol narapela skesen, olsem faming, poltri na ol narapela save na lainim vokesenel. Em i lusim ken vokesenel skul na wok wantiam narapela bisnisman ken long Vanimo Mista Adrian Visser olsem supavaisa bilong Hadwea Stoa.

Tasol long 1975, em i pilim olsem wok em i laikim tru i stap yet. Nau

em i joinim CIS long kamap olsem wok em i laikim tru i stap yet.

Nau em i joinim CIS long kamap olsem woda we em i stap i nap em i ritaia long 24 Epril, 1998. Bihain long tening olseme woda long Bomana em i holim ol wok olsem stoaman long CIS Depo long Bomana yet.

Bikos long gutpela wok bilong em, ol bos i makim em long wok insait long Akauns Seksen we em i kisim nambawan promosen bilong em olsem Lands Kopul. 6-pela munbihain narapela promosen i pas

long em na renk em i holim inap em i ritaia olsem Sajen.

1998 i lukim transfe bilong em lusim Bomana CIS i go long Boram CIS bikos long sik. Em i stap wanpela yia taosl long Boram taim em i transfe long Vanimo long 1989 olsem Vanimo CIS Klak. Sajen Mopi i marit na i gat 7-pela pikinini.


Na long ol yia em i stap long Vanimo CIS em i holim ekting posisen tu olsem gol komanda tupela taim. Dispela em long 1995-1996 na 1997-1998 taim em i ritaia.

93 FM YUMIFM

Redio Stesen bilong yumi yet

Harim olgeta gutpela program long 93FM YUMIFM

* Olgeta lokol sing sing, na ol musik bilong bipo yet.




- * PNG MOTORS - Prais bilong kes krop.
- * YAMAHA - Provinsel weda ripot.
- * BSP - Liklik bisnisman ripot.
- * PEPSI - Lunch hour rikwest.
- * CITY PHARMACY - Lukaut bilong bebi
- * POST (PNG) - Ron bilong ol sip.
- * ELA MOTORS - Kantri kaundaun.
- * AMERICAN - Gol.
- * SANDE - Gospel so.

Em rait Redio Stesen ikamap pinis, harim long tok ples bilong yumi yet, 93FM YUMIFM

**SALIM RIKWEST I KAM LONG:
YUMIFM Rikwest, Locked Bag 93,
Port Moresby, NCD, Fax: 320 1995**

PNG FM PTY. LTD.

**TRADING as NAUFM and YUMIFM
P.O. Box 774, Port Moresby, Papua New Guinea
Phone: (675) 320 1996 Fax: (675) 320 1995**



• Wara i bagarapim ples na bagarapim tru ol kaikai na ol samting. Tasol olgeta famili memba long ples i hariap long helpim narapela narapela long dispela taim nogut. Ol yangpela i sanap wantaim long sevim sampela samting bilong ol we inap bagarap long tait wara.



• Ol ami i kisim saplai olsem sel bilong ol manmeri i wokim haus na slip long en bihain long bikpela bagarap bilong wara. Taim bilong hevi, i gat helpim i save kamap long ol turangu lain i kisim bagarap.

Narapela famili klostu em pren tru bilong yu

MASTA WAI i raitim

OL narapela famili husat i stap klostu long yu em yumi kolim ol gutpren bilong yumi. Ol i olsem wanpela haus lain pren bilong yumi na famili bilong yumi.

Na ol dispela famili bai yumi olgeta de na olgeta nait bai i stap stori wantaim na toktok wantaim. Ol bai kamap olsem wanpela hap famili memba bilong yumi bikos bai yumi i kolim brata susa, i go i kam, ol pikinini bai

kolim ankol na anti i go kam.

Mi laik stori liklik long dispela kain laip na pasin bilong i gat dispela kain gutpren klostu long yumi.

Sapos yu lusim ples na yu go wok long narapela hap provins long taun, yu save olsem yu lusim pinis ol papama na ol lain brata kandre susa bilong yu. Na tu yu lusim haus na ol gaden kaikai bilong yu long ples na yu go stap long narapela hap we yu mas wok hat nau long wokim nupela gaden na tu kamapim ol nupela pren bilong yu mas toktok wantaim. Long laip bilong yumi man, pasin bilong toktok gut wantaim narapela i save kirapim amamas long yumi na sindaun bilong yumi i save gutpela.

Long luksave bilong mi long taun laip, olgeta hap kona i save gat sampela haus lain i stap. Long ol hap olsem hausing komisina eria, bai yu ken lukim planti lain haus tru i stap. Long ol hap we bikpela stua o kampani istap, bai i gat tripela o foapela haus i sanap i stap. Na dispela i soim olsem sampela lain manmeri na famili i stap long ol dispela hap.

Ol dispela lain i kamap olsem wanpela lain nau na olgeta de na olgeta nait bai ol i mas stori wantaim narapela na kaikai buai, smok na serim ol samting olsem kaikai na ol arapela samting i go kam. Ol i olsem gutpren nau long mekim ol samting wantaim long stap amamas long dispela hap komyuniti o kompaun bilong ol.

Taim narapela i save sot long wanpela hap

kaikai o wanpela samting long haus bilong, narapela i gutpren i save stap na i save helpim narapela. Na ol i save mekim dispela pasin olgeta de na olgeta taim long laip bilong ol long taun taim o i stap wantaim. Maski narapela famil i kam long Kerema, narapela i kam long hailans, narapela i kam long Tolai, tasol ol bai gutpren yet. Na sampela taim, ol i save bung wantaim na kukim liklik mumu na kaikai wantaim.

Long taun, yumi olgeta i gat sampela wantok bilong yumi we yumi i bilong wanpela ples wantaim. Tasol ol i save stap longwe long narapela hap kona bilong siti na i save hat long yu go lukim ol olgeta de. Wanwan taim tasol bai yu ken i gat taim long go raun lukim ol wantok.

Tasol long taim wanpela bikpela hevi olsem sik i kisim yu, o meri bilong yu i laik karim pikinini, o yu bungim birua long ka o yu sot long bas fea, yu sot long kaikai na ol kain kain liklik hevi na wari, bai namba wan lain tru long kamap na traim long helpim yu em ol dispela gutpren bilong yu stret.

Dispela i no nupela pasin bikos dispela pasin i stap long olgeta kona bilong Papua Niugini na ol Pasifik kantri tu wantaim.

Long laip bilong yumi wanwan, yumi ken glasim bek na lukim olsem, ating nogat wanpela bilong yu i kamap na stap strong olsem nau long strong bilong yumi yet. Sampela gutpren tu i save stap na helpim yu long yu mas kisim strong long mekim wok bilong yu.

Ating sampela taim yu sot long mani, ol gutpren bilong yu i save helpim yu inap taim yu gat mani orait yu bekim bek. Na dispela i soim olsem yumi olgeta i save sapot long narapela narapela long kamap wanem kain manmeri nau. Olgeta arapela manmeri i gat sampela kain helpim long laip bilong yu.

Long dispela liklik hap stori, yumi ken luksave olsem narapela haus lain klostu long yu em ol gutpela pren tru bilong yu. Olsem na mipela olgeta i mas was gut long helpim na lukautim mipela yet long kamapim gutpela amamas long sindaun bilong mipela long taun laip inap wanem taim wanpela i pinis long wok na i laik go bek long ples bilong em.

Dispela gutpela pasin i save mekim ol pikinini bilong mipela i save lainim long kamap gutpela pren wantaim narapela pikinini bilong ol narapela haus lain. Taim ol i bikpela, ol i save gut pren yet na sapot long narapela na kolim ol yet brata susa. Na ol i save go het yet long sapotim na lukautim na strongim narapela long taim hevi i bungim ol long bihain taim.

Dispela em i wanpela hap pasin we i kamap olsem strong pinis na bai i stap yet inap sampela kain bikpela tenis i kamap long bihain taim long brukim dispela pasin olgeta. Sapos ol manmeri long bihain taim i kamap wantaim nupela tingting na pasin bilong; yu mas strongim yu yet. Em nau bai dispela pasin i dai. Na olgeta manmeri bai i stap long laik na strong bilong wanwan.

RESIS BILONG RAITIM STORI

Yu save yu gat sans long winim kes prais inap long mak bilong K4000, wanpela Kundu Save akaunt na Mobil fuel voucher.

Raitim wanpela sotpela stori tumbuna, stori, redio pilai na essay.

Het tok bilong essay em, "Bilong wanem na pasin bilong rit na rait i gutpela?"

Long pilai yu mas katim dispela hap pepa daunbilo na raitim nem bilong yu wantaim na salim i kam.

Hia em ol prais:

Essay - K500 / bes essay

Ol man-meri:

Bes sotpela stori - K300/Mobil Oil fuel voucher
Bes redio pilai - K300

Haikul/vokensol skul/code:

Bes tumbuna stori - K150
Bes sotpela stori - K150
Bes redio pilai - K150

Top UP-/ Kominiti skul:

Bes tumbuna stori - K100
Bes sotpela stori - K100
Bes redio pilai - K100



Name:

Adres:

Telepon:

Levol makim Haikul, Top up, bikpela man/meri:

Wanem stori yu raitim:

Olgeta pas i mas kam long Word Publishing bipo long namba 8 dei bilong September.

Creative Writing Competition,
Word Publishing Co. Pty. Ltd.
P.O. Box 1982, BOROKO, NCD 111.
Telephone: 325 2500 Facsimile: 325 2579

Sapot bilong dispela resis i kam long;



Mobil

RIO TINTC

National Literacy Awareness Secretarial



BSP

Trabol man na meri i senisim pasin long Banana blok setelmen

Sape Metta i raitim

Sampela yangpela man na meri husat ibin kamap long taim mama bilong ol i karim ol na i save i stap long Banana bolik setelmen i laik senisim ol pasin nogut na rabis pasin bilong ol na i laik sindaun gut insait long komyuniti. Ol dispela yangpela man na meri isave mekim kainkain pasin nogut bilong stil long ol arapela lain man meri, stilim mani na ol kago nabaut insait long stua, dring bia na kisim drag nogut mariwana, pait nabaut na tu igo insait long kainkain pasin pamuk.

Nau yet ol i lukim olsem long stap insait long dispela kain laip ino gutpela long ai bilong ol man-meri long komyuniti na tu long ai bilong God, olsem na long dispela as ol i laik kamapim wanpela yut grup bilong dispela setelmen ol i kolim (Banana Volunteers) yut grup na bikpela laik na as tingting bilong ol long kamapim dispela yut grup em long ol i laik kempen agensim pasin bilong kisim drag nogut mariwana na sanap na tok-tok agensim pasin pamuk we i save kamapim dispela sik nogut Aids we isave kilim planti ol man, meri na pikinini tu i dai.

Man husat igo pas na presiden bilong Banana Volunteers yut grup, Peter Mako i tok, inap em inap long kainkain pasin nogut.

Em i tok "em i taim mipela laik mekim sanis long laip bilong mipela. Mipela i save mekim ol stil pasin long painim kaikai na istap laip na wanpela piksa long pasin bilong mipela, taim mipela i pilim hangre na lukluk long narapela wei long painim kaikai, em i save hat tru, na long dispela as mipela i save igo insait long ol stua na stilim ol kaikai nabaut olsem paket rais, paket bisket, kon bif tin mit na tin pis long kaikai na istap laip.

Wankain pasin tu long sait bilong ol meri (ol susa bilong mipela). Ol iken stil tu tasol bikpela arapela rabis pasin ol i save mekim long sait em pamuk pasin."

Mista Mako i tok sapos ol susa bilong ol i no nap mekim ol dispela pasin pamuk, ol bai kisim mani we long baim kaikai long sapotim hangre bilong ol na istap laip? Ol i



• Ol yut grup bilong Bonana Blok long Goroka taun i bung long mekim wok bilong stretim pasin na kamap gutpela sindaun. Foto: Sape Metta.

save salim skin bilong ol yet long pasin pamuk long painim mani long lukautim ol yet wantaim famili bilong ol.

Em i tok i tru olsem planti man na meri na ol lida tu i save i tok graun istap.

Wok long dispela graun na bai yu i ken lukim kaikai bilong hatwok bilong yu.

"Em i tru tasol tingim, mipela ol dispela yut-samting olsem moa long 30 i bilong narapela provins we mama bilong mipela i karim mipela long Banana blok setelmen, long Goroka, Isten Hailens provins.

Mipela i save harim nem bilong as pels tru bilong mipela, tasol mipela i bikpela long setelmen, olsem na sapos mipela tingting long igo bek long asples bilong mipela na i laik mekim wok long graun, ol lain bilong ples bai ino nap tru long larim mipela. Ol bai rausim mipela bikos mipela ino gat

rait long tasim graun bilong ol lain long ples", Mista Mako i tok.

Em i tok gavman bilong yumi i mas luksave gut long ol yut husat i bin kamap long ol taun na i hat long igo bek long asples bikos dispela hap we ol i kamap long en, em i asples bilong ol. Gavman i mas sapotim ol yut mangi long ol kainkain liklik projeks we i ken helpim long kipim ol bisi na ol ino ken istap na sindaun nating we ol bai ino i ken kamap wantaim planti kain kain tingting we bai i ken karim ol igo insait long ol kainkain rabis pasin.

Mista Mako i sutim tok igo long gavman na itok ol imas yusim sampela gutpela rihebilitesen program bilong ol yut we bai i ken helpim ol gut long sindaun bilong ol na tu long sem taim hevi bilong lo na oda namel na insait long taun na provins i ken igo daun. Em sapos gavman i ken kamap na givim moa sapot long ol yut bilong tude.

Em i tok Banana Volunteers i kisim pinis sampela sapot long Institute of Medical Research (IMR) we ol i givim pinis sampela ol liklik buklet na ol posta we igat ol toktok long ol kainkain hevi em Spak brus na Aids isave kamapim long laip bilong ol man, meri na pikinini.

Mista Mako i tok IMR i no kamap wantaim sampela fans long helpim dispela Banana blok yut grup, tasol ol i amamas long ol i givim ol posta na buklet we bai i ken givim ol bikpela helpim long kempen agensim drag na Aids.

Em i tok nau yet dispela sik Aids i wok long kamapim planti hevi insait long kantri, bikos planti ol man na meri ino save tumas long dispela sik na wanem samting bai kamap long ol na ol i wok long spredim yet dispela sik nogut igo ikam.

Mista Mako i tok em wantaim ol yut grup bilong em i laik wok strong

long karim ol toktok na skulim ol man na meri long komuniti long ol imas wasaut gut long dispela sik nogut Aids.

Em i tok nau yet ol i mekim plen long igo daun long Lae na kisim sip igo long Popondetta na statim ol aweanes kempen bilong ol long hap. Na bahrain bai ol i wokabout bahrainim Kokoda trel igo daun long siti bilong Pot Mosbi na dispela aweanes kempen agensim dispela tupela bikpela sik nogut bilong PNG-Aids na Drags.

Mista Mako askim Isten hailans gavman long luksave long ol na wanem kain wok bai ol i mekim na i askim gavman long kamap wantaim ol fans an helpim dispela yut grup long karimaut gutpela wok long helpim na skulim ol arapela man na meri long wanem kain bagarap bai kamap long bodi na laip bilong ol sapos ol i go dip tru insait long pasin pamuk na drag abius pinis.

Yusim ol raskel long stretim komyuniti

Philip Rhambu Nesanel presiden bilong PNG "Unemployment youth"

YUMI olgeta yut i nogat wok long dispela kantri ken wok bung wantaim ol lo lain sapos, gavman na bisnis haus sapotim program bilong grasrut projek olsem agrikalsa, helt na edukesen.

Emi i bikpela eria olsem na mi kolim nem bilong tripela tasol.

Agrikalsa olsem lukautim kakaruk, pik, kau na sipsip.

Planim banana, kumu long salim i go long hotel, skul na haus sik na ol arapela mes o haus kaikai samting.

Edukesen kisim skul bilong, skul mekenik, kapenta, welda, na kain olsem.

Helt: nutrisen, AIDS awenes kempen, samap, awenes, na klinpela haus.


Dispela program stap

pinis long ples na taun tu tasol gavman i wok long bringim kainkain man long narapela hap long wokim wok painim aut em i lusim mani long baim ol taim dispela program i stap pinis na nidim mani tasol bilong mekim i wok.

Dispela pasin bilong raskel na pamuk pasin bai i stap yet bikos nogat man i i stap pinis painim aut as bilong dispela hevi:

Mi laik tokaut long sampela as tingting gavman i i no luksave olsem givim wok long ol yut i nogat wok o meri i nogat wok i go long self-started projects: Em ol pipel bilong yu taim ol kam nok long dua givim ol mani dispela no ken givim baksait long ol.

Maski wari long yu yet.



• Ol yangpela man i mekim wok kamda na Pater Koieba i soim ol long katim gut ol plai-wut gut.

I gat ogenaisesen olsem NGO i kam sapotim ol sapos yu helpim wok bilong ol tu.

Gavman yu wok long tok nogat mani tasol taim mipela bai askim ol wokman bilong gavman, ol i gat tasol ol i tok i no

yusim gut. Dispela i no gutpela pasin.

Mi laik tok pait long gavman olsem; Yu mas givim mani i go long ol pipel bilong yumi. I gat mani bilong gan man bluman, grin man but tasol nogat mani bilong raskel

na ol lain i save smok spak brus.

Yu man balensim tupela sait wantaim.

Dispela raskel em i man olsem yu gavman. Raskel i makim yu so yu bai helpim em i gat we bilong lukluk long hevi

bilong em.

Taim yu laik toktok long lo na oda yu save askim ol bikman bilong gavman na i no yut lida, komyuniti lida. Mipela ol lain i save gut long dispela hevi.

Sapos yu wok wan-

taim mipela, mipela bai inap long sapotim gavman.

As tru bilong dispela pasin nogut em i nogat wok bilong wokim mani.

Dispela hevi em samting bilong husat. Askim yu yet gavman na ol lida.

Long dispela pasin na sampela ogenaisesen i gat rihebilitesen program bilong helpim ol dispela raskel tasol i nogat mani long ronim. Mipela komyuniti lida, yut lida NGO i ken stretim dispela hevi tasol nogat helpim bilong gavman.

Sapos gavman ogenaisesen i tingting long daunim hevi bilong lo na oda i, gat we bilong stretim.

Yu westim K3-4 milien long baim helikopta bilong stopim raskel.

Taim o putim dispela long han bilong pipel husat yu kolim raskel.

Stretim dispela hevi hariap bikos mipela i sindaun long taim bom.



**PNG
HIT
PARADE**

**1
9
9
8**

POS.	SONG	ARTIST	STUDIO
W/B	L/W	T/W	
8	3	1	Kusai Azzimbah
1	1	2	Tingim Mama Bagita Souls
7	4	3	Vada Bolaomu Azzimbah
10	8	4	Mama Blong Mi Pati Doi
2	2	5	Soldier Boy Noel Aei
14	11	6	Goipex 105 Wass Kadoi
3	3	7	Pacific Island Pati Doi
0	13	8	Oh My Dear Pati Doi
4	6	9	Goi Medley K-Dumen
6	7	10	Tavurvur Insects
9	9	11	Iau Malari Dirty Beggars
11	12	12	Dedicate My Love Apprentice
0	0	13	Tingting Blong Mi Was Kadoi
12	14	14	Kuti Mangi Robert Oeka
15	15	15(4)	Taurama Beach K-Dumen
5	10	16	Moraita Robert Oeka
17	17	17	Agutoi Ogoda Sounds of Gaidi
16	16	18	Karkar Island Robert Oeka
18	18	19	Manam Motu Quakes
13	19	20	Beautiful Harbour Jansh Talad

PNG FM PTY. LTD.
Trading as
NAU FM
and
YUMI FM

P.O. Box 774,
Port Moresby
Papua New Guinea
Ph: (675) 320 1996
Fax: (675) 320 1995

Nupela "Kusai" album bilong Azzimbah i stail moa yet

...ol song gat gutpela mining

JAMES KILA i raitim

O PIM yau bilong yu gut na harim switpela stail musik bilong Azzimbah insait long nupela "Kusai" album bilong ol.

Yes, musik bilong ol i gat stail, kala na bilas we i "raid na resa olgeta". Na tu mining bilong ol singsing insait long dispela album i stori gut tru long laif na wokabaut bilong ol manmeri tude.

Nupela album Kusai bilong Azzimbah i bin kamaut klostu tupela wik nau, tasol pawa na kik bilong en i strong moa yet. Song we i stap olsem taitol bilong album "Kusai" i soim strong bilong en pinis insait long Yumi FM Weekly Countdown long las wik, taim em i kamap namba wan tru insait long 20-pela song bilong dispela wik. Narapela song "Vada Bolaumu" tu i wok long surik hariap tru i go antap. Las wik em i stap long namba-3 ples.

Azzimbah i bin soim strong bilong em pastaim long nam-bawan album bilong en we i gat wankain taitol Azzimbah. Album ya i gat plantol gutpela song olsem Bomana, *Frooks, Mama na Lese Mori* na tu em i bin winim lewa bilong planti fens tru bihain long ol i harim ol song ya long redio.

Ol song bilong dispela nupela album bilong Azzimbah i gat planti ol gutpela singsing we i stori long laip na tu laip-stail bilong ol manmeri na pikinini long tude.


Song ya Kusai i gat gutpela mining bilong en. Ol narapela song we i karim ol gutpela mining na stori bilong ol em *Pikinini, Freedom, Kalo Beach, Vada Bolaumu* na *Bogenvil*.

Lid-singa bilong Azzimbah, Martin Rawali i yusim stail long nek bilong en na tu save bilong em long raitim na kamapim ol song we i ken bringim gutpela swit long yau bilong ol manmeri.

Long ya "Pikinini" i stori gut tru long kain laip we papa i lusim mama na bihain mama i lusim pikinini na tumbuna i hat-wok long lukautim. Mama i go painim nupela papa na pikinini i karai.

Dispela song i stori gut tru long kain laip planti ol pipel long PNG i bungim long tude. Planti i save ting olsem dispela em i gutpela pasin tasol em i no stret.

Narapela song "Bougainville" tu i gat gutpela



mining bilong en. Song ya i stori long olsem wanem na gavman bilong yumi i salim ol soldia i go pait long Bogenvil. Insait long dispela pait wantaim ol brata long Bogenvil, planti laif i bin lus. Song ya i askim wanpela gutpela kwest-en tru. "Ol i i dai long kantri o long gold na copper mine". Sapos wanpela lida i harim dispela song, traim na skelim na mekim sampela toktok insait long palamen.

Ol narapela song we i gutpela tru long harim em *Maupaisa* long tokples Mekeo. Song ya em Leo Eko i raitim na Martina Rawali i singim. Em i wanpela gutpela song tru we i gat stail na kala stret long musik bilong en.

Narapela stail song tu em *Kalo Beach*. Ol memba bilong Azzimbah i dediketim song ya i go long ol femili bilong ol i

stap long Kalo Viles insait long Rigo distrik long Sentral provins.

Ol i salim amamas na dedikesin tu i go long ol pipel bilong Alotau wantaim dispela song "Alotau". Dispela em bihain long Azzimbah i bin go pilai raun long hap long las yia. Long Mosbi siti yet, planti ol haus insait long ol hap olsem Goden, Gerehu, Tokarara na tu long Boroko, ol manmeri i pairapim pinis musik bilong Azzimbah. Ating ol narapela ples insait long kantri tu i wok long skin kirap long harim dispela stail grup bilong Mosbi.

Azzimbah ben i bin stat long 1995 taim ol yangpela man bilong Gerehu Stes 3 na 6 i bung wantaim long mekim musik. Ol i stat bung na pilai raun long ol liklik pati nabaut long eria bilong ol. Intares bilong ol long musik i gro i go

bikpela na long 1996 ol i strong na go insait long Pacific Gold Studios long Mosbi long rekotim namba wan kaset album bilong ol.

Ol memba bilong Azzimbah i kam long planti hap bilong PNG. Nau yet ol memba bilong grup em Martin Rawali (lid-singa na ritem gita), Ivana Kepi (lid gita), Daniel Sepa (bes-gita), Tixie Sepa (bekap vokal na ritem gita), Thomas Paska (bekap vokal), Andy Miro (kibot), Benjamin David (Kibot) na Mitchell Samei (drams).

Husat manmeri i laik salim tok amamas o raitim leta i go long ol lain Azzimbah, ol i ken rait tasol i go long: **Tamoale Arts & Medio P O BOX 313, Waigani. NCD. Yu ken ring long telefon 323 3961 o fex long 323 0204.**



NEM: Oliver Mensah
KRISMAS: 20 (meri)

ADRES: PO Box 217, Cape Coast Town Central Region - Ghana

LAIKIM: Raun long arapela ples, go lotu, helpim arapela na painim wampela gutpela man bilong maritim.

NEM: Emma Essel
KRISMAS: 25 (meri)

ADRES: Yellow Street, PO Box 390, Cape Town C/R Ghana.

LAIKIM: harim musik, raun lukim arapela ples, pilai spot, kukim kaikai na painim man bilong maritim.

NEM: Elaine Banson
KRISMAS: 22 (meri)

ADRES: PO Box 1114, Pedu Village, Oguua City - Ghana.

LAIKIM: Painim wampela gutpela man bilong maritim bihain, raun lukim narapela ples, harim ol gospel musik na danis.

NEM: Julie Simaiya
KRISMAS: 17 (meri)

ADRES: Burbura village Budum NRC C/ PO Box 949 Madang.

LAIKIM: Raitim pas, go long lotu, kukim kaikai na kaikai buai na pilai basketbal.

NEM: Blasius Asa
KRISMAS: 19 (man)

ADRES: Burbura village Budum NRC C/ PO Box 949 Madang.

LAIKIM: Go long lotu, painim abus long bus, harim musik, pilai soka na raitim pas long ol pren.

NEM: Morbert Peter
KRISMAS: 24 (man)

ADRES: PO Box 84, Kimbe, West New Britian province.

LAIKIM: Pilai spot olsem basketbal, volibal, na senisim ol presen wantaim ol pren na raitim pas long arapela.

NEM: James Timbi
KRISMAS: 22 (man)

ADRES: Mugapeng SDA Church, PO Box 1845, Mt Hagen, WHP.

LAIKIM: Ritim Wantok niuspepa, raitim pas, waswas long wara na pren wantaim ol meri na pilai spot.

NEM: Epsi Stanley
KRISMAS: 24 (man)

ADRES: Lae Builder and Contractors, PO Box 1730, Lae, Morobe province.

LAIKIM: Go lotu, helpim arapela, mekim pien wantaim meri bilong maritim.

Tupela brata kamap olsem pisin bilong kaikai pis

Long bipo tru i gat wampela bikman i save stap long ples. Em wampela tasol na olgeta taim em i save raun long bus na wokim gaden na stretim ol haus na samting bilong em yet.

Long gaden i gat wampela bikpela diwai i sanap i stap na olgeta taim man ya i save wok i go na taim em pilim olsem pispis o pekpek i kilim em, em i save go long as bilong dispela diwai na rausim ol. Em i save mekim olsem olgeta taim.


Long as bilong dispela diwai, i gat wampela bikpela mama snek i stap na olgeta taim man ya i save pispis long dispela as bilong diwai, em i save dringim pispis bilong man ya.

Snek ya i save mekim olsem i go olgeta taim na wampela taim em i gat bel long dringim pispis bilong dispela man. Em i gat bel na karim tupela pikinini man.

Tupela pikinini man ya i stap i go na wampela taim tupela i bikpela na tupela i stat long kam ausait long as bilong diwai ya na raun stilim ol kaikai long dispela gaden. Olgeta taim dispela bikman i kam, em i save kros na behat kaskas long lukim ol kaikai long gaden bilong em i save lus.

Olsem na wampela taim em i hait long gaden i stap na lukim stret tupela manki ya i kam na stilim ol kaikai i stap. Narapela brata i go antap long popo na narapela i was tambolo. Bikman ya i bikmaus na ron i kam tasol narapela boi long as bilong popo i ronawe na narapela antap i hangamap na bikman ya i holim em. Em i kirap na kisim boi ya i go long haus bilong em na lokim em istap.

Narapela brata i ronawe i go long mama bilong em na tokim em olsem wampela man i holim brata bilong em long gaden. Tasol mama bilong em i tok, em papa bilong yutupela. Olsem na boi ya i kirap tasol na bihainim brata bilong em i go kamap long haus bilong bikman ya. Taim bikman ya i lukim em, em askim watpo na boi ya i kam. Tasol boi ya i tok em kam long kisim brata bilong em



na em stori olsem tupela i pikinini bilong bikman ya. Taim bikman ya i harim olsem, em i kisim tupela na lukautim. Na ol i go kisim mama bilong ol long as bilong diwai ya i kam na stap wantaim ol.

Tasol olgeta taim man ya i save kros na paitim meri bilong em nogut tru. Wampela taim tupela boi ya i pul long kanu na i go painim pis long biksolkwara. Na

papa bilong tupela i kirap na mekim plen bilong kilim mama bilong ol. Olsem na em redim ol paiawut aninit long haus na mekim bikpela paia na kukim haus na haus i paia wantaim meri bilong em na kilim em olgeta.

Snek meri ya bipo long em i dai, em i tanim olsem wampela hap lip na flai i go antap na go pundaun stret antap long kanu bilong tupela boi bilong em. Na tupela manki ya i save stret olsem mama bilong tupela i mas dai pinis. Olsem na tupela i pul long kanu na i go bek.

Tasol papa bilong tupela i mekim trabel pinis na i ronawe i go long sampela longwe hap pinis na hait. Tupela boi ya i kirap na kisim ol wing bilong pisin na samapim long han bilong tupela na tupela i stat long flai na painim papa bilong tupela.

Tupela i mekim olsem inap wampela krismas olgeta na wampela taim stret tupela i flai raun na bungim stret papa bilong tupela i

wok long wampela gaden i stap. Em nau tupela i flai i go daun tasol karim em na i go tromoi em stret long namel bilong bikpela solwara na papa bilong tupela i dringim solwara na sotwin na dai.

Orait tupela boi ya i go sanap antap long solwara na i wok long kisim win i stap ya nogat, wampela bikpela wara i kamap long narapela na brukim tupela stret na daunim tupela. Tasol tupela i kwiktai tanim kamap olsem bikpela pisin bilong solwara stret na sanap antap long solwara na wok long painim pis bilong kaikai i stap. Nau tupela i kamap pisin stret bilong solwara.

Olsem na long tude sapos yu lukim ol dispela longpela nek na longpela lek pisin i save flai na painim pis long solswara em dispela tupela brata tasol.

Em tasol stori tumbuna bilong mi na mi yet em;

**Bro Kelfy
Jimi,
Westen Hailanprovins**

Mi no kisim filings long meri

Dia Pren,

Mipela i wari taim mipela i lukim pas bilong yu. Mipela i wari long yu na ol planti poroman husat yu tok i bungim wankain hevi na tu long ol dispela meri pren bilong yu.

Taim yu tok olsem dispela ol meri we yu slip wantaim i nogat intres, yu minim wanem samting?

Yu minim olsem tingting na laik bilong ol no save kirap long slip wantaim yu? Ating ol i pilim olsem yu no givim bikpela tingting long prensip bilong yupela na ol i olsem. Ating rong i stap long yu na i no wantaim ol meri. I no min olsem yu o ol meri i nogat laik long slip wantaim wampela arapela. Long kisim pilings, tingting bilong yu i mas stap long en na i no bodi bilong yu.

Ol meri i no ol samting nating bilong ol man long yusim long laik bilong ol na lusim, nogat. Ol meri i gat tingting na laik, strongpela olsem yu tasol. Tasol bilong ol i narakain long bilong yu, moa yet long rot we ol i lukluk long slip wantaim ol man. Wanem samting i kirapim yu bai i no kamapim wankain samting long meri.

Want to Know

Samting we i no inap long kirapim laik na tingting bilong yu i ken kamapim narakain tingting long ol meri.

I no olsem ol dispela meri we yu slip wantaim ol i no gat laik. Na wankain wantaim yu. Hevi i stap long yupela olsem yupela i no gat inap save yet long lukautim ol tingting bilong yupela long dispela samting.

Em i tru olsem ol man i ken amamasim ol yet long slip wantaim meri, maski ol no laikim ol, tasol ol i yusim ol long inapim laik. Wampela tingting we mipela i ken givim long ansaim askim bilong yu em go long wampela pamuk meri husat i save long ol kain trik long kirapim laik bilong yu. Tasol mipela i wari gen na mipela i no laikim yu long go long pamuk meri tasol long givim bikpela tingting sapos em i orait long yu i slip wantaim meri o nogat. Sapos yu slip wantaim pamuk meri na tu slip wantaim planti meri nabaut, yu bai kisim sik nogut na yu givim long ol narapela.


Olsem wampela kristen grup, Laiplain i bilip olsem pasim marit namel long man na meri em i rait ples long ol bilong serim laik na lav bilong ol. Na tupela i mas stap wantaim wampela patna tasol. Sampela lain i tok skul bilong ol

Kristen i save pasim ol manmeri long gat gutpela taim. Tasol buk Baibel i tokim yumi olsem dispela skul i kam long God. Em tasol i givim yumi long laik we yumi ken apinim amamas long en na i no bilong yusim manmeri tasol long en. Lukim, Bikman i wokim yumi na em i save long olgeta samting long yumi.

Em i wokim man na meri long gat laik long wampela arapela. Em i save long gutpela rot long yumi yusim dispela laik Tasol em i laikim yumi long yusim dispela laik insait long pasin bilong marit. Em i no wok long putim tambu long yumi long dispela samting tasol em i givim yumi sikret long kisim gutpela samting na long wankain taim tu, lukautim yumi yet long birua.

Pasin bilong slip wantaim em i wampela hap tasol long we man na meri i save stap wantaim. Antap long inapim laik bilong man, em givim ol arapela skul long yumi. Sapos man i laik stap amamas, em i mas bihainim gutpela pasin na tingting na gutpela ples bilong yu na ol poroman bilong yu long stat em long galsim pasin bilong yupela long ol meri.

Laiplain



LAIPLAIN

Mi na ol poro bilong mi laik kilaim save long sampela samting long laip na sindaun bilong yumi manmeri.

Dia Laiplain,

Mi gat 19 krismas na mi slip pinis wantaim sampela meri tasol wampela samting em ol no kirapim tingting na laik bilong mi kwiktai.

Long kain lukluk bilong meri inap mi luksave sapos em iken givim mi pilings kwiktai o nogat?

Inap yupela i prinim leta bilong mi long ol arapela lain long lukim bikos planti poroman bilong mi i bungim wankain hevi wantaim ol meri.




Bik Bro REBO



IGO MOA NEKS WIK!



SIPAK MAIKY



IGO MOA NEKS WIK!

Maski bagarapim komyuniti bilong yu

Dia Edita,

Mi wanpela mangi Morobe tasol nau mi stap long Kimbe Oil Pam blok. Mi laik autim liklik wari bilong mi i go long ol mangi insait long ol Oil Pam blok. Wari bilong mi i go olsem.

Planti taim mi save harim olsem ol mangi i brukim skul o haus sik? Dispela ol samting yupela i bagarapim, yupela tingim ol papamama na ol brata susa bilong yupela tu o nogat?

Bipo yu liklik mangi haus sik i helpim yu, yu i go bikpela liklik skul i givim yu save na nau yu wok long bagarapim gen, bai yu kisim helpim we nau: nogat nau?

Traim na lukautim komyuniti bilong yu bai stap gut liklik insait long Galai wan komiti nau em dispela pasin i wok long stap, ol i brukim haus sik, haus sik i pas na nau gen ol i go insait long skul na ol i kisim ol samting bilong skul gen na ol i go salim na kisim mani.

Traim na stap gut long blok na mekim wok, orait mani bai kamap long hatwok bilong yu, orait kisim na baim wanem samting yu laikim. Maski raun raun nating long komuniti olsem ol pik na dok i save raun na mekim ol samting long laik. Em tasol liklik wari bilong mi.

**Jacob Samuel
KIMBE**

Maski giaman-gavman i no helpim grasruts

Dia Edita

Mi wanpela grasrut mangi bilong oil pam long Kimbe. Mi laik bekim pas bilong brata Paulias Gumia bilong Madang. Pas bilong em i bin kamap long *Wantok* niuspepa long Me 21, 1998.

Long pas brata Paulias i tok Praim Minista Bill Skate em rait man. Brata Paulias, toktok bilong yu olsem wanpela ai pas man stret. Yu no lukim ol grasruts manmeri i sindaun olsem wanem na yu mekim dispela toktok. Ai bilong yu i mas pas O?

Brata yu yet yu mas skelim dispela ol askim:

- Bilong wanem na kampani i rausim ol wok manmeri long wok?

Mekim nesanel haiwe long Madang-Hagen

Dia Edita

Mi wanpela mangi Madang na mi sapotim tok bilong memba bilong Jimi, Bevan Tambi husat i bin kamap long progrem tete nau long nait long Redio Madang long Me 18.

Toktok bilong memba i tok long wanpela nesanel haiwe mas ron long Madang Simbai i go olgeta long Hagen. Dispela tingting bilong memba i mekim planti manmeri bilong Jimi na Simbai i amamas tru.

Olsem na nau mi askim

- Prais bilong ol samting i go antap. Dispela i helpim ol grasrut manmeri tu o nogat?

Brata Paulias, yu mekim ol dispela toktok em bilong nau na bihain bai yu krai. Yu no save yet olsem yu mekim ol dispela toktok em i nogut. Brata Paulias, grasruts i mekim na gavman i kisim mani na bekim ol dinau bilong em long wol benk. Em i sindaun long gutpela haus na em i kaikai ol gutpela kaikai wantaim ol meri na pikinini na em i givim baksait long yu.

Em tasol na sapos yu husat i laik sapotim o egensim mi, plis rait tasol long *Wantok* niuspepa.

**Jacob Lili
Kimbe, Galai wan**

memba bilong Midel Ramu Assik Tommy na gavana bilong Madang, Jim Kas long sanap antap long dispela plen na wokim dispela rot. Mi hop olsem yupela bai wokim dispela rot bipo long yupela i lus long ileksen.

Em tasol na mi bai amamas long harim bekim bilong pas bilong yu husat brata susa i sapotim o egensim mi.

**Frank Mam
Madang**

Madang smel olsem pis

Dia Edita

INAP Madang gavman, ol lain bilong helt dipatmen na dipatmen bilong Envairnmen na Konsevesen i sekim wok bilong RD Pis fektori?

Mipela ol pipel i stap long Siar i go olgeta long Sek nau i save kisim taim long smel bilong pis RD Pis fektori i save kukim long paia.

Sapos yu draiv namel long Madang na Alexishafen long bikmoning, yu inap smelim smel bilong bun bilong pis i smel nogut tru. Olsem wanem dispela em i no smok pulusen o wanem?

Inap yupela sekim tu wanpela susa kampani bilong RD pis kampani i save kisim pis na salim long RD pis kampani. Mi lukim olsem ol i save troimo

ol pis ol i kesim we RD pis kampani i no laikim long solwara. Dispela em i no gutpela pasin. Ol i bagarapim ol pis na tu ol i bagarapim solwara bilong mipela wantaim ol pis i dai pinis.

Mi askim tu dipatmen bilong Envairnmen na Konsevesen long glasim dispela hevi na mekim sampela samting long dispela. Sapos nogat, dispela hevi bai i go bikpela na i ken bagarapim planti laip.

Em tasol wari bilong mi na inap hetman bilong dipatmen bilong Madang na Envairnmen na Konsevesen i mekim sampela samting kwik long dispela hevi.

**Leo Paol
Madang**

Noken bagarapim nem bilong Aitape taun

Dia Edita,

Mi wanpela mangi Aitape i stap long Flai Riva long Westen Provins na mi no save amamas tumas long lukim ol giaman stori i save kamap na bagarapim liklik taun bilong mi Aitape.

Long Epril 30, 1998 wanpela brata we mi save gut long em, brata John Kule i bin bekim pas bilong dispela konman "Sais Ten Pusi Cat" husat i bin bagarapim tru nem bilong Raihu haus sik na ol wokman bilong haus sik.

Dispela kain nem olsem "Gley Wakisa" em nem mipela ol mangi

bilong Aitape i save kolim ol man bilong smelim bia na ol mangi i save bagarapim Aitape taun.

Mi laik tok klia olsem, noken stailim nem we ol wilbairo draiwa i save yusim taim yu rait long *Wantok* niuspepa. Kolim nem stret bai yumi olgeta i skelim na bekim pas bilong yu long sapotim yu o egensim yu!

Mi bai amamas tasol long lukim yu husat i sapotim mi na brata John Kule o egensim mipela. Rait long *Wantok* niuspepa bilong yumi stret na bai mipela i ken glasim.

**Klide Ebbee
Westen Provins**



NATIONAL HEART FOUNDATION OF PAPUA NEW GUINEA INC

*Lukautim lewa bilong yu
bai i no inap painim sik*

Eksesais olgeta taim long olgeta de.

Yu bai stap longpela taim na pilim hamamas.

Dispela toksave i kamaut na kisim sapot bilong moni i kam long National Heart Foundation of Papua New Guinea Inc.

Ol i putim aut dispela toksave long interes bilong pablik lewa helt.

**PO Box 158, Mt Hagen, Western Highlands Province.
Telepon namba 542 2199 Feks namba 542 2384.**

Oposisi membina kalap lusim oposisi na i go long gavman

Dia Edita,

LONG Wantok niuspepa bilong mun Me 21, 1998, Oposisi lida Bernard Narokobi i tok sapos Oposisi i nogat inap man em bai gavman bai ronim kantri long pawa bilong em yet.

Mi helpim Mista Narokobi na tok olsem. Dispela ol membina i kalap kalap em ol provinsel gavano. Ol gavana i mas tingting gut na lukautim gut ol pipel bilong ol, ol i noken krai long pawa.

Gavana bilong Madang Jim Kas i kalap lusim Oposisi na i go joinim Gavman bilong wanem? As i olsem em i laik kisim sapot bilong gavman long bringim poka mesin i go long Madang. Dispela em i bikpela hevi long mipela ol pipel. Sampela gavana

ol tu i gat tingting i stap.

Yupela long ples i stap na lukluk long sip. Sip em ol membina bilong yupela i stap long em. Sapos bos bilong sip i bilasim gut sip em bai i no inap kapsait. Sip bilong Indonesia i kapsait nau na ol i wok long statim.

Oposisi na gavman mi tok olsem dispela kain tingting na pasin politik em yumi mas lusim. Yumi mas givim yumi yet na bel isi na gutpela save bilong yumi i go long God.

God yet i makim ol lida long lukautim mipela ol manmeri bilong em olsem na olgeta membina i mas tok tru na wan bel ria bihainim ol lo bilong God.

Yana Aibule
MOROBE PROVINS

Rabaul Gurias noken baim ol man long arapela provins

Dia Edita,

Mi laik komplem long dispela tim Rabaul Gurias. Ol i wok long baim ol man long arapela provins. Plis, yu dispela tim i noken baim ol man long arapela tim.

Ating yupela ol Tolai i gat ol meri tasol i pulap long Rabaul na i wok long baim ol man? Noken baim ken ol man long narapela hap long pilai long tim bilong yupela. Tru tumas em bikpela sem long yupela ol Tolai stret ya.

Sapos yupela ol Tolai i laik baim ol man long pilai long tim bilong yupela, orait yupela i mas baim long Mosbi, Lae, Ramu o Kimbe long sait bilong yupela ol nambis lain.

Insait long hailens rijen, i tambu long baim ol man pilai long ol faivpela provins ya. Em tasol komplem bilong mi na sapos yu husat man o meri i laik sapotim o egensim rait i go tasol long Wantok niuspepa.

B. Sepso Tangial
Rabaul

Saonu - rot bilong Teptep pipel we?

Dia Edita,

Mi wanpela mangi long Yus Kaunsel eria long Kabwum distrik na mi laik salim dispela komplem bilong mi i go long nesenel membina bilong Kabwum na vais minista bilong Turis, Ginson Saonu.

Long planti yia i go pinis yu bin i stap olsem provinsel membina bilong Sapmanga Konstituensi na bihain long 1992 nesenel ileksen yu kamap nesenel membina bilong Kabwum na i kam inap long las yia 1997 nesenel ileksen yu kisim bek sia bilong yu.

Mi laik askim yu long tokaut klia lons wanem ol samting yu mekim pinis bihain long yu mekim planti tok promis insait long Mayndos Kalsarol So long Teptep wantaim ol arapela membina bilong Madang na Morobe wantaim olpela het

bisop bilong Evanjelikel Luteran Sios, Sir Getake Gam.

Long dispela taim yupela i bin mekim planti toktok na ol manmeri bilong dispela boda eria ol i amamas. Nupela membina bilong Raikos Stalh Musa tu bin i stap olsem Masta ov seremoni long dispela so na ol toktok na promis yupela i bin mekim em wara wasim.

Yu tok olsem yu bai wokim Wantuat/Teptep rot. Tasol mipela ol boda eria i no bin lukim kaikai bilong em. Ating mi ken tok olsem ol sevis yu givim long narapela tupela kaunsel eria tasol Yus Kaunsel eria i no bin kisim wanpela gutpela sevis. Mi no inap sutim han nating long lokal gavman kansol na presiden bilong mi bikos ol yet i nogat inap man long wokim wanpela samting. Pawa na disisen mas kam long membina.

Wanem taim stret bai dispela promis yu mekim i karim kaikai.

Mi laik askim Ginson Saonu olsem sapos em i pikinini Teptep em mas tingim ples bilong em bikos faiv yia em i promis nating na nau em i laik i stap neks faiv yia ken na mi raitim dispela komplem bilong mi.

Yu noken kam long ples na grisim mipela ol ples manmeri bikos yumi save we bilong politik em mas bai swit tasol kaikai bai i no inap kamap.

Wokim samting stret na bai mipela i ken amamas na long dispela kain pasin bai yu i stap longpela taim long palamen. Em tasol mi pikinini Teptep mi raitim na yu husat brata laik sapotim o egensim mi rait tasol long Wantok niuspepa na mi lukim.

Ishmael B. Tukun
LAE

Wanem wok bilong ol komuniti plisman long Lae?

Dia Edita,

Mi wanpela mangi long Lae, Morobe provins. Mi laik autim bel hevi bilong mi i go long gavman bilong Morobe provins long ol i lukim na harim na mas opim ai bilong ol na mekim wok stret.

Gavana bilong Morobe Luther Wenge i tokim mipela ol nupela Oksilari komiti plisman olsem mipela bai i go wok long ol setelman wantaim ol pipel.

Ol giamanim mipela na ol i no stretim kwik ol pepa wok. Ol isi isi tumas na mipela i stap longpela taim tumas na wanem taim tru bai mipela go na mekim wok. Mipela bin baim registra fi

pinis. Nau mipela wet i stap nating tru na harim olsem ol raskol i wok long mekim planti pasin nogut insait long Lae siti. Las wik tasol ol raskol i kilim nating tru ol famili long Malahang long bak sait bilong tinpis fektori. Dispela i no gutpela tumas long ol kain man i -stap na bagarapim laip bilong ol man meri pikinini long siti.

Olsem na yupela makim mipela ol Okseleli plisman long wokim wok long setelman orait yupela mas givim mipela oda bai mipela mas go hariap na kisim trening na sekim ol kain hevi olsem. Mipela ol komiti plisman i westim taim long kisim trening

na nogat wok.

Yupela ol wokmanmeri bilong gavman mas lukim dispela bel hevi bilong mi na wokim samting hariap nau. Em tasol liklik bel hevi bilong mi long westim taim bilong kisim skul long kamap komyuniti plisman.

Tenkyu na yu husat i laik bekim dispela pas o sapotim tok bilong mi orait rait kam hariap na bai ol wokman bilong gavman i luksave long dispela hevi nau.

Em tasol na God i blesim yupela olgeta.

Dapsy Minka
LAE

Angau haus sik i no bilong ol ples lain tasol

Dia Edita,

Mi wanpela meri bilong Morobe provins tasol nau mi stap long Tabubil. Long Krismas mipela bin go long holi de i stap na mi bin sik nogut tru na mi go long bikpela haus sik long Angau.

Mi go long ples bilong raitim kat na meri i stap insait long dispela opis i tokim mipela ol sik manmeri olsem. Sori mipela i no inap givim marasin long yupela ol lain i stap long taun. Em tok liklik marasin i stap em bilong ol

lain long ples tasol.

Sori yupela go painim marasin long Kemis o nogat long ol liklik haus sik. Na sapos ol manmeri pikinini kisim bikpela bagarap olgeta i laik dai na ol karim i go na ol tok olsem na rausim go kam i stap na ol dai, bai olsem wanem? Haus sik i stap bilong helpim mipela olgeta sik manmeri bilong graun i stap long Lae siti.

I no bilong helpim ol manmeri bilong ples tasol. Plis ol wokmanmeri bilong haus sik yupela

mas tingting gut pastaim na toktok na tu dispela membina bilong Morobe provins o Gavana Luther Wenge plis noken ai pas. Yu mas opim ai na lukluk long ol haus sik em bikpela samting.

Tenkyu em tasol bikpela wari bilong mi sapos yu husat brata o susa i laik sapotim o egensim mi, bai mi amamas long ritim toktok bilong yu Wantok niuspepa.

Dana Mono
TABUBIL

Oro provins nogat senis

Dia Edita,

Mi wanpela man bilong Oro provins. Mi stap long Lihir Ailan. Mi gat dispea bel hevi long membina bilong Oro provins. Ol pipel bilong ples i votim ol long bringim sevis i go long provins tasol nogat tru.

Long taim Papua Niugini i kisim independens i kam inap nau nogat wanpela senis i kamap. Ol haus bilong gavman long taim bilong Australia i bosim PNG i stap yet. Planti hap long provins ol haus sik, pos opis, gavman opis, hai

skul, na plenti moa, i stap na bus i karamapim.

Inap Simon Kaumi, Akoka Doe, Silvins Sehembo, mekim sampela samting. Luk olsem ol dispela olpela membina mas pinis na givim spes long nupela membina, bai ol i ken bringim senis i go long provins. Plis husat i laik sapotim mi, long tok bilong mi, mi amamas tasol long ritim long Wantok niuspepa.

JDS Daembo
KAVIENG

Ol bikman bilong PNGRFL mas skulim Rabaul

Dia Edita,

Mi wanpela mangi hailens na mi autim komplem bilong mi i go olsem.

Ol bikman bilong PNG Rugby Football League (PNGRFL) i mas skulim Rabaul Gurias.

Bikos las wik Sande ol olpela top pilai bilong Mendi Muruks i bin kam pilai long Kokopo na ol i bin lus. Ol kain bik nem pilai olsem Raymond Karl, Cetric Kengi na Samuel Pinpin ol i bin pundanin bal klostu klostu na i no bin pilai gut.

Olgeta strongpela tim bilong hailens i kam pilai ol i save bagarapim ol long kabang nogut olsem bipo tu. Planti taim mipela i save rausim ol Kabang nogut long get bilong kam insait.

Las wik Mendi Muruks i no inap lus tasol mipela ol hailens i stap longpela taim pinis long Rabaul mipela i save wanem kain pasin ol nambis man i save bagarapim ol pilai long kabang.

Mi laik toktok strong long yupela ol bikman bilong PNGRFL olsem yupela i mas givim strongpela toktok long Rabaul Gurias tim olsem noken yusim kabang nogut bilong bagarapim narapela tim.

Nogut ol bagarapim ol strongpela pilai bilong PNG Kumuls. Sapos ol i laik pilai, ol i mas pilai long strong bilong ol stret na noken yusim kabang nogut.

Em tasol na yu husat manmeri i laik sapotim mi o egensim mi rait i go tasol long Wantok niuspepa bai mi ken ritim.

John Toep Tene
Rabaul Pascol Boy.

Narokobi mas kamap Praim Minista

Dia Edita

NAU mi kisim maus bilong ol manmeri bilong Is Niu Briten na Wes Niu Briten na tok Oposisi lida Bernard Narokobi mas kamap Praim Minista bilong Papua Niugini.

Mi askim strong olgeta membina bilong Pangu, PPP na sampela PDM husat i no amamas long Praim Minista Bill Skate long lusim gavman na joinim Oposisi na fomim nupela gutpela gavman bilong dispela kantri.

Mi tok olsem bikos olgeta pipel bilong dispela kantri i save olsem Mista Skate bagarap pinis long sampela pasin nogut em i bin mekim olsem na ol i no laikim em i holim kantri wantaim pasin nogut bilong em.

Olsem na olgeta pipel bilong dispela kantri i pasim wanpela tok olsem Narokobi mas kamap praime minista na lukautim dispela kantri.

Em tasol na yu husat i sapotim o egensim mi plis rait i go long Wantok niuspepa bai mi redi long ritim.

Joel Senisen
Kimbe
W.N.B.P

Salim Wantok niuspepa long olgeta de

Dia Edita,

Mi stap long Bulolo na mi lukim ol manmeri long Bulolo, Wau na Mumeng distrik i gat bikpela laik long ritim Wantok niuspepa. Long Wau i gat Post Courier na The Nesenel niuspepa ol i save salim long Bulolo na Wau. Tasol i nogat Wantok niuspepa.

Tasol yupela i save tok Inglis em i no tokples bilong mipela ol manmeri long ples. Olsem na nau mi laik askim yupela long salim Wantok niuspepa long mi stret long adres boks 28 Bulolo na bai mi kamap ajen. Mi tok olsem bikos planti lain i laik

ritim Wantok tasol yupela save wokim Wantok long Fonde tasol. Dispela em i no gutpela.

Sapos em grasrut niuspepa tru orait raitim long olgeta de na mipela ol grasruts bai save long wanem samting i wok long kamap long olgeta de bilong wik.

Em tasol bikpela wari bilong mi na sapos yu husat i laik sapotim mi orait rait long Wantok niuspepa bai ol bod membina na menesmen i ken glasim na mekim sampela samting.

Mista Hun Neomp
BULOLO

MUTRUS RAGBI LIG NIUS



Eagles i askim PNGRFL long sekyuriti bilong ol pilaia

MT HAGEN Eagles i laik PNGRFL i mas lukluk long ol hevi i save kamap taim ol ragbi lig tim i go pilai long Wabag.

Tim menesa Paul Morris na kosa Simon Moi i autim dispela wari bihain long 4-pela biknem pilaia bilong Eagles i kisim bagarap. Ol pilaia em Max Tiri, David Gomia, James Kops na Stanley Sukot.

Insait long ripot i go long PNGRFL tupela opisal i askim PNGRFL long kamapim gutpela sekyuriti bikos ol sapota bilong Enga Mioks i save hambak liklik.

Kosa Moi i tok wanpela pilaia bilong Enga Mioks i kaikai iau bilong Max Tiri, wanpela pilaia i sanap antap long pes bilong David Gomia, Kops em ol i hetim em long nek bilong

em na Sukot em ol i takolim em long het.

Planti ol arapela takol tu i kamap, referi i no bin mekim wanpela samting long stapim dispela ol takol ya.

Moi i tok ol dispela sinia pilaia i kisim bagarap. Na dispela i no gutpela tumas bikos fainel i wok long kamap klostu ya.

Kosa i sutim tok i go long intanesenel referi Tony Kuni long i no lukautim gut gem. Na em i askim PNGRFL long noken larim Kuni i lukautim gem bilong Eagles long ol fainel i kamap.

Na em i askim tu PNGRFL long noken putim gem bilong Mt Hagen Eagles long Wabag gen.

Morris na Moi i laik PNGRFL

i mas lukluk gut long sekyuriti bilong ol tim husat i raun long Wabag. Ples bilong pilai i no gutpela tumas bikos ol sapota i save mekim ol tok pret long ol pilaia na sapota bilong tim ya.

Moi tu i singaut i go long referi asosiesen long makim ol gutpela referi. Sampela ol referi em ol i mekim tok pret na ol i no save mekim gut wok bilong ol.

Arapela samting tu, i gat wanpela o tupela referi i save wok wantaim Wills. Na planti taim ol i save wansait long mekim wok bilong ol ya

Kosa bilong Eagles i tok em yet i no amamas long we referi Tony Kuni i lukautim gem namel long Eagles na Enga Mioks.



• Stail pilaia na kepten Robert Tela i kisim solap long het taim em i putim nambawan trai bilong Mioks egensim Sentrel Lagatois.



• Nathan Piso bilong Enga Mioks i tromoi bal i go long wanpela sapot pilaia bilong em bipo long ol i daunim em.

Paga holim yet namba wan ples long PRL

PAGA Panthers i holim yet namba wan spot long poin lata bihain long ol i wiliwilim stret Magani 34-8 long bikpela gem bilong Mosbi Ragbi Lig las wiken.

Dispela win i helpim poin bilong Panthers long surik i go long 20 poin olgeta. Na tim i ran klostu em Post Puma husat i gat 14 poin.

Kosa bilong Paga Robert Jakis i amamas tru long ol boi bilong em. Tripela pilaia bilong em long Vipers Vincent Okole, Simon Rumat na Chris Lome i daunim ol yet na kam pilai long klap bilong ol.

Lome husat i wanpela strongpela pilaia bilong Vipers i kisim bagarap long nus bilong em taim Cedric Kengi bilong Mendi Muruks i paitim em taim em i slip long graun ya las wik.

Magani em wanpela strongpela tim. Tasol nau olgeta gutpela pilaia i ranawe na Ravu Solomon tasol i wok long strong na holim tim ya.

Colin Geno husat i go pas olsem kepten i wok long kamapim gutpela pilai tasol nogat sapot ya.

Insait long arapela gem, Hawks i daunim poin bilong Tarangau 20-10.

Tarangau i wok long slek nau na i luk olsem arapela tim olsem Paga Panthers, Royals, na Tigers bai kisim ples bilong ol.

Biknem primia klap bilong bipo long Mosbi, Difens i wok long kisim taim long ol arapela klap. Las wik, ol plisman i sutim nus bilong ol ami 20-12. Difens i lusim planti ol gutpela pilaia olsem Clement Marisa, Joe Gatana, Steven Soki na George Kele long Sentral Lagatois.

Kone Tigers i autim tiket bilong Post Puma 22-10. Na dispela win i surikim ol boi Tigers i kam long 5-ples long poin lata. Tupela guttaim pilaia Stanley Haru na Aquila Emil i poroman na kirapim paia stret bilong Kone Tigers ya.

Gerehu United i mekim save long Brothers 16-6. Ol Brothers i kisim gutpela sponsa tasol ol i no amamasim yet sponsa long wanpela win. Dispela poin bilong ol i kamap bikos ol i apil long Souths. Sapos nogat, ol tu bai kiau i stap inap sisen i pinis ya.

Dobo Warriors i waraim stret Wests 20-0 na Souths i wok long kirapim paia long PRL graun wantaim gutpela win stret egens long Waliya 30-26.

Lahanis mememim Vipers

GOROKA Lahanis i mememim Pot Mosbi Mutrus Vipers 24-14 long SP inta siti gem i kamap long Goroka las wik.

Dispela win bilong Lahanis i givim ol sans long surik i kam klostu long Vipers. Vipers i lus na dispela i bagarapim olgeta isi sans bilong em long pilai insait long fainel bilong inta siti kompetisen.

Ol pilaia bilong Lahanis olsem Kairo Makeso, Michael Tom, Atu

Isoi na Sandy Tipi i wok long kamapim gutpela gem stret long salensim ol biknem Vipers pilaia.

Long sait bilong Vipers James Naipao, Francis Pegu, Billy Kambao na Robert Tia i bin traime strong bilong ol tasol ol i no gat spes long putim trai ya.

I gat wanpela moa gem i stap yet na kompetisen bai pinis, Lahanis i no givim wanpela spes liklik long ol Vipers. Lahanis i

putim 5-pela trai na ol Vipers i bekim long tupela trai tasol.

Tupela tim wantaim i laik win, tasol ol Lahanis i wok long pilai gut long winim tupela poin ya. Ol mangi long Pom siti i nogat sans tru ya. Ol i wok long pilai kaskas na ol mangi long Goroka i winim ol.

Tupela pilaia bilong Vipers Dickson Sibia na Billy Kambao tasol i wok long pilai strong na planti ol arapela pilaia nogat ya.

LAE RUGBY LEAGUE DRAWS

SENIORS ROUND 9

JUNIORS ROUND 5

SP CUP ROUND 11 (FINAL ROUND)

Saturday June 13, 1998

Outside ground

9.00 U/19 Spiders vs Panthers
10.00 U/19 Magani vs Tarangau
11.00 U/19 Brothers vs Defence
12.00 U/19 Royals vs Tigers

Inside ground

9.00 B Brothers vs Defence
10.20 B Royals vs Tigers
11.40 B Spiders vs Panthers
1.00 B Magani vs Tarangau
2.20 A Brothers vs Defence
4.00 A Royals vs Tigers

Sunday June 14, 1998

Outside ground

9.00 U/17 Spiders vs Panthers
10.00 U/17 Brothers vs Defence
11.00 U/17 Royals vs Tigers

Inside ground

9.00 U/17 Magani vs tarangau
10.00 A Spiders vs Panthers
11.40 A Magani vs Tarangau
1.20 SP Ramu Crushers vs Central Lagatois
3.00 SP Lae Bombers vs Port Moresby Vipers

PORT MORESBY RUGBY
FOOTBALL LEAGUE

ROUND 12

Saturday June 13, 1998

9.30 U/19 Kone Tigers vs West
10.30 Res Defence vs Souths
12.00 A Kone Tigers vs West
1.30 A Defence vs Souths
3.00 a Hawks vs Gerehu United

Sunday June 14, 1998

9.30 U/19 Brothers vs Post Puma
10.30 A Magani vs Royals
12.00 A Brothers vs Post Puma
1.30 A Dobo vs Waliya
3.00 a Tarangau vs Paga Panthers

PRL Oval 2

Sunday June 14, 1998

9.30 U/19 Hawks vs Gerehu United
10.30 U/19 Defence vs South
11.00 U/19 Tarangau vs Paga Panthers
12.00 Res Hawks vs Gerehu United
1.30 Res Tarangau vs Paga Panthers
3.00 Res Brothers vs Post Puma

PRL Oval 3

Sunday June 14, 1998

9.30 U/19 Dobo vs Waliya
10.30 U/19 Magani vs Royals
11.30 Res Kone Tigers vs West
1.00 Res Magani vs Royals
2.00 Res Dobo vs Waliya

PORT MORESBY JUNIOR
RUGBY LEAGUE

Round 2 Draws

PRL Oval 3

Saturday 13 June, 1998.

Game 1.

9.30 U/12 Fuzzy Wazzy vs Knights

Game 2 10.15 U/12 6 Mile Tigers vs Reds
Game 3 10.55 U/12 Raiway vs Waigani
Game 4 11.35 U/14 Knights vs B'Roos
Game 5 12.15 U/14 Fuzzy Wazzy vs Balabadi
Game 6 12.55 U/14 Country Blues vs Tigers
Game 7 1.35 U/16 Fuzzy Wazzy vs Laloki
Game 8 2.15 U/16 Mainohana vs Lions
Game 9 3.00 U/18 Mainohana vs Laloki
Under 12 Bye: Tigers

Kone Tigers Oval

Saturday June 13, 1998

Game 1 9.00 U/14 Warriors vs Waigani
Game 2 9.40 U/14 United vs para
Game 3 10.20 U/16 Warriors vs United
Game 4 11.00 U/16 Knights vs B'roos
Game 5 11.40 U/16 6 Mile Tigers vs Reds
Game 6 12.20 U/18 Balabadi vs Pom Nat
Under 18 Bye: Lions

Kone Tigers Oval

Sunday June 7, 1998

Game 1 9.30 U/14 6 Mile Tigers vs Sharks
Game 2 10.15 U/14 Raiway vs Reds
Game 3 11.00 U/16 Sharks vs Para
Game 4 11.50 U/16 Country Blues vs Balabadi
Game 5 12.40 U/16 Raiway vs Waigani
Game 6 1.30 U/18 Country Blues vs Seagulls
2.15 U/18 Cardols vs B'Roos
Game 3.00 U/18 Pomis vs IDCE

SP CUP draw

1998 SP CUP COMPETITION

ROUND TEN RESULTS

Bulls 18 def Muruks 12
Tumbe 22 def Bombers 16
Lahanis 24 def Vipers 16
Eagles 58 def Crushers 14
Mioks 28 def Lagatois 20
Gurias 21 def Angras 16

Points Table

Teams	P	W	D	L	F	A	Pts
Eagles	10	8	-	2	300	186	16
Mioks	10	7	-	3	229	149	14
Bombers	10	6	-	4	211	147	12
Tumbe	10	5	2	3	206	181	12
Muruks	10	5	1	4	208	145	11
Vipers	10	5	-	4	279	202	10
Lahanis	10	5	-	5	190	170	10
Gurias	10	5	-	5	187	213	10
Angras	10	4	1	5	225	214	9
Bulls	10	3	1	6	156	254	7
Crushers	10	2	1	7	157	396	5
Lagatois	10	2	-	8	203	294	4

Round 11 Draw

Sunday June 14

Bulls vs Lahanis

(Kimbe) Ref: C. Balio

Muruks vs Eagles (Mendi)

Ref: M. Tolingling

Crushers vs Lagatois (Lae 1.15p.m)

Ref: W. Tukar

Bombers vs Vipers (Lae- 3.00pm)

Ref: W. Tovebae

Tumbe vs Gurias (Minj)

Ref: E. Kuman

Angras vs Mioks (Kundiawa)

Ref: S. Fareho

Tim bilong raun 14 long Nesenel Ragbi Lig gems long Australia. Ol pilaia bai kamap long Fraide (Jun 12), Sarere (Jun 13) na Sande (Jun 15).

FRIDAY:

Sydney City v Cronulla at Sydney Football Stadium (7.30pm)

ROOSTERS: Ivan Cleary, Jack Elsegood, Matt Sing, Richie Barnett, Robert Miles, Brad Fittler (c), Adrian Lam, Nigel Gaffey, Luke Ricketson, Scott Gourley, David Barnhill, Simon Bonetti, James Pickering. res: Julian Bailey, Bryan Fletcher, Nat Wood, Brendan Hurst.

SHARKS: David Peachey, Mat Rogers, Andrew Ettingshausen (c), Russell Richardson, Brett Howland, Mitch Healey, Blaine Stanley, Nick Graham, Nathan Long, Sean Ryan, Martin Lang, Dean Treister, Danny Lee. res: Tim Maddison, Jason Stevens, Luke Stuart, Wade Forrester, Nick Zisti, Ben Sammut, Colin Best (three to be omitted).

Ref: Bill Harrigan

SATURDAY:

Western Suburbs v Auckland at Campbelltown Sports Ground (3.30pm)

MAGPIES: Andrew Leeds, Darryl Fisher, Kevin McGuinness, Ken McGuinness, Jared Mills, Damian Kennedy, Brett Hodgson, Steve Georgallis, Scott Coxon, Darren Willis, Darren Fritz, Ciriaco Mescia, Harvey Howard. res: Aseri Laing, Chris Yates, John Skandalis, Travis Baker.

WARRIORS (subject to change): Matthew Ridge (c), Sean Hoppe, Anthony Swann, Nigel Vagana, Lee Oudenryn, Tea Ropati, Stacey Jones, Logan Swann, Stephen Kearney, Tony Tuimavave, Quentin Pongia, Aaron Whittaker, Joe Vagana. res: Kevin Iro, Brady Malam, Tony Tatupu, Tyrann Smith.

Ref: Eddie Ward

Melbourne v Adelaide at Olympic Park (7.30pm)

STORM: Robbie Ross, John Wilshere, Tony Martin, Aaron Moule, Marcus Bai, Scott Hill, Brett Kimmorley, Tawera Nikau, Robbie Kearns, Paul Marquet, Rodney Howe, Richard Swain, Glenn Lazarus (c). res: Paul Bell, Ben Roarty, Russell Bawden, Danny Williams.

RAMS: Deon Bird, Graham Appo, David Kidwell, Luke Williamson, Matthew Daylight, Chris Quinn, Noel Goldthorpe, Dean Schifilliti, Alan Cann, Tony Iro, Mark Corvo, Kerrod Walters (c), Marty McKenzie. res: Andrew Pierce, Andrew Hick, Adam Peek, Darrien Doherty, Rod Jensen, Sam Falaafi (two to be omitted).

Ref: Moghseen Jadwat

Parramatta v Manly at Parramatta Stadium (7.30pm)

EELS: Clinton Schifcofske, Paul Carige, Nathan Barnes, Stuart Kelly, Shane Whereat, Jason Bell, David Penna, Jim Dymock, Nathan Hindmarsh, Jarrod McCracken (c), Nathan Cayless, Steven Crouch, Dean Pay (c). res: John Simon, Brett Horsnell, Michael Vella, Dallas Weston, Julian Troy (one to be omitted).

SEA EAGLES: Craig Hancock, Alf Duncan, John Hopoate, Terry Hill, Albert Torrens, Cliff Lyons, Geoff Toovey (c), Nik Kosef, Daniel Gartner, Steve Menzies, Anthony Colella, Jim Serdaris, Neil Tierney. res: Craig Field, Andrew Hunter, Damian Browne, Adam Peters, Joe Taylor (one to be omitted).

Ref: Steve Clark

Penrith v Brisbane at Penrith Football Stadium (7.30pm)

PANTHERS: Peter Jorgensen, Fred Peterson, David Woods, Sid Domic, Robbie Beckett, Ryan Girdler, Brad Drew, Steve Carter, Jody Gall, Matt Adamson, Gordon Falcon, Brett Boyd, Mark Geyer. res: Tony Puletua, Darren Brown, Bobby Thompson, Morvin Edwards, Craig Wise (one to be omitted).

BRONCOS: Darren Lockyer, Michael Hancock, Steve Renouf, Darren Smith, Wendell Sailor, Kevin Walters, Allan Langer (c), Peter Ryan, Gordon Tallis, Brad Thorn, Shane Webcke, John Plath, Andrew Gee. res: Ben Walker, Phillip Lee, Kevin Champion, Petero Cionicivea, Michael Devere, Dennis Scott (two to be omitted).

Ref: Sean Hampstead

SUNDAY:

South Sydney v Gold Coast at Sydney Football Stadium (2.30pm)

RABBITOHS: Tim Brasher, Brendan O'Meara, Brett Rodwell, Chris Caruana, Simon Forest, Julian O'Neill, Darrell Trindall, Troy Slattery, Darren Burns, Jeremy Schloss, James Smith, Sean Garlick, Terry Hermansson. res: Craig Wing, Matt Parsons, Matt Munro, Ian Rubin.

CHARGERS: Andrew King, Jason Hudson, Graham Mackay, David Myles, Shane Russell, Scott Zahra, Craig Teevan, Scott Conley, Scott Sattler, Tony Durheim, Clinton O'Brien, Jamie Goddard (c), Steve Parsons. res: Tom O'Reilly, Danny McAllister, Gavin Whittaker, Adam Hutchison, Scott Thorburn, Wes Patten. (three to be omitted).

Ref: Mark Oaten

St George v North Queensland at Kogarah Oval (2.30pm)

DRAGONS: Lee Murphy, Nathan Blacklock, Mark Coyne (c), Jamie Ainscough, Jim Lenihan, Anthony Mundine, Matthew Rodwell, Wayne Bartrim, Lance Thompson, Darren Treacy, Luke Felsch, Nathan Brown, Corey Pearson. res: Colin Ward, Brad Smith, Jeff Hardy, Daniel Wagon.

COWBOYS: Dale Shearer, Kris Tassell, Josh Hannay, Noa Nadruku, Ray Mercy, Andrew Dunemann, Jason Ferris, Jason Death, Owen Cunningham, Kyle Warren, Ian Roberts (c), Steve Walters, John Lomax. res: Scott Prince, Glen Murphy, Dale Fritz, Mark Shipway.

Ref: Steve Chiddy

Newcastle v Canterbury at Marathon Stadium (2.30pm)

KNIGHTS: Robbie O'Davis, Jason Moodie, Matt Gidley, Owen Craigie, Adam MacDougall, Matthew Johns, Andrew Johns, Bill Peden, Peter Shiels, Neil Piccinelli, Paul Harragon (c), Lee Jackson, Tony Butterfield. res: Glen Grief, Brett Grogan, David Lomax, Danny Buderus, Mark Hughes (one to be omitted).

BULLDOGS: Greg Fleming, Gavin Lester, Shane Marteene, Steven Hughes, Daryl Halligan, Glen Hughes, Craig Polla-Mounter, Travis Norton, Robert Relf, Barry Ward, Steve Price, Jason Hetherington, Darren Britt (c). res: Scott Wilson, Mitch Newton, Tony Grimaldi, Simon Gillies.

Ref: Tim Mander

North Sydney v Canberra at North Sydney Oval (2.30pm)

BEARS: Matt Seers, Nigel Roy, Ben Ikin, Michael Buettner, Brett Dallas, Greg Florimo, Jason Taylor (c), Billy Moore, David Fairleigh, Glen Morrison, Steve Trindall, Mark Soden, Gary Latson. res: Paul Stringer, Scott Pethybridge, Mark Reber, Willie Leyshon, Sean Rutgerson, Joel Wilson (two to be omitted).

RAIDERS: Ken Nagas, Geoff McNamara, Brandon Pearson, Ruben Wiki, Lesley Vainikolo, Laurie Daley (c), Ricky Stuart, Jason Croker, David Furner, Ben Kennedy, Tony Brann, Simon Woolford, Brett Hetherington. res: Luke Davico, Brad Clyde, Luke Priddis, Mark McLinden, David Boyle, Andrew McFadden (two to be omitted).

Ref: Brian Grant

Illawarra v Balmain at WIN Stadium (2.30pm)

STEELERS: Luke Patten, Rod Wishart, Craig Simon, Paul McGregor (c), Jonathon Britten, Trent Barrett, Will Robinson, Brad Mackay, Terry Lamey, Andrew Hart, Craig Smith, Andrew Purcell, Chris Leikvoll. res: Dean Callaway, Craig Fitzgibbon, Scott Cram, Craig Wilson.

TIGERS: Shannon Nevin, Laloa Milford, William Kennedy, Jason Webber, Greg Donaghey, Michael Gillett, Shayne Dunley, Hudson Smith, Mark O'Neill, Mark Stimson, Paul Sironen (c), Darren Senter, Shane Walker. res: Tia Liavaa, Ben Duckworth, Adam Nable, Brendan Magnus.

Ref: Paul McBlane

MUTRUS RAGBI LIG NIUS



Vipers na Muruks i gat las sans

HENRY MORABANG i raitim

TUPELA strongpela gem bilong inta siti bai stap namel long Mt Hagen Eagles na Mendi Muruks. Na narapela gem em namel long Pot Mosbi Vipers na Lae B52 Bombers long dispela wiken.

Muruks bai laik winim dispela gem bikos sapos em i lus, turangu, em bai baibai long 1998 sisen.

Oi biknem pilaia olsem Raymond Karl, Cedric Kengi, Anton Mal, Thomas Undupia, Timon Mosebuya na Petrus Thomas bai pas long Muruks. Na long sait bilong Eagles, boi ros

Max Tiri, David Gomia, James Kops, Stanley Sukot, Elias Kamiak bai traim stapim win bilong Muruks.

Tupela sait wantaim i gat strongpela fowat. Karl i wok long kamapim gut nem olsem namba wan fowat insait long kantri. Tasol asua bilong em nau em i gat liklik hevi long skru bilong em.

Yangpela Kengi i save givim gutpela sapot pilai stret long Karl. Sapos dispela tupela man i poroman, sori tumas, Muruks bai stap long fainel ya.

Muruks bai winim yet Eagles bikos em i asples ya.

Vipers bai bungim Bombers. Em i las sans bilong Vipers. Sapos ol i lus, sori tumas, biknem bilong i popaia.

Vipers i gat liklik hevi long ol senis i kamap. Olgeta wik i save i gat ol nupela pilaia, na dispela em i asua bilong kosa Adrian Genolagani. Arapela samting tu ol selekta Peter Bebi, Brian Singut na Billy Wartovo i no mekim gutpela seleksen.

Sapos ol i tingting long win, Vipers i mas makim ol gutpela pilaia long dispela wiken. Oi Lae Bombers bai i no isi ya.

Oi mangi Morobe ya i les pinis

long lus, na ol bai givim strongpela gem stret long ol boi Pom siti.

Kepten bilong Vipers James Naipao, Kiap Rumints, Francis Pegu, Michael Marum, Norris Selu bai kamapim strongpela salens stret ya.

Kosa bilong Bombers Steve Malum i laikim win olsem na em bai putim strongpela tim stret. Malum em olpela kosa bilong Vipers na em i save long kain stail bilong ol Vipers bai mekim.

Bombers i gat ol pilaia olsem Andrew Pora, Philip Erike, Draby Joseph, Gilbert Joseph, Braun Wilby, David Glipu na Eddie Mark

long winim gem ya.

Long ol arapela gem, Goroka Lahanis bai autim tiket bilong ol Kimbu Bulls. Maski em asples bilong ol Bulls, ol mangi Apo bai traim strong bilong ol wel pam bilong Wes Nu Briten.

Maski Paul "maliau" Nelson, Max Meia, Patrick Sogi, Albert Gorea na Nason Lavat i stap long tim, ol Lahanis i gat nem long kamapim las minit gem long autim tiket bilong ol birua ya.

Sentral Lagatois bai salensim Ramu Crushers. Sentral Lagatois bai kamapim strong gem long rausim nem nogut ya.

Mioks na Eagles i winim pinis spes long fainel

HENRY MORABANG i raitim

ENGA Cambridge Miok na Mt Hagen Cambridge Eagles i winim pinis spes long fainel bilong SP inta siti ragbi lig kompetisen.

Mioks i winim Sentral Lagatois 28-20 na Eagles i flai abrusim Ramu Crushers 58-14 long suga taun, Ramu. Maski tupela tim ya i lus, ol i redi tasol long salensim wanem tim i kamap long fainel.

Long dispela wiken, Mioks bai pilai long Kundiawa egens long Simbu Angras. Angras i nogat sans tasol sapos ol arapela tim i lus, em bai go yet long fainel ya.

Oi boi Enga i soim pinis pawa bilong olsem, ol tu i save pilai ragbi lig ya. Oi i wilwilim ol mangi Papua wansait stret.

Kepten Thomas Nema i soim ol selekta bilong Kumul olsem em tu i gat namba ya. Sapos ol i no painim wanpela fowat, Nema bai amamas tru long putim namba 8 c namba 10 jesi bilong PNG Kumul.

Oi lain bilong Angras i no gat biknem Oi bai traim wankain stail tasol long bungim ol Mioks.

Mt Hagen Eagles i gat bikipela salens stret ya taim ol i bungim Muruks. Muruks i mas winim dispela gem, sapos nogat, ol bai aut olgeta long inta siti kompetisen ya.

Eagles i no wari. Oi boi Kange i sempion na redi tasol long bungim wantaim ol tim i soim pes long Rabiemul oval ya.

Oi arapela tim, Bombers, Tumbe, Muruks, Vipers na Lahanis i gat liklik sans long stap insait long fainel. Oi dispela tim i mas winim gem bilong sapos ol i laik stap insait long fainel ya.

Bombers bai salensim Vipers, Muruks bai bungim Eagles, na Tumbe i gat sans long autim tiket bilong Rabaul Guria bikos ol bai pilai long asples yet ya, Minj.

Opis bilong PNGRFL i tokaut pinis olsem 5-pela tim tasol bai stap insait long dispela fainel. Olsem na ol las gem bilong inta siti bai paia stret bikos ol tim i laik winim spes long fainel ya.

Tripela tim Bulls, Lagatois na Ramu Crushers i pinis nau. Oi bai i nogat sans long pilai long gren fainel ya.



• Hafbek bilong Muruks Timon Mosebuya i redi long pasim bal.

Bai na Wilshire i bosim wing bilong Melbourne Storm

TUPELA mangi Papua Niugini Marcus Bai na John Wilshire bai lukautim winga posisen bilong Melbourne Storm long Sarere. Storm bai bungim Adelaide Rams long bikipela gem long dispela wik.

Bai i save pilai A gret, tasol yangpela boi Butibam long Morobe, John em i namba wan taim bilong em long joinim Bai long A gret. John em hapkas Australia na Butibam.

John i bin pilai pinis long nesenel tim taim ol i raun long Nu Silan na Australia tripela yia i go pinis. Em wantaim brata bilong em, William i joinim Kumul long Nu Silan ya.

John em i pilai las yia wantaim Western Reds na nau em i joinim Melbourne Storm. Tasol brata bilong em William, i stap yet long Western Reds.

I luk olsem tupela brata bai salensim ol yet long dispela wik Sarere ya.

John em i gat 20 krismas, na i bin pilai 4-pela taim long sinia A gret futbol long Perth. Nau yet em i pilai long Brisbane Norths long Kwinnsen Stet Lig. Em i top long putim ol trai ya.

Dispela em bai namba tu traim tupela Papua Niugini pilaia i pilai wantaim long sem tim. Long 1978, Arnold Krewanty na Dairi Kovae i poroman long Newcastle Knights. Tupela i pilai wanpela sisen tasol na kambek gen. Kovae i bin joinim North Sydney pastaim na bihain em i kam pilai long Newcastle Knights.

MUTRUS

Rugbi Lig Nius



• Bogenvil soka skwat.



• Boana Soka skwat.



• Mendi soka skwat.

**OL TIM
HUSAT I
PILAI LONG
NESENAL
PNGFA
SEMPIONSIP
LAS WIKEN**



• Stail golkipa bilong LFA, David Peter husat bin sevim tupela penalti gol winim PMSA long qualifai long grenfainel. Dispela poto i soim em sevim wanpela gol pinis. LFA win 5-3.

Ol poto: Franco Nebas



• Wabag soka skwat.




• Simbu soka skwat.



• (NCDC) PSSA soka skwat.

Pilaia profile



Nem - Violet W Aopi

Spot - Volibal

Klab - Raukele Pom

B/dei - July 30, 1980.

Marit / singel - Singel

Niknem - Slozer

Feveret kaikai - Spagetti Bolognese

Fes tim - Raukele Pom

Fes posisen - Bek kot

Yu save mekim wanem long fri taim bilong yu? Lukim TV na ridim buks

Wanem spot yu laikim taim yu mangi? Athletics

Husat em hiro bilong yu long dispela spot? Carl Lewis

Wanem tim yu i bin bihainim? American 100 mita tim

Wanem senia pilaia i bin helpim yu planti taim? Hazel Vovote

Husat oposien pilaia i bin givim yu hat taim long gem? Dorothy Kivung

Husat em namba wan pilaia long ol tim mets bilong yu? Kila Okirua

Wanem eria long gem bilong yu nidim moa sapat? Pawa hit bilong mi

Yu laik kamap wanem long bihain taim? Mi laik kamap akunten.

Piksa na stori Joe Ivaharia

Pele i kepten bilong Wol tim

MOA long 250 niusman bilong soka i makim pinis Wol tim bilong 21st Century. Pele yet bai go pas olsem kepten.

Wol tim em Lev Yashin (Soviet Union - golkipa), Carlos Alberto (Brazil - difenda), Franz Beckenbauer (West Germany - difenda), Bobby Moore (England - difenda), Nilton Santos (Brazil), ol midfilda em Cruyff (Netherlands), Alfredo Di Stefano (Argentina) and Michael Platini, ol straika em Pele (Brazil), Garrincha (Brazil) na Maradona (Argentina)

Dispela tim i soim olsem taim ol i holim bal, bai i nogat wanpela tim i ken rausim bal long ol.

Taim ol i askim Pele, yu ting wanem arapela pilaia bai kamap namba 12 pilaia long tim. Na em i bekim olsem, long makim tim i hat tru bikos planti ol gutpela pilaia bai i no inap stap long seleksen.

Pele i tok sapos em i laik makim, em bai



makim wan pilai bilong mi Coutinho. Tupela wantaim i save pilai long Santos.

"Dispela man em laip bilong mi, em tasol i stap na mi wokim nem na mi stap nau".

Di Stefano bai 72 krismas neks mun, na i bin Yuropien Pilaia ov da Yia long 1957 na 1959 i tok, Paco Gento, husat i pilai long olgeta siksipela Real Madrid's Yuropien Cup long 1950s na 1960s

Carlos Alberto husa i keptenim Brazil long 1970 Wol Kap fainel i tok "Paul Breitner bilong Jemani na gut-

pela pren bilong mi, Socrates i mas stap tu long tim ya."

Santos husait i gat 73 krismas nau i tok tripela gutpela midfilda bilong Brazil Didi, Gerson na Zizinho tu i ken stap long wol tim.

Sampela ol biknem soka pilaia husat i no laki tumas long stap longwol tim em Ferenc Puskas (Hungary), Bobby Charlton (Inglan), Gerson na Zairzinho (Brazil), Eusebio (Portugal) na Marco Van Basten (Netherlands).

Pilaia profile



Nem -

Dianne Raka

Klab -

Waliya soka klab

Spot - Soka

B/dei -

Novemba 15, 1979

Marit/singel

Singel

Niknem - Dee

Feveret kaikai -

Potatoe salad

Fes tim - Sobou

soka klab Lae

Fes posisen -

Straika

Bikpela memori

long pes gems

bilong yu -

Skoarim wining

gol long extra taim

egens Bulolo long

Morobe wimens soka

tounamen long 1997.

Long wanem spot yu laikim taim yu mangi?

Soka

Wanem namba wan pilai yu save laikim? PNG

straika Martha Raka.

Yu ken tingim wanem pes gren fainel yu bin lukim? Waliya

Lae pilaim Guria Pom long 1995

klab sempionsip na Waliya win.

Husat senia pilaia i bin helpim yu planti?

Martha Raka

Husat oposien pilaia save givim yu bikpela salens? Betty Ronuc

bilong Morobe United Lae.

Husat em top pilaia long ol tim mates bilong yu?

Boura Kori

Taim bilong yu long pilai soka pinis, how bai yu laikim ol long tingim yu? Sapotim devolment bilong soka.

Wanem samting i helpim yu bikpela long live bilong yu? Lusim simuk na kaikai buai.

Wanem samting yu laik mekim long bihain taim? Kamap Nesenol Kosa.

Franco Nebas i raitim

US\$1 milien long sapatim Charity projek

WANWAN pilaia husat i sutim tripela gol long wanpela gem bai kisim US\$1 milien long sapatim ol Charity projek long kantri bilong ol.

FIFA i wok long sapatim dispela prais mani em McDonalds bai putim olsem long kirapim laik bilong ol pilaia long putim moa gol.

Ol bai givim olsem US\$10,000 long namba wan raun na US\$1 milien bai go long SOS Childrens Viles.

FIFA tu i sapatim ol arapela nupela awot olsem adidas golden bal, fair play awot, the most entertaining tim na bes golkipa.

Just Fontaine i holim yet rekot bilong namba bilong ol gol em i skorim wantaim 13 straik. Na golden bal awot i bin go long Paolo Rossi, Deigo Maradonn, na Toto Schillaci, na Romario.

Fair Play awot i bin go long Brazil na tu ol i makim Brazil olsem gutpela tim i save mekim gutpela pilai.

FIFA tu i laik kamapim awot bilong husat bai putim gol wantu tru bihain long whistle. Vaclav Maseks bilong Rasia i putim gol 15 sekens bihain tasol long wisel i stat egens long Mexico long 1962 na Bryan Robson bilong Inglan i putim gol 27 sekens tasol wisel i stat long 1982 egens long Frans.

Blatter kisim ples bilong Dr Havelange

INTANESANEL soka bodi, FIFA i makim olpela sekretari jeneral Sepp Blatter olsem nupela presiden insait long wanpela miting las wik.

Blatter i kisim ples bilong Dr Jaoa Havelange husat i pinis wok bihain long em i stap presiden 24 krismas olgeta. Dro Havelange i gat 82 krismas.

FIFA Kongres i makim Blatter bihain long strongpela kempen em wantaim birua bilong em Lennart Johansson i bin mekim. Johansson i ting em bai win tasol Blatter i autim tiket bilong em long 111 vot olgeta. Johansson i gat 80 vot tasol.

I gat rul long holim vot tupela taim, tasol namba bilong namba wan vot i bikpela tru olsem na i no gat seken vot.

Blatter nau i holim wok na bai redi long holim Wol Kap we i gat 32 tim olgeta i stap resis long winim Kap long Brazil.

Moa long 37.5 bilien manmeri bai lukim dispela opening bilong Wol Kap long TV.

PORT MORESBY NATIONAL YOUTH SOCCER CUPS CHALLENGES

6th July to 11th July 1998

Sir John Guise Stadium Port Moresby.

Age Groups U7 to U17.

Round Robin/Knockout Tournament.

For Cup and Plate Trophys.

Age Group National Titles to be won.

Teams from all Provinces are challenged to attend.

Port Moresby Schools Soccer Regulations apply with FIFA rules.

Register your team for 1998 or book your place for 1999 by filling in the form below and return complete with registration fee on a first come first served basis. Visiting Teams shall have high priority. Registrations to close on the 19th June 1998.

Entry Form

Port Moresby National Youth Soccer Cups

Contact Name	Address
School Club	Fax
Phone	
Sponsors Name	Address
Teams to Attend	U7 <input type="checkbox"/> U8 <input type="checkbox"/> U9 <input type="checkbox"/> U10 <input type="checkbox"/> U11 <input type="checkbox"/> U12 <input type="checkbox"/>
Age as at 1 Jan '98 (Tick the box)	U13 <input type="checkbox"/> U14 <input type="checkbox"/> U15 <input type="checkbox"/> U16 <input type="checkbox"/> U17 <input type="checkbox"/> U17 Girls <input type="checkbox"/>
Total Registration Fee (K30 per team)	
Year of Attendance (Tick the box)	1998 <input type="checkbox"/> 1999 <input type="checkbox"/>
Further information will be provided only upon receipt of both Entry Form and Registration Fee.	

Post/Fax form to: **The Chairman**
Port Moresby National Youth Cups
P.O. Box 35
Waigani, NCD.
Fax 326 0722 / 301 3139(b)
Ph 326 0722 / 301 3264(b)
Attn: John Mogi

or **The President**
Port Moresby Schools Soccer Assoc.
P.O. Box 1948
Boroko, NCD.
Fax 325 4614 / 325 0091(b)
Ph 325 4614 / 325 6033(b)
Attn: Joe Heenan

Bogainvil i kamap top soka tim long PNGFA Kap sempionsip

FRANCO NEBAS i raitim

Bogenvil Soka Asosien i kamap namaba wan tim bilong PNGFA kap taitel long Lae las wiken.

Ol opisel i bin makim Bogenvil long kisim dispela gutpela pilai tropi (Fair-Play trophy) bihain long ol i kamapim gutpela pilai na i nogat bel kros.

Dispela yia em namba wan taim bilong tim long Bogenvil i kamap long soka resis bilong PNGFA. Buka o Arawa bipo i gat nem long soka. Tasol ol i no bin salim tim i kam aut long ailan bikos long trabel i bin kamap long ol bihain long Panguna main trabel.

Tim bilong Bogenvil i bin stap long pul A. Ol i bin rausim trasis bilong PSSA 3-1, Mendi 2-1, Kaiapit 1-0, dro wantaim Mt Hagen 1-1 na Wewak 0-0 tasol ol i lus long LFA 3-0 na Koupa 2-0. Dispela ol skoa i soim olsem level bilong soka i wok long strong het ya. Ol i bin kamap namba tri bihain long tonamen bikos long gol pesentes.

Tim menesa Michael Tomun i tok Wantok olsem em i amamas stret long gutpela pilai ol boi bilong em putim aut. Maski planti yia i go pinis na i no gat soka kompetisen, ol boi i soim yet olsem stail bilong kik i stap yet.

Em i tok olsem, "Mi bai amamas



• Bogenvil tim long Nesenel PNGFA sempiosip long Lae las wik. Ol i winim 'Fair Play' awot. Poto: Franco Nebas.

tru sapos sampela long ol bois bilong mi stap insait long PNG tim. Dispela ol mangi em ol bilong ples tasol mipela i kisim ol i kam na pilai long dispela PNGFA kap resis".

Kosa Hubert Sareke tu i tok

amamas long kam bek ken na pilai insait long dispela PNGFA kap resis bihain long 10 pela yia. Em i tok olsem dispela wokabaut i kam long soka em hap bilong rihabilitesen program.

Sareke i wanpela olupela pilai bilong PNG tim husat i winim bronz medal long 1987 Saut Pasifik Gems long Noumea, Nu Kaledonia.

Sareke i tok tu olsem, "Dispela

ol pilai em ol mangi long ples stret mipela i makim long karim nem bilong Bogenvil. Mipela i no ting olsem bai ol mekim gut tasol ol i soim olsem ol i gat skil bilong ol i stap yet".

Wokabaut bilong Bogenvil tim i kos olsem K20,000 olgeta. Sareke i laik mekim bikipela tok amamas i go long sapot em ol lain i givim-primia bilong Bogenvil Gerald Senato, Bogenvil Tensisenel Gavman, Divisen bilong Komyuniti Sevises, Buka Entaprais, Alaing Pac, KMR tyre sevis, SP holdings, Kinakon Konstraksen, United Konst, Jomik, Liku trading na Samu Sevi Stesen.

Na tu long Bougainville kominiti long Lae, Schorncliffe, Unitech na Justin Helele long ples bilong silip na kaikai long stap bilong ol long Lae. Ol bai lusim Lae long Fonde na go bek ken long Bougainville via Mosbi.

Long dispela taim yet ol opisal husat i bin kam wantaim skwat em, Michael Tomun

(tim menesa), Chris Goaman (namba tu), Hubert Sareke (kosa), Barnabas Matanu

(tim Dokta), Joe Maineke (EO) na Simon Garana olsem nius man bilong ol.

Long arapela nius Bougainville bai holim neks PNGFA kap sempionsip.



• Sori tumas Lahi, traime gen neks yia. Poto: Franco Nebas.

Bougainville makim wimen soka skwat pinis

BOGAINVIL Soka Asosiesen i makim pinis strongpela wimen skwat long pilai insait long nesenel sempionsip long Wabag. Dispela sempionsip bai kamap long neks mun Julai 23-26.

Long las wiken, BSA i salim skwat bilong ol man i kam pilai insait long PNGFA kap long Lae. Dispela ol skwat i olsem rihabilitesen program Bogainvil. Soka skwat bilong ol man i soim tru olsem maski ol i no pilai longpela taim, tasol stail bilong kik i stap yet long blut.

Long sampela gems bilong ol, BSA i bin mekim sampela biknem tims i wari taim ol i winim ol. Dispela i soim olsem nogut ol meri bilong ol i kam na bagarapim sindaun bilong arapela sentas na karim taitel igo long Bogainvil.

Bogainvil em wanpela strongpela soka senta bipo long ol trabel i kamap long Panguna. Bipo ol i save pilai aninit long nem, Arawa o Not Solomon Ailan.

Skwat bilong ol em; Wendy Kevi, Everlyn Tatsoere, Emmaculate Kopan, Stellan Tsigoto, Judith Gola, Noelen Mangasa, Geraldine Motei, Florence Soli, Rayleen Meteri, Wendy Sawa, Joyceleen Kiria, Freda Samou, Joycelyn Rehoni, Cathy Tanikisi, Aida Tobiana, Josephine Kitts, Celestine Kiroha, Mai Okin, Teha Ririana,

Kunai Lasi (Ellen), Georgina Lasi, Irene Tsigoto, Evodia Tukana na opisals Chris Siriosi (tim menesa), John Angamata (namba tu menesa), Erik Riku (kosa/trena), Daniel Bokaur / Paul Wowo (refiri / tech) na Joe Baito (EO).

Telikom bai kisim strongpela salens long Normads long Pom wimen soka

FRANCO NEBAS i raitim

KOMPITISEN lida Telikom bai kisim strongpela salens long Normads long Pot Mosbi wimen soka kompetisen long sande. Dispela pilai bai kamap long Bisini Oval

Telikom em wanpela tim long kompetisen bilong ol meri husat ino bin lusim wanpela gem yet bihain long 6-pela gem ol i pilai. Dispela i lukim ol i sindaun antap long leda wantaim 18 poinis, ICF University 13, Normads 11, TST Stars 10, Bomana Blue Kumuls 8, Sobou 7, Wanzesi 6, Tarangau 3, Naniu 2 na F.B.H Defence 1.

Long sande bai ol i bungim Normads

husat nau i wok long ron namba tri long poinis leda. Normads bai traime long stapim dispela ron bilong Telikom long go het moa long win.

Tasol dispela tu bai ino nap isi bikos ol meri Telikom istap long mak bilong winim gen taitel long dispela yia. Kosa bilong ol Francis Moyap husat i kam bek gen long pilai long PNGFA kap las wiken long Lae bai traime long redim ol gut long dispela gem.

Ol i gat ol namba wan pilaias olsem Nellie Taman na Margaret Aka husat bai ron long frant lain long skoarim gol i go insait long umben bilong ol Normads. Tasol dispela bai ino inap isi bikos ol lain difendas bilong Normads olsem, Betty Babaga na Diane

Sep bai lukaut long tupela na hariap long rausim bal bipo ol bai traime sutim gol.

Tupela Babaga na Sep em tupela hap meri nogut long bek lain we bai Telikom traime hat long go skoa.

Long Normads em Fiona Soso na Susan Ando bai kombine gut wantaim flanka bilong tupela Lynette Bito long skoarim gol igo insait long umben bilong Telikom. Tupela ya bai ron olsem simuk balus na sapos ol beklain bilong Telikom Phoebe Rarabun, Jinx Wambot, Julie Michael na Patricia Siwin ino lukaut gut bai net bai guria. Ando em wanpela gutpela flanka we husat i ken tanim difens igo long atek.

Long helpim ol em bai tupeia midfil Karen



Dani na Sandra Marasi.

Long Telikom tu igat Tabitha Suwae na Julie Alau husat bai igo pas long midfil na flanks bai Catherine Alau na Geraldine Eka. Dispela ol lain meri em ol strongpela lain we save tanim difens igo long atek na setim straike bilong ol long skoarim gol.

Ol tu i gat stail long mekim ol birua i wari taim ol painim gutpela spes long traime gol mak.

Long arapela ol gems, University bai traime bun wantaim Tarangau, Sobou bai wip wanatim TST Stars na long Sande Wanzesi na Blue Kumuls bai traime bun na FBH Difence bai traime autim Naniu.

WANTOK SPOT



Lus bilong Mosbi i asua bilong PMSA eksekyutiv, Komet i tok

YAKAM KELO i raitim

AS long Mosbi soka tim i lus long nesenel soka sempionsip las wiken long Lae i stap long eksekyutiv bilong PMSA, olpela PMSA anda 17 menesa na kosa presiden bilong Difens soka klap Komet Parkop i tok.

Komet i tok em i no amamas tru long eksekyutiv bilong PMSA long kamapim nem bilong PMSA skwat long las minit tru we olgeta senta i redi pinis wantaim skwat bilong ol long dispela nesenel taitel long Lae.

Komet i tok dispela las minit nem bilong skwat i no mekim hat tru long ol yangpela na nupela pilaia. Bikos ol i no inap save gut long pilai wantaim ol eksperiens na olpela pilaia bilong skwat olsem Francis Moyep, Wesley Waiwai, Geoffrey Emang, Willie Bera, Steven Mune na ol arapela husat i stap long skwat.

Komet i sutim tok stret long PMSA eksekyutiv long i no bin tokaut long skwat hariap bai ol soka sapota long Mosbi i ken lukim na autim tingting bilong ol na tu kosa i ken skelim skwat bilong em na kamap wantaim gutpela lain ap bilong em.

Bos bilong Difens soka klap i tok em i bin stap long Mosbi soka 20 krismas olgeta nau na em i no save lukim wanpela kain pasin olsem bipo long PMSA skwat. Dispela em i narakain pasin olgeta we nem bilong skwat i hait i stap inap wanpela o tupela de tasol i stap long tim i go long tonamen, orait ol i tokaut.

Sapos nem bilong skwat i bin kamap longtaim, bai planti toktok beksait o oposisen i ken kamap. Ol tok-tok oposisen i gutpela long stretim na strongim skwat na tu i ken helpim eksekyutiv na kosa long stretim gut ol yet na tim bilong ol, Komet i tok. Olsem na maski long hait nabaut na mekim dispela kain pasin pret, em i tok.

PMSA soka tim i no bin wokim gut long las wiken nesenel soka sempionsip long Lae. Ol i bin lus long LFA tim long penalti sut aut. Na LFA i go het na pilaim gren fainel na winim egensim Lahi, husat em sempion bilong las yia.

PMSA i save gat nem long winim dispela nesenel taitel na ol arapela senta i save pret long pilai egensim PMSA. Na tu PMSA i gat planti eksperiens na ol gutpela pilaia i stap. Tasol ol i no bin kamapim dispela win we planti sapota na manmeri b'long Mosbi i ting bai ol i kamapim.

Komet i tok em i no gat wanpela tingting nogut o krangki egensim ol pilaia bilong PMSA. Tasol em i egensim tru pasin eksekyutiv bilong PMSA i bin mekim long taim bilong makim na redim skwat long las wik nesenel taitel.

Em i tok sapos Mosbi tim i bin go long gren fainel samting bai i orait. Long 1995, Joe Saleu i bin kisim wanpela developmen skwat bilong PMSA na ol i go olgeta insait long gren fainel na lus long LFA. Dispela i soim olsem dispela developmen skwat i bin i gat inap taim bilong trening na redim ol yet. Olsem na sapos PMSA i ken mekim olsem, i no gat as em bai drop aut long namel bilong gem na i no long gren fainel, Komet i tok.

Em i salensim dispela eksekyutiv bilong PMSA long mekim gut wok bilong ol na noken pilai pilai long Mosbi soka.

Komet i tok em i stap olsem 20 krismas olgeta wantaim Mosbi soka em i save long histri bilong Mosbi soka i kam inap nau. Olsem na PMSA eksekyutiv i mas mekim gut wok bilong ol gut bihainim amamas na interes bilong soka long Mosbi.



LFA em i nupela sempion bilong PNGFA

FRANCO NEBAS i raitim

MOA long 2000 manmeri i bin kamap long lukim gren fainel bilong PNGFA namel long LFA na Lahi long Mande. LFA i soim olsem em i king yet bilong soka long Morobe taim em i autim tiket bilong susa soka asosiesen, Lahi 1-0. Long lsta wiken, LFA i soim olsem ol bos taim ol i winim Morobe Soka Federesen kap.

LFA i bin stap long dispela kik resis olsem tim i no gat nem. Bikos nau yet planti ol pilaia i lusim asosiesen na joinim Lahi ya. Lae i bungim Lahi long gren fainel bihain long em i autim tiket bilong Pot Mosbi 5-3 long penalti sut-aut. Ol boi long Sir Ignatius Kilage i kisim taim long ol Mt Hagen tasol eksperiens bilong ol-tasol i mekim na ol i win 2-0.

Gren fainel i bin kamap gut tru maski bikpela ren i bin pundaun na bagarapim soka fil. Tupela tim wantaim i traime long lukautim bal long taim ol i pasim long ol poroman bilong ol.

Tupela sait wantaim i putim strongpela pilai long difens na atek. Lahi i planti sans long putim gol tasol kik bilong ol i abrus. Ol midfilda Richard Daniel, John Koris, Alwin Nema na John Laskam i trai hat tru long setim tupela straika Yakam Kipu na John Kalin tasol ol birua bilong i sambai pinis long rausim bal ya.

Straika bilong LFA Jack Jonathan wantaim Duta Yema na winga Ken Gule tu i mekim wankain long sait bilong ol tasol nogat sans long gol i kamap long pes hap bilong gem. Long seken hap tu i luk wankain we difens i moa strong na pilai i wok long go moa hat long lukim gol bai kamap. Dispela i mekim na sindaun bilong ol sapota i no stret we ol i wok long stap isi tasol nau long ol pilaia i mekim save long traime mak long putim gol.

Gem i bin luk olsem bai surik moa igo wantaim narapela 10 minit o penalti sut-aut bai kamap tasol dispela i no tingting bilong ol boi long LFA bikos ol i laik sutim gol i go insait na lukim

umben i seksek. Kosa bilong LFA Max Foster i lukim olsem gem i wok long go moa strong na hariap tasol i mekim senis long straika bilong em Joe Tomalin kam autsait na yangpela Steven Koivenekere i kisim ples bilong em.

Koivenekere i hangere i stap long putim gol na i no westim taim na i suwim het i go insait long gol eria bilong Lahi long skoarim gol. I no long taim wanpela gutpela bal kam long ol beklain bilong em i go long hap bilong ol birua we ol i resis long kisim dispela bal.

Swipa bilong Lahi Gidix Nasa i salens wantaim winga bilong LFA Gule long dispela bal na i no luksave olsem baga nogut ya Koivenekere i sambai i stap long baksait na wetim lus bal. Taim Nasa i kikim dispela bal igo bek na go stret long Koivenekere, em i no westim taim we em i kisim gutpela strongpela kik na umben bilong Lahi i mekim nais ya. Dispela gol i mekim ol Lahi wari bikos ol i save olsem i no gat moa taim long bekim gol ya. Ol pilai husat traime bes bilong ol

long Lahi em, Nasa, Daniel, Nema, Harrison Kamake, Yakam Kipu na John Kalin. LFA em gol kipa David Peter na Masi. Kosa Foster i tok, "Lahi i pilai gutpela gem we ol i gat planti sans long skoa tasol ol i no mekim gut na skoa we mipela i skoarim dispela gol long kamap wina."

Em i tok olsem dispela tim em ol nupela pilaia tasol long dispela kain sempionsip we mi no bin ting olsem bai ol mekim i go insait long gren fainel na winim dispela taitel tasol ol i mekim.

"Mi amamas long tripela yangpela blut mangi Esa Nasa, Steven Samson Jr na Otti

Morobe husat tu i bin putim gutpela pilai insait long dispela resis" em i tok.

Long ol awots - Gidix Nasa bilong Lahi i kisim top difenda, Kosa awot i go long Max Foster bilong LFA, Pilaia bilong tonamen i go long Andrew Lepani bilong PMSA, awot bilong referi i go long Thomas Warieng bilong KDS na Fair Play awot i go long Bogenvil.



IT'S THE SP CUP THE NO1 GAME



Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.